

# Mateopa Jesocristo tahimari dsodo inajaro

## Mateo

Mateopa Jesocca dodosse. Ajjaro namidsa Jeso madidsapa Mateopa Jesodsa ccaccaridsa najari.

Tahide Jeso pocca dodosse tojahijine pohnadsa huahua najaraccadsapa Romanodenicca taminecca dodosse tojapojari. Madijadenicca dsiniro mota taminedsa da quinanjine nanaccade tojajari. Mateopa Isaraeri potemahi jodio madija. Imehi onipa Arapeo. Mateo pohua oni ohuahapa Rebi.

Jodiodenipa pohnadeni Idinide Cristo-Mesia tohui madimanajonajari. Jesopa Cristo-Mesia bacco najonajari tahimari jodiodeni nahatoqquri nahijine Mateo dsodo inajaro.

### Jeso biridideni onideni

*Roca 3.23-38*

**1** <sup>1</sup> Jehe, ajjaro imapi Jesocristo tahimari. Jeso biridi ojariapa Isaraeri potemahi jodiodeni quiquina-najaridenicca tamine \*Dabi. Biridi ohuaha naco Isaraeri potemahi jodiodeni huapimacca idi \*Abarahao. Nadsapa Abarahao potemahi onideni hua inadsa Jeso imenicca maqqui oni bacco inanijine.

<sup>2</sup> Tahidepa Abarahao.

Abarahaopa Isahacacca abi.

Isahacapa Jacobocca abi. (\*Jacoboni ohuahapa Isaraeri.)

Jacobo bedideni ojaria onipa Joda. Pohua, pohua imecotedenidsa: –Isaraeri potemahi jodiodeni –quiqinanajari.

<sup>3</sup> Joda bedipa papamade: Pare, Dsara quinajari. Imenideni oninipi Tamara.

Parepa Eserocca abi.

Eseropa Araocca abi.

<sup>4</sup> Araopa Aminadabecca abi.

Aminadabepa Nahasaocca abi.

Nahasaopa Saomocca abi.

<sup>5</sup> Saomopa Bohodsicca abi.

Bohodsi imeni oninipi Rahaba.

Bohodsipa Obedecca abi. Obede imeni oninipi Roto.

Obedepa Dsesse-Isahicca abi.

<sup>6</sup> Dsesse-Isahipa Dabicca abi.

Najari Dabipa jodiodenicca tamine tojajari.

Pohnuapa Saromocca abi.

Saromo imenipi Oria bedimeni bote.

<sup>7</sup> Saromopa Robohuacca abi.

Robohuapa Abiacca abi.

Abiapa Asacca abi.

<sup>8</sup> Asapa Josapatecca abi.

Josapatepa Joraocca abi.

Joraopa Osiacca abi.

<sup>9</sup> Osiapa Joataocca abi.  
 Joataopa Acasecca abi.  
 Acasepa Esequiaccia abi.

<sup>10</sup> Esequiapa Manasecca abi.  
 Manasepa Amaocca abi.  
 Amaopa Josiaccia abi.

<sup>11</sup> Josiapa Jeconiadenicca abi.  
 Jeconia, pohua imecotedeni  
 madimanadsapa dsama  
 onihicca madija jadsire  
 eccajonamanajaro. Najari-  
 denina deni toquejenadsapa  
 Isaraeri potemahideni todsepe  
 toquejenajari. Poccadeni dsama  
 Babironiahuaaji iaccanibaqqui-  
 manadsapa tarabaidasajine  
 \*medse toquejenajari.

<sup>12</sup> Nadsa nahi dsama onihihuaji  
 madimanadsa Jeconia bedi  
 tossonajari. Pohua onipa  
 Saratieo.  
 Saratieopa Sorobabeocca abi.

<sup>13</sup> Sorobabeopa Abiodicca abi.  
 Abiodipa Eriaquiocca abi.  
 Eriaquiopa Adsoriaccia abi.

<sup>14</sup> Adsoriapa Sadocacca abi.  
 Sadocapa Aqiocca abi.  
 Aqiopa Eriodecca abi.

<sup>15</sup> Eriodepa Eriasacca abi.  
 Eriasapa Mataocca abi.  
 Mataopa Jacobocca abi.

<sup>16</sup> Jacobopa Dsodsecca abi. Najari  
 Dsodsena Mariacca maqqui  
 tojaripaja.  
 Jehe, Dsodsecca amoneje Maria-  
 dsana Jeso tossonajari. Najari  
 Jesona –Ia Idinide \*Cristo-Mesia  
 –ihinanajaro.

<sup>17</sup> Jehe, najaro imapi Jeso biridi-  
 deni huapi taraha onideni eti ajima-  
 jerajaro. Abarahao onidsama hua  
 idsanapodsapi ajicca tamine Dabi  
 oni bacco inadsapi biridideni 14  
 quinajari.

Nadsapi Dabi onidsama hua  
 inapomadsapi Jeconia oni bacco  
 inadsapi denima biridideni 14  
 quinajari. Aja Jeconia madidsapa  
 Isaraeri potemahideni todsepe  
 toquejenadsa dsama Babironiahuaaji  
 iaccanibaqqui-manajari.

Dsotode Jeconia Babironiadsa  
 madidsa pohua onidsama hua ina-  
 pomadsapi ia Idinide Cristo-Mesia  
 tossonahi bacco inadsapi denima 14  
 quinajari.

### Jeso tossonahicca ima

*Roca 2.1-7*

<sup>18</sup> Jesocristo tossonahijinecca  
 imapi ajima napojaro: Jeso imeni  
 Mariapi Dsodse icajihijine tahide  
 imehidenipa jehe canirepojari.  
 Mariapi maqquideje ssamo taccani.  
 Dsodsepa pocca odsahuaji Maria  
 iaccani-jeraccadsapi ponidsa  
 huada-jaraccahi. Naraha ponipi  
 jajararo. \*Dio Corime huati tadsapa  
 poni idsonidsa ejedeni nahatodsa  
 huittidsajari. <sup>19</sup> Ponicca maqqui  
 tojahijine Dsodsepa imari bica  
 taja najari. Poni jiani qqui taraha  
 ponidsa ima inassonariniijine  
 jipera tajari. Nadsapa pohua bodi:  
 –Cacomehedsa onebona –najari.

<sup>20</sup> Pohua bodi nama naraha pocca  
 huadadsa \*Diocca dodosse Pohua  
 Atti ccaccaronade ahuatodsa huati  
 tajari: –Dsodse, tiapi tamine  
 Dabi potemahi tijani. Ticappina-  
 jeraji. Maria jiaporaha ticajiniijine  
 oppinera tani. Aja, Maria poni  
 idsonidsa ejedeni huittidsajaripa  
 madijajine jarahi. Dio Corime huati  
 tadsa ejedeni cajijaro –najari.

<sup>21</sup> –Nidsa poni bedi tossonadsapa  
 onipa “Jeso” tana. (Ettidsapi:  
 Ia Medsede madija Tonassajade,



inajaro.) Najaripa pocca madija  
inassiajabaquihitohui, poccadeni  
imasiri manaconi najidsohue pohua-  
denidsa inassonari-jeranitohui  
—najari Dio Atti ccaccaronade atti.

<sup>22</sup> Najarō ima huapima ima tojapo-  
nijinepi maittaccadsama Diopa  
Pohua Atti cacomerabote Isahia-  
dsa huati tadsa Isahiana \*huati  
iqquimajaro. <sup>23</sup> Pohua attipa:

—Ticattomama canaji. Dsohuato  
maquideje ssamo taraha jiadsapi  
ejedeni cajinitohui. Poni bedi-  
dsapa: Emanohueo, quiquinana-  
hitohui

—napohui nade Isahia. (Emanohueo  
ettidsapi: Dio iadsa madihi, inajaro.)

<sup>24</sup> Nadsapa Dsodse dsapa huati  
huati taha jicadsapa Dsodse nocco  
tojajari. Dio Atti ccaccaronade atti-  
dsa ibora tadsapa Maria icajijaro.

<sup>25</sup> Nadsapi pocca amoneje tojaraha  
poni idsonicca ejedeni tossona-jara-  
ccadsapa ponidsa huada-jarajari.  
Poni bedi tossonadsapa Dsodse  
ejedeni oni hua inajari: —Jeso  
—najari.

**Abadsico bedi tahimari  
nahatoququiri napojarideni  
Jeso ququide jahijonajari**

**2** <sup>1</sup> Jesopa odsa panani onini  
Berenedsa tossonajari. Najarō  
odsapi Jodeahuajicca dsamacca.  
Jeso tossonahicca huajanodsapa  
tamine \*Herode dsama Jodeacca  
madija cacahuade tojajari. Pohuapa  
odsa panani \*Jerosare dsamadijari.  
Nadsapa tamine Herode nahidsa  
madihi paja naccadsa dsama huaji  
tanicca madija maji ccajonahihuaji  
jahijonadsa Jerosare dsabacco

najonamanajari. Pohnadenipa abadsico bedi tahimari nahatoqquiri napojarideni. <sup>2</sup> Jerosaredsa bacco najonamanadsa attidenipa: –¿Nija? ¿Nejecohuaji Isaraeri potemahi aja jodiodenicca tamine tossonajaritta? –najonamanajari. –Iapi maji ccajonahihuaji imadidsa abadsico bedi dsati qqui icanade. Najaro imapi tamine deni tojjari tossonahitohui quinapojaricca ima tojjaro. Najari qquide jaijonajaro. Ipitodsa jassi inadsa pohuadsa: “Icca tamine” inanjine –quinajari.

<sup>3</sup> Nadsapa tamine Herode najaro ima mittadsapa bodi tocassera-jari. Pocca madija nahi Jerosaredsa madimanajarideni ima mittamandasa naco bodideni cappinamanajari. <sup>4</sup> Nadsapa tamine Herodepa \*dada toqquimade taminedeni, jodiodenicca marinaja maridedeni naco inequeriqquihijine huahua inabaquijari. Queriquimanadsapa pohuadenidsa huati tajari: –Aji Dio Atti dsodo nanidsa ia Idinide Cristo-Mesia tossonahicca imapi ¿nejecoma napojarotte? ¿Nejecohuajina Cristo-Mesia tossonahitohui napojarotte? –nahi nade Herode. <sup>5</sup> Tamine Herodedsa ima ecomeramanajaro: –Jodeahuajicca odsa panani Berenedsana tossonahitohui. Najaro imapi \*Dio Atti cacomerabote Miqueo dsodo inapojaro.

<sup>6</sup> Pohua atti ajama napojari:

“Berenecca ima huati onana. Jodeacca dsamahuaji odsa panani huapi taraha Berenepe ajimani toja-jerani.

Ima bicani deni tojanicca cajinitohui. Nahidsa tamine deni tojahicca tossonahitohui. Pohnapa occa madija Isaraeri

potemahideni ecahuabaquihitohui”

napohui nade Dio Atti cacomerabote –quinahi nade jodiodenicca marinaja maridedeni.

<sup>7</sup> Herode najaro ima mittadsapa aja abadsico bedi tahimari nahatoqquiri napojaridenitohui cacomehedsa huahua inabaquijari, poccadeni ima mittahijine. Jahijonadsapa pohuadenidsa huati tajari: –Aja abadsico bedi dsati qqui ticamanajaripa ¿nejecoma nadsa cahatojaritta? –nahi nade. Nadsapa pohuadsa abadsico bedi tahimari ecomeramanadsa mittajari.

<sup>8</sup> Nadsapa Herode Berenehuaji dosse iqquimabaquijari: –Berenehuaji jai tijana. Nanihuaji ejedenitohui qqui taridsamanana. Bacco tiquindsapa ohuadsa huati tanimanana. Ohua naqui pohua qquide occadsa opitodsa ohuittadsa pohuadsa: “Occa tamine” onanjine, onajaro –naraha maidsajari. Tamine ohuahadsa jipera tajari.

<sup>9-10</sup> Herode atti mittamanadsapa jai tojjari. Jai toja, jai toja nanaja abadsico bedi aja qqui icanamanapojari pohuadeni tedsejema cahatopomajari. Cahatopomadsa abadsico bedi tahimari nahatoqquiri napojarideni huatidsemaneri najari. Pohnadeni tedsejema tohuaccadsa ejedeni tossonahicca odsadsa quehenacossajari. <sup>11</sup> Nahidsa jai tojedsimadsapa ejedeni qqui, imeni Maria qqui toquinajari. Pohnadsa huatidsemanadsapa pohuadeni pitodsa jassi tadsa: –Tamine deni tojahi –quinajari. Pohnadeni dsepetaji baho bedeni bicaquiri najaro itaboridsamanadsa poccadeni daniji ejedenidsa da inaquimanajaro. Oro



huatini ccara tanicca da quinajaro. Ahua majicone tohuessihi majo bica tajari naco da quinajari. Ahua ohuaha oni mirra majicone majo ocassa tahicca naco da quinajari.

<sup>12</sup>Nadsa dsome nahidsa cahadija-dsapa huada cajimanajari. Dio pohuadenidsa huati tajari: –Tamine Herodehuajipi jai tijani-jeraji. Pocca ima oppina tani –najari poccadeni huadadsa. Nama nadsapa poccadeni dsamahuaji jai tojanihijinepa Jero-sarecca jahuihuaji jai tojani-jarahi. Jahui onihina jai tojanijari.

**Dsama Ejitohuaji joppa  
icanamanajaricca ima**

<sup>13</sup>Nadsapa abadsico bedi tahimari nahatoqqiri napojarideni jai tojania jicahi. Dsotodepa Dsodse pocca huadadsa Diocca dodosse Pohua Atti ccaccaronade ahuatodsas atti ajama najari: –Dsodse, nocco tijaji. Huassinaja aja ejedeni imeni tadsajani dsama Ejitohuaji tiaccabaqqiijo. Tamine Herodecca dosseniji ejedeni-tohui qqi naridsamanabote nahi, inanadsoque-manahijine. Nani

Ejitohuaji timadi-dsanapoccana. Nidsa tiadsa huati onapomadsana ticcanipomanijine bica tani –najari. <sup>14</sup>Nadsapa huassinaja nocco toque-jenadsa: –Jina, jidapana dsome icadana –najari Dsodse. Nadsapa dsomeraha ejedeni imeni tadsajani Ejitocca jahui jai tojajari. <sup>15</sup>Ejitohuaji bacco toquinadsapa tamine Herode madiccadsa nahidsa madimana-dsanapoccajari. Najaro imapi maitta-ccadsama Dio huati tapodsas Pohua Atti cacomerabote Osea dsodo inapojaropi ajima najaro: –Occa Ejedeni Ejitohuaji madiraha pohuatohui huahua onajaro –najari Dio Atti Oseajine dsodo nanidsa. Nadsapa tamine Herode dsoqquehi ima mitta-manadsana poccadeni dsamahuaji jahinijari.

**Herode ejedeni  
inajicaridsahijine dosse  
inabaqquiridsajari**

<sup>16</sup>Herode dsoqque-jaraccadsa ima ajima inanajaro. Aja abadsico bedi tahimari nahatoqqiri napojarideni-tohui madiraha

pohuahuaaji jahini-jaradsapa bodi huatomajari: – Ohua icamaidsa-manajaro – najari. Nadsapa paja huadirijari. Huadidsapa tamine dsati tossonajari dsori tajarahijine pocca madija dosse inabaquijari: – Jari, Berenedsa madimanajari-deni, Berene huajira tanidsa madi-ridsamanajarideni naco bedideni maquideje bedi huajanorideni 2 najari, huajanorideni ajamanicca naco, najarideni huapima tinajica-ridsamanahissa tajo – nahi nade Herode. Aja abadsico bedi dsati qqui icanamanapjaricca huajano-dsa tocatojaridsajarideni huapima jicaridsahijine. <sup>17</sup>Nama quinadsapa Isaraeri potemahidenicca ejedeni badsiraququiri najari inajicamana-jarijine imehideni, imenideni oji oji quinajari. Najaro imapi pina maittaccadsama Dio Atti cacomerabote Jeremia dsodo inapojarossa najaro tojajaro. Isaraeri potemahidenicca ini maittaccadsama madipojaro onini Raqueo tahimarinidsa dsodo nanipi ajima najaro:

<sup>18</sup> – Odsa panani Ramahuajicca dsamadsa oji imeni tojajaro. Raqueo potemanidenipi bedideni-tohui oji oji quinajaro. Poni-denicca ojie naqui huatinideni ssonanijine jiperaququiri najaro, bedideni jicaridsadsa – napohui nade Dio Atti Jeremiajine dsodo nanidsa.

<sup>19</sup>Nadsapa dsotode tamine Herode dsoqqehei nattipa dsama Ejitohuaaji Dio Atti ccaccaronade Dsodse pocca huadadsa ahuatopomadsa huati tajari: <sup>20</sup> – Dsodse, nocco tijaji. Aja ejedeni imeni tadsajani Isaraeri potemahidenicca dsamahuaaji tiaccanibaquijajo. Ejedeni

inanadsoqqe-manahijine tohui quinajaridenipa jicahi – nahi nade.

<sup>21</sup>Nadsapa Dsodse nocco tojadsapa najoradsa Isaraeridenicca dsamahuaji ejedeni imeni tadsajani iaccanibaquijari. <sup>22</sup>Nanihuaji bacco tanimanadsapa Dsodse ima mittajari: – \*Herode dsoqqedsapa pohua bedi onipa Aquelao najarina dsama Jodeacca tamine tojajari – quinajari. Najaricca ima naqui tabaccora tajaro, pina imehicca imassa nadsapi Dsodse nahihuaji madihijine cappinajari. Naraha pocca huadadsa Dio pohuadsa huati tajari: – Aji Jodeadsapi timadimana-jeraji – nahi nade. Nadsapa dsama arobeni Carireahuajina tojoppemamanajari. <sup>23</sup>Jai tojadsapa Carireahuaji bacco toquinajari. Nadsapa odsa panani Nasaretidsa madimanajari. Najaro imapi pina Dio Atti cacomeraququiri najarideni madija Idinide Cristo-Mesia tahimari huati toquinapjarissa najaro: – Pohuadsa: “Nasaretihuajicca” quiquinanahitohui – quinapohui nade Dio Atti dsodo nanidsa.

**Huano Baotistapa dsama huamonihuaji madija mari icanabaquijari**

*Maraco 1.1-8; Roca 3.1-9, 15-17; Huano 1.19-28*

**3** <sup>1</sup>Huajano toccahi huapi tadsa madija oni \*Huanopa dsama arobeni onini Jodeacca huamoni ssono caji, siba caji tanihuaji madija maride tojajari. Pohuadsa: Baotista, quiquinanajari. (Ettidsapi: Totopade, inajaro.) <sup>2</sup>Mari mari ihicanabaququiridsa nadsapa ajama nanaridsa najari: – ¡Ticcadeni imasiri tineboridsamanaji! ¡Diotohuira

tidsanapomanaji! \*Diocca cacahuehepi iadsa bacco najonabote nani –nanaja najari Huano.

<sup>3</sup>Aji Huanocca imapi maittaccadsama Dio Atti cacomerabote Isahia dsodo inapojaro. Pohua atti ajama napojari:

–Nidsa dsama huamoni ssonocaji, siba caji tanihuaji madijaripa  
atti mohui tadsa madija huahua huahua ihinajonabaqqi nahitohui.

Pohua attipa: “¡Ia Medsede ccajonabote nahi! ¡Tinajoramanaji!

¡Pohua tedsejema jahui tijjenedeni tobicapoji!  
Najaroa aji tibodidendi pohuatohui tinajoramanaji”  
nanaja nahitohui dsama huamonihuaji madijaripa  
–napohui nade Dio Atti Isahiajine dsodo nanidsa.

<sup>4</sup>Nadsama Huanopa dsama huamonihuaji madidsapa pocca eteropi camello cone ba nani ssequi nadsa huedsajari. Pocca ssoquepi bani etero. Pohua taparipa sese, dsamacca jidsi oquine najari.

<sup>5</sup>Madija huapima Huano atti mittamanahijine jahijonana canajaridenipa odsa panani Jerosarecca, Jodeacca dsamadsa madiridsamanajarideni, hueni Jordaohuaji madiridsamanajarideni naco bacco bacco quinajari. <sup>6</sup>Poccadendi imasiri Diodsa ecomeramanadsapi Huanopa hueni Jordaodsa topa topa ihidsanaabaqqi najari.

<sup>7</sup>Naraha dsotode madija huapitaha jahijonahi Huano qqui tajari. Pohuadenipa Isaraeri potemahi jodiodeni mota \*marinaja onini

pariseodsa jehe quinajarideni, mota \*marinaja onini sadosedsa jehe quinajarideni \*totopa tohui quindsa Huanohuaji jahijonajari. Naraha Huanopa pohuadenidsa huati tajari: –¡Tiadenipi pina maccassatiquinani. Ticcadeni imapi tabaccora tajaro! Tiadenipi tibodidendi cacajiquimera-jeraraha: “Huano ia topa todsanabaqqidsapa Diocca najidsohuedsa dsori icanirenitohui” ¿tiquinajaroqui? Naraha tibodidendi cacajiquimera-jeradsapi dsori ticanire-jeranitohui. <sup>8</sup>Naraha tettidendi ajima tiquindsana bica tani: “Imasiri onebona. Diotohuira obodi huahuatoma nanijine” tiquinadsapi tibodidendi cacajiquimeranicca ima ahuato tanijine ima bicanira tinanamanaji, onajaro –najari Huano. <sup>9</sup>–Naraha tibodidendisa ajima tiquinanitide: “Icca idipa \*Abarahaojajari, Diopa ia tohuattajobaqqi-jarahitohui” titiquina naraha tiadeni ticamaidsanimanajaro. Diopa madijassa najarahi. Pohua jipa tadsapa aji siba huihwitteri naridsajarodsa naco Diopa Abarahao potemahissa naha inahatoridsahijine pajirajari. Paji tiadenipi: “Abarahao potemahi iquejenani” tiquinaraha Diodsa iboraqqiri tiquinejeradsapi tiadeni tohuattajo-baqqi hitohui. <sup>10</sup>Nadsapi Diodsa iboraqqiri tiquinejeradsa, ima bicani tinamana-jeradsa naqui ticcadeni ima pina ahua tabaccora tajaricca imassanajaro. Paji, najari ahua ca cajine dsamipa najorahi. Ahua bono bica tajaradsapa ca tacaridsa tahi. Ca tacaridsadsapa bobottahuaji hua hua totodsima najari, diji tahijine –nahi nade Huano.

<sup>11</sup> – Ohuapi passodsa tiadeni topa odsanabaquijaro, imasiri tinebo-manadsa Diotohuira tiquinanicca ima ahuato tanijine. Naraha madija dacorajari ccajonabote nahi. Ohuapi tahide mari mari onaporaha aja dsotodecca mamaride ccajonajarina deni tojajari. Najarina Dio Corime tibodidenidsa madihijine tiadenidsa inanaridsahitohui. Puhuapa pahuadsa toquejena-jarajardenipa jororoni jiquejeranihuaji hua idsimabaquihijine pajirajari. Ohuapi ajimani ojani. Pina pocca medsesa onanijinepi opajira-jerani. Pohua amoricca sadaria dsojode naqui opajira-jerani – nahi nade Huano.


<sup>12</sup> – Jehe, ccajonabote najaripa madija icattejidsa-baquihijine. Pina madija aroso jidsadsa trigo huire tahijine qquero quissa, qquero quissa, qquero quissa

inamacossajari. Nahi trigo etero, eppe, ede najaripa jojededsa tocahijine. Nadsapa noccona ecahuajari pocca odsahuaji. Naraha trigo etero, eppe, ede najaripa diji tahijine bobottahuaji hua idsimahitohui. Najarina aja Diodsa iboraqquri najarajaridenipa \*jororoni jiquejeranihuaji hua idsimabaquihitohui. Najarito jororonipi ohuihuira tani – nahi nade Huano.

### Jeso totopa cajjaricca ima

*Maraco 1.9-11; Roca 3.21-22*

<sup>13</sup> Nadsapa Jeso dsama arobeni onini Carireadsa madiraha hueni Jordaohuaji qquedsippajari. Huano madihihuaji bacco dsippadsapa Huanodsa: – Ohua topa tidsanaji – najari Jeso. <sup>14</sup> Naraha Huano attipa: – Ohuapi ajimani ojani. Tiana ohua topa tidsanani bica tani – najari.



<sup>15</sup>Naraha Jesopa: –Epeje, nema nehe ohua topa tidsanaji. Ajijaropi Dio pocca dosseniji nema inanijine –najari Jeso. Nadsapa Huano jehe najari. <sup>16</sup>Nadsapa Jeso topa idsanajari. Jeso passodsa toتهمadsa tocattamacossa nanaja meme tohuaba najaro. Dio Corime ahuato taha pina midsorissa naha ccaronajari. Ccaronadsa Jesodsa be tajari. <sup>17</sup>Nadsapa memehuaiji atti mittaronajari: –Ajaripa occa Ejedeni. Pohuadsa ohuati huana tajaro. Pocca ima bica tajarojine ohuatidsejaro –najari Dio.

**Jeso imasiri inananijine Satana nattome inaraha jehe najarajari**

*Maraco 1.12-13; Roca 4.1-13*

**4** <sup>1</sup>Huano Jeso topa idsanaha jica-dsapa Dio Corime Jeso iaqqemorajari, dsama huamoni ssono caji, siba caji tanihuaiji iaccajari. Nahihuaiji pohua iaccajaripa imasiri totonanade \*Satanapa Jeso nattome inahijine. Satanapa Jeso imasiri inananijine dissera tajari. <sup>2</sup>Nadsama Jesopa huamonihuaiji madidsapa jiperahi huada 40 naha maddsanapojari. Pohua jipa-jarahicca ssiaja 40, dsome 40 nadsapa pemihissa tajari. <sup>3</sup>Nadsapa Satana Jeso icamaidsahijine pohuadsa bacco tajari. Satana attipa: –Dio Bedi tijadsapi, jari, tijipanijine ajijaro siba pan tojahijine huati tinaji –najari. <sup>4</sup>Naraha manaco Jeso Satanadsa huati tajari: –Dio Atti dsodo nanidsapi ajima najaro: “Dsamatapadsara imadini ojari-gerani. Abi Dio huati tahi imittajarocca ibodidsa tojadsapi pina ijipajarossa najaro. Najarojinena idacorani nadsapi imadijaro” nani Dio Atti dsodo nanipi –najari Jeso.

<sup>5</sup>Nahi dsotode imasiri totonanade Satanapa Jeso odsa panani bicabote Jerosarehuaiji iaccajari. Nanicca \*Diodsa dada toququma tetepihuaiji inanajari. <sup>6</sup>Nahidsa Satana Jesodsa huati tapomajari: –Jari, Dio Bedi tijadsapi joppa tinaronaneje, nami-huaiji tissona-geranitohui –najari. –Aji Dio Atti dsodo nanidsapi ajima najaro:

“Diopa pocca dodosse tabaqqi memehuaiccadsa huati tahitohui, tia ecahuamananijine. Pohuadeni bijidsa tia dama ijidsamanadsapi temori naqui sibadsa cabiquera-geranitohui” nani Dio Atti dsodo nanipi

–najari Satana Jesodsa. <sup>7</sup>Naraha manaco Jeso huati tapomajari: –Jehe, Dio Atti dsodo nani nema naraha Pohua Atti dsodo nani onihipi ajima najaro: “Tia Medsede Dio nattome tajarajo. Tettidsa: ‘Dio ohuacatamana’ tejeraji” nani Dio Attipi –najari Jeso.

<sup>8</sup>Nahi dsotode Satanapa ssono imeni huaiji tanihuaiji Jeso iaqqemorajari. Nahihuaiji bacco toquina-dsa Satanajine dsama huapima Jesodsa ahuato inanaridsajaro. Dsama huapima bica tanicca, odsa panani huapima bica tanicca Jeso dsopi icanaridsajari Satanapa. <sup>9</sup>Nadsapa Satana Jesodsa huati tapomajari: –¡Qqui taneje! Ajijaro dsama huapimapi tiadsa da onanijine. Jehe, obacchohuaiji tipitodsa tittadsa ohuadsa tetidsedsa: “Occa tamine” taji. Ohuadsa nema tadsapi ajijaro huapimapi ticca tojanijine, onajaro –najari Satana atti. <sup>10</sup>Naraha manaco Jeso Satanadsa huati tajari: –¡Satana, ajicca ticcaniji! Epejena. Ohuapi tiadsa

ohuatidsena onejerani. Dio Atti dsodo nanidsapi ajima najaro: “Ia Medsede Dio Pohnadsara tetidsemanani ojari dsanapoji. Pohua Attidsara iboraququiri tiquinaji” nani Dio Attipi –najari Jeso.

<sup>11</sup>Nadsapa Satana toccanijari. Nanaja Diocca dodosse tabaqqiupa najoramanapoja nadsa Jeso acco icamamanahijine jahironajari.

**Jesopa Carireahuaji maride idimapojar**

*Maraco 1.14-15; Roca 4.14-15*

<sup>12</sup>Dsotode Jesopa –Huano Baotista toponi cocorodsa coroidsimamanahi –quinahi ima mittadsapa dsama arobeni onini Carireahuaji toccanijari. <sup>13</sup>Naraha Jesopa odsa panani Nasaretidsa tomadinipoma-jarajari. Odsa panani Capernaohuajina madihijine toccajari, nahi Carireacca coridsa inidihuaji. Jesopa nahihuaji madihijine toccadsapa Isaraeri bedi Dsaborona potemahidenicca dsamabotedsa ccaridsa, Isaraeri bedi Netari potemahidenicca dsamabotedsa naco ccaridsa najari. <sup>14</sup>Jeso nahihuaji madihijinecca imapi maittaccadsama Dio Atti cacomerabote Isahia dsodo inapojaro. Pohua attipa:

<sup>15</sup> –Dsaborona potemahidenicca dsamabotehuaji, Netari potemahidenicca dsamabotehuaji naqui ima bicani cajini. Ia Idinide nahihuaji madimanageridenidsa bacco tajari, pina ssiajanissa najari. Nahihuajipa \*jodio quejenajarajarideni caji tahi. Coridsa huapicca dsama, hueni Jordao maji toccahihuajicca dsama onini Carireadsapa

Diodsa ssamoququiri naha madimanajari.

<sup>16</sup>Dsidsinidsa madimanadsapa dsoqqehe noppineni cappinamanaraha ssiajani dsati pohuadenidsa tossiajaridsadsapi

Diojine madija tocassiejerahijine tahimarini ahuato inananitohui

–napohui nade Dio Atti Isahiajine dsodo nanidsa.

<sup>17</sup>Nahihuaji Jeso bacco tadsana Dio Atti maride tahide idimapojar. Madija mari mari ihicanabaququi nadsa pohua attipa: –Ticcadeni ima Diodsa tecomeramanadsa ticcadeni imasiri tinebomanaji. Diotohuira tidsanapomanaji. \*Diocca cacahuehepi iadsa bacco najonabote nani –nanaridsa najari Jeso.

**Jesopa aba cocorodedeni 4 quinaha huahua inabaququijari**

*Maraco 1.16-20; Roca 5.1-11*

<sup>18</sup>Jeso Carireacca coridsa inidi toccabacossadsa madija pamaha ququi inabaququijari: Ssino pohua oni ohuaha \*Pedro, pohua ohuaha Adiri tedseje. Pohnadenipa aba cocorodedeni. Aba corode toquejenaraha Jeso bacco najonajari. <sup>19</sup>Pohnadenidsa huati tajari: –Jina, ohuadsa ticadaridsaji, ohuatimade tiquejenadsapi tiadeni onahattabaququinijine. Tahidepi abadsa tidsepedeni ijimanaporaha jidapapi madija ohuadsa toquejenahijinena tidsepedeni ijimananitohui, onajaro –nahnade Jeso. <sup>20</sup>Najaro ima mittamanajaja poccadeni tajapa icanebomanadsa Jesodsas tohuedajari.

<sup>21</sup>Nadsapa denima jai tojabacossanajaja Jesopa madija ohuaha pohua

imecote tedseje qqui inabaquijari. Najaridenipa Sebedeo bedideni Satiaco, \*Huano quinajari. Poccadeni abi quinadsa canoadsa jassi dsajari. Tajapa ssequinimade toquejenaraha Satiaco, Huano tedseje Jeso huahua inabaquijari. <sup>22</sup> Najari deni naco amadsati poccadeni canoa icanebomana, poccadeni abi inebomana nadsa Jesodsa tohuedajari.

**Jesopa madija huapi taha  
mari icanabaquijari**

<sup>23</sup> Jesopa Carireahuaji ccaridsa ccaridsa naridsajari. Nani Isaraeri potemahi \*jodiodenicca Dio Atti mamari onihi onihi naridsanihuaji mari mari nanaridsa najari. Puhuapa Diocca cacahuehecca ima bicani ehecomeraridsa najaro. Comaquiri najarideni naco comani onihi, onihi cajiridsamanaraha huapima ihinanomi-ridsabaquijari. <sup>24</sup> Pocca imapi dsama Siria nemanehahuaji madiridsamanajarideni naco mittaridsamanadsapa poccadeni dsama huaji taraha comaquiri najarideni ehecacajona-baqquimana najari. Dsamacoma cajimanajarideni, isso sirideni, biji sirideni, comani onihi onihi cajimanajarideni ehecacajona-baqquimana nadsa huapima Jeso ihinanomi-ridsabaquijari. Madija bodidenidsa \*Satanacca dodosse tabaqqi tocorimedeni madidsamanajarideni, aja huatiajojo comani cajimanajarideni, aja madija idedeni tone biqueradsa issodeni ssomi toquejenajarideni naco ehecacajona-baqquimana nadsa Jeso ihinanomi-baqqi najari. <sup>25</sup> Nani Carireahuajicca madiridsamanajarideni mota,

dsama arobeni onini Decaporihuajicca madiridsamanajarideni mota, odsa panani Jerosarecca madimanajarideni mota, dsama arobeni onini Jodeahuajicca madiridsamanajarideni mota, hueni Jordao maji ccasonahihuaji madiridsamanajarideni mota naco huapima Jesotohui disseraquiri nadsa jahijonana canajari.

**Ssonohuaji Jeso mari  
icanabaquijaricca ima**

**5** <sup>1</sup> Jesopa madija huapima pohuadsa queriquihi qqui tadsapa ssonohuaji toqquemorajari. Nahidsana maride huittaritari. Jesocca mamari tabaqquipa pohuahuaji huajijira canajari. <sup>2</sup> Nadsapa mari icanabaquijari.

**Diopa madijadsa ima bicani  
inanarocca ima**

*Roca 6.20-23*

<sup>3</sup> –Tiadeni motta tibodideni tobicanijine tipajiramana-jerani nahatoqquri tiquinadsapi Diopa tiadenidsa ima bicani inanajaro. Diocca cacahuehe tiadenidsa tojanitohui.

<sup>4</sup> –Tibodideni huanacossadsa oji tiquinaraha Diopa tiadenidsa ima bicani inanajaro. Dio tibodideni acco camahitohui.

<sup>5</sup> –Tiadenidsa ima tabaccora tаницa bacco taraha tedimana-jeradsa tibodideni: “Nidsa Dio ohua acco camahitohui” tiquinadsapi Diopa tiadenidsa ima bicani inanajaro. Nidsa Djoline dsama dsati tojadsa najaropi ticcadeni cacahuehe tojanitohui.

<sup>6</sup> –Tibodidenipi pina: “Occa ima Diodsa pajiranissa taccaraho, Pohua

Attissa onananijine dissera onana” tiquinadsapi Diopa tiadenidsa ima bicani inanajaro. Tibodidenidsa jipa tinajarocca Dio tiadenidsa inananitohui.

<sup>7</sup> –Tiadenipi madijadsa tetideni huanaquiri nadsa pohuadenidsa ima tojadsapi pohuadeni acco ticamabaquimanadsapa Diopa tiadenidsa ima bicani inanajaro. Diopa tiadenidsa naco huati huana tahitohui, tiadeni acco tocama-baquihihitohui.

<sup>8</sup> –Tibodidenidsa Diotohuira tiquinadsapi ticcadeni ima quejema- jeradsapi Diopa tiadenidsa ima bicani inanajaro. Jidapapa Dio tiadenidsa tojidserajari. Nidsa memehujipa Dio Pohua qqui tiquinahitohui.

<sup>9</sup> –Madija ohuaha tijinedeni cajoneradsapa Diopa tiadenidsa ima bicani inanajaro. Diopa tiadenidsa: “Occa ejedenideni” najari.

<sup>10</sup> –Diodsa disseraquiri tiquina- dsa Pohua Attissa tinanamanadsapi jehe quina-jarajarideni tiadeni tonajidso-baquimanaraha Diopa tiadenidsa ima bicani inanajaro. Diocca cacahuehe tiadenidsa tojanitohui.

<sup>11</sup> –Occa madija tiquejenajaro- jinepi madija tiadeni totamasso- baquimanadsa, tiadeni tonajidso- baquimanadsa, ticcadeni ima totabaccoranijine maidsa maidsa quinadsa naco Diopa tiadenidsa ima bicani inanajaro. <sup>12</sup> Tetidsemanaji. “Epejeni bica tani” tiquinaji. Memehujaji bacco tiquinadsapi Diocca daniji bicabote ticajimananitohui. Maittaccadsama naco Diodsa jiperaquiri najaridenipa aja Dio Atti cacomeraquiri najarideni

inajidso-baquimanaja najonapohui najari –nahi nade Jeso.

### **Saho tahimarini, jojororo tahimari**

*Maraco 9.50; Roca 14.34-35*

<sup>13</sup> –Tiadeni aji ohuadsa jehe tiquinajaropi pina sahocca imassa tiquinajaro. Sahopi bani bica tahijine. Aji tiadenipi pina sahossa tiquinajaro, ajijaro dsamacca madija tinanabicabaquimanahijine. Saho ajiboni amossi nadsapi ajiboni caji- pomanijine ssamo tani. Nadsapi tiadeni naqui ajijaro dsamacca madijadsa ima bicani tinanamana- ridsanijine nebomana tiquine- jeraji Ticcadeni jeheniji ponima toja-jerana. Saho ponima tojadsapi madija cora quinadsa madijajine ttai ttai toja tani.

<sup>14</sup> –Tiadeni aji ohuadsa jehe tiquinajaropi pina ajijaro dsamacca ssiajanissa tiquinajaro. Ossiejene ticajimanadsapi dsama huapimac- ca madijadsa otahimari tijine- deni ahuatoridsajaro. Tissiejene- deni ahuato tadsapi pina odsa panani ssono tetepihuaji ahuato tajarossa najaro. Ssonocca odsa pananipi najimanijine ssamo tani.

<sup>15</sup> Jojororo naco toquehessidsapa icanajimahijine jarahi. Ssapotodsa boco icanahijine jarahi. Nadsa jojororo toquehessidsapa aja pohua cacahittari nahidsana cacahittari najari, nahi madija odsa bodihuaji madimanarideni huapima ssiajani cajimanahijine.

<sup>16</sup> Tissiejenedenipi pina najaro ssiajanissa tiquinajaro, madija huapimadsa tossiajabaquini- jine. Ima bicani titinanamana najaro, madija huapima qqui toquinahijine.

Nema tinanamanadsapi Abi Dio memehuari madijaridsa pohuadsa huatidsemanadsa: “Diopa bica tahi” quinahijine –nahi nade Jeso.

**Jesocca marinajapi: –Dio  
Atti dsodo nanicca marinaja  
huapima onapajiranissa  
tanitohui –najari**

<sup>17</sup> Jesopa denima mari icana-baqquidsapa pohua atti ajama najari: –Tiadenipi: “Jesopa \*Moisesicca marinaja jicanijine ccajonajari” tiquinejeraji. Tettideni onih naqui: “Jesopa maittaccadsama Dio Atti cacomeraquiri najaridenijine dsodo nani naqui inajicanijine” tiquinejeraji. Ohuapi najaro marinaja huapima pajiranissa tanijine occajonajaro. <sup>18</sup> Ohuapi pajissara tiadenidsa huati onajaro. Aji meme, nami jiquejeraccadsa Moisesicca marinajapi nebo-jeranitohui. Meme, nami jicadsapi Dio Atti dsodo nanicca marinaja huapima pajiranissa tanitohui. Tohuatti ojarie dsori teje cama-jeranitohui. <sup>19</sup> Nadsama madijadenipa Dio Atti ojariedsa iboqquri nadsapa imasiri cajimanajari. Madija ibo tajari pohua tesse tohuibohuijine mari icanajari attipa: “\*Diocca dosseniji motapi najo tani, tineboji” nanaja nadsapa najaripa Diocca cacahueheda ajamani tojahitohui. Naraha madija ohuaha Diocca dosseniji huapimadsa ibora tajaripa pohua tessedsa: “Diocca dosseniji huapimadsa ibora tinaji” nanaja nadsapa najarina \*Diocca cacahueheda deni tojahitohui. <sup>20</sup> Tiadenidsa huati onajaro: Diocca cacahueheda tiquejenanijinepi Dio Pohua jipa tajaricca

tinanamanadsana pocca cacahueheda tiquejenanijine tipajiramanani. Aja jodiodenicca marinaja maridenedi, \*marinaja onini pariseodsa jehe quinajarideni tedsejepa Diocca dosseniji cacahuade disseraqquri najari. Tiadeni naqui pina najarideni disseraqquri najarissa tiquinana. Naraha tiadenipi denima tinapajiramananissa tana. Nema tiquinadsapi Diocca cacahueheda tiquejenanitohui, onajaro –nahi nade Jeso.

**Jesocca marinajapi: –Huadiepi  
pina ijinedeni ahuamanahicca  
imassa najaro –najari**  
*Roca 12.57-59*

<sup>21</sup> –Ticcadeni ididenicca marinaja timittamanajonajaropi ajima najaro: “Madijapa tinanadsoqqe-jarajo. Madija tinanadsoqqedsapa ima cacattemade atti tiadsa: ‘Manaco tidsoqqeji’ nahitohui” quiquinade. <sup>22</sup> Naraha tiadenidsa huati onana: Timecotedsa titessedsa naqui tedidsapi ima ticajinitohui. Ima cacattemahuaji: “Ticca imapi tabaccora tani” quinahitohui. Ticca huadie tinebo-jeradsa timecotedsa denima tatamasso tadsapi \*ima cacattemadedeni deni toquejenajaridenipa tiadsa ima inassonarimananitohui. Ticca huadie deni tojadsapi timecotedsa tabaccorehema tatamasso taraha ticca imana denima tabaccora tajarjo. Nidsa ticca imapi Dio mittahitohui. Ticca ima nema nadsapi jororoni jiquejeranihuaji tijanitohui.

<sup>23</sup> –Nadsama ticca daniji: “Diocda da onana” tiquinadsa naqui \*Diodsa da tahijinecca huahuanarihuaji ticca daniji tiaccaraha

aji timecotedsa ima tinanapo-  
jaro tibodi huato-dsanapoccani.

<sup>24</sup>Nadsapi ticca daniji dsojo  
tidsimaraha Diodsa da tahijine-  
cca huahuanaridsa hua tari-jara-  
ccadsama nahidsa tineboccao.  
Nadsapi timecotedsa ticcaji, ticca  
ima ticattemamananijine. Ticca  
ima ticattemamanadsa ticajonera-  
pomadsana Diodsa da tahijinecca  
huahuanarihuaji ticcanipomaji.  
Nadsana ticca daniji Diodsa da tina-  
hijine hua tarihi bica tahi.

<sup>25</sup> –Nadsama madija ohuahadsa  
ima tinanadsa naqui pohua attipa:  
“Tia ohuaccana ima cacattema-  
huaji” nadsa naco tahide tia tohua-  
cca-jaraccadsama pohua tedseje  
ticcadeni ima ticattemamanapoji.  
Pohua huati tinassonapojo, nahi  
taminehuaji tia tohuacca-jarahijine.  
Ticcadeni ima ticattemamanapo-  
jeradsapi ima cacattemahuaji bacco  
tinadsapi ima tinanajaro manaconi  
todsepe tijanitohui. Toponi cocoro-  
huaji tia coro idsimamananitohui.  
<sup>26</sup>Pajissara tiadsa huati onajaro.  
Nani toponi cocorohuaji timadi-  
dsapi amadsati tiqquena-jera-  
nitohui. Ima tinanajaro manaconi  
nemanehe tinajicanissa tadsana  
tiqqenanitohui –nahi nade Jeso.

**Jesocca marinajapi:**  
–**Tibodidenidsa huananehe**  
**tohui tiquinejeraji –najari**

<sup>27</sup> –Ticcadeni ididenicca marinaja  
timittamanajonajaropi ajima najaro:  
“Amoneje ticajidsapi amoneje  
onihipi tija-jeraji. Maquideje ticaji-  
dsapi maquideje ohuaha tinaja  
tajarajo” quiquinanade. <sup>28</sup>Naraha  
tiadenidsa huati onana: Madijapa  
amoneje onihi qqui tadsa tohuini

inacomadsapi pohua bodidsa ima-  
siri inanajaro. Pina amoneje ijajaro-  
ssa najaro –nahi nade Jeso.

<sup>29</sup> –Nadsama imasiri tinana-  
jeranijinepi tibodidsa daco tijira-  
dsa poni taji. Poni tejeradsapi ima  
oppina tani tiadsa ssonarinitohui.  
Nadsama pina tinocco nahatoni-  
ccadsa tohuini tanicca qqui tina-  
dsapi najarodsa imasiri tinananijine  
tohuini taraha daco tijiradsa poni  
taji, imasiri tinana-jeranijine. Nema  
tadsapi pina tinocco nahatonicca  
huari, joca, jeo, coro tinajarossa  
najaro, imasiri tinana-jeranijine.  
Tinocco ojarie amossi naraha ¡epeje!  
tessirema tissiajanitohui. Jororoni  
jiquejeranihuaji tija-jeranitohui.

<sup>30</sup>Nadsama pina tidsepe nahatoni-  
ccadsa imasiri tinanabote naraha  
daco tijiradsa poni taji, imasiri  
tinana-jeranijine. Nema tadsapi pina  
tidsepe nahatonicca ca ticajidsajaro-  
ssa najaro. Tidsepe cajarie amossi  
canaraha ¡epeje! tessirema tissiaja-  
nitohui. Jororoni jiquejeranihuaji  
tija-jeranitohui –nahi nade Jeso.

**Jesocca marinajapi:**  
–**Ticca amoneje nebomana**  
**tejeraji –najari**

*Mateo 19.9; Maraco 10.11-12;*  
*Roca 16.18*

<sup>31</sup> –Ticcadeni ididenicca marinaja  
timittamanajonajaropi ajima  
najaro: “Maquideje: Occa amoneje  
onebona nadsapa tahide nebohue-  
cca papeo dsodo inadsa ponidsa  
da inadsa inebodsapi pohuadsa  
ima nohuerani” quiquinanade.

<sup>32</sup>Naraha ohuattipi ajima onajaro:  
Ticca amoneje tinebodsapi imasiri  
tinanajaro. Ticca amoneje tinebodsapa  
maquideje ohuaha icajidsapa tijine

poni naqui imasiri inanajaro. Ponicca maqqui icajidsati naco imasiri inanajaro. Diocca dosseniji naqui ecahuamana-jerajaro. Nadsama ohuattipi: ¡Paji! Ticcadeni amoneje nebomana tejeraji, onajaro. Naraha ticca amoneje maqquideje ohuaha inajadsana “Onebona” tadsa tinebodsapi tiadsa ima nohuerani. Ticca amoneje maqquideje ohuaha inajadsapa poni ponijine imasiri inanajaro. Nadsana tineboni oppinera tani –nahi nade Jeso.

**Jesocca marinajapi: –Pajissa  
tiquinadsapi pajissehera  
pajissa tiquinaji –najari**

<sup>33</sup> –Ticcadeni ididenicca marinaja timittamanajonaropi ajima najaro: “Diodsa: ‘Pajissa ajima onanana’ tadsapi timaidsa-jeradsa aji huati tinajarossa tinanaji” quiquinade. <sup>34</sup>Naraha ohuattipi ajima onajaro: “Pajissa ajima onanana” tadsapi ticca pajissehepi tohuatti onihi tadsajani huati tina tejeraji. Madijapa maidsamanadsa: “Pajissa huati onajaro” quinadsapa tohuatti onihi tadsajani inatassaquidsa pina pajissehessa najaro huati toquinaraaha maidsamanajari. Pohuadeni attissa inanamana-jeradsa: “Oppinera tani, Dio onidsa huati onapo-jerade” quinaraha Diopa attideni mittajari. Ajana madija attidenipa: “Occa imapi pajissa, memehujicca nahato tahi” quinahipa bica tejerani. Memehujipi Diocca huihuittari. Diopa mittahi. <sup>35</sup>Madija ohuaha attidenipa: “Occa imapi pajissa, ajijaro namipi nahato tani” quinadsa naco bica tejerani. Namipi Dio amori cabarihijinecca huihuittari bedenissa najaro. Diopa

mittahi. Madija ohuaha attideni onihi naqui: “Occa imapi pajissa, Jerosarepi nahato tani” quinadsa naco bica tejerani. Jerosarepi Diocca Cattaniji, tamine deni tojahicca odsa panani. <sup>36</sup>Madija ohuaha attideni naco: “Occa imapi pajissa, occa nahatohuema huati onajaro” quinaraha pohuadeni attidsa tatideni amadsati tosohuehue nanijinepi ssamo tani. Pohuadeni tatideni amadsati tonopo-po nanijine naqui ssamo tani. <sup>37</sup>Nadsama tiadenipi pajissa tiquinadsa pajissara: “Jehe, pajissa” tiquinaji. Naraha poni tiquinadsa naqui “Jehe, poni” tiquinaji. ¡Epeje! Nema najarora huati tiquinanijine bica tani. Naraha tettidenipi tohuatti onihi tadsajani tinatassaquimana-dsapi bica tejerani. Najaropi pina mamaidsadedeni attidenissa najaro –nahi nade Jeso.

**Jesocca marinajapi: –“Manaco,  
manaco” tiquinejerana –najari**  
*Roca 6.29-30*

<sup>38</sup> –Ticcadeni ididenicca marinaja timittamanajonaropi ajima najaro: “Madija ohuaha-jine tinocco sia tadsapi manacojine tinoco sia tinanadsapa bica tani. Tino naqui. Madija ohuaha-jine tino jai tocanadsapi manacojine tino jai ticananadsa bica tani” quiquinanade. Manaco manacopi nama najonamanajari. <sup>39</sup>Naraha ohuattipi tiadenidsa ajima onajaro: madijapa tiadenidsa tabaccorehe inanadsapi “Manaco” tiquinejeraji. Madija tipano idanidsa naco “Ohuaccone manaco odana” tiquinejerana, onajaro. <sup>40</sup>Madija attipa: “Ohuadsa ima tinanani” nadsa

ima cattedemahuaji tia tohuac-  
 dsam tamine attipa: “Ima tinanajaro  
 manaconi pohuadsa titetepicca da  
 tinaji” nadsapa pohuadsa da tinaji.  
 Titetepicca onihi ssirinijine huatini  
 ccara taraha najaro naqui nema  
 nehe pohuadsa da tinaji, onajaro.  
<sup>41</sup>Nadsama madija naco benehi  
 huaji tani toccahijine tiadsa huati  
 tadsapa: “Jari, ohua acco ticamaji.  
 Ajicca odsa onihidsa ohua tineboji”  
 nadsapa pohua attissa tinanaji.  
 Pohua tinebohuihuaji tineboraha  
 denima pohua accode ticcanijine  
 bica tani, onajaro. <sup>42</sup>Nadsama  
 madija tiadsa: “Jari, ohuadsa  
 manaconi jirehe da taji” nadsapa  
 pohuadsa da tinaji. Madija ohuaha  
 atti naco: “Pohuama ohuadsa da  
 taccajo. Nidsa tiadsa da onanihijine”  
 nadsapi teccocco-jarajo. Pohuadsa  
 da tinaccajo, onajaro –nahi nade  
 Jeso.

**Jesocca marinajapi:**  
 –Tiadeni huadidedeniraha  
 pohuadenidsa tetideni  
 huanacquiri nana –najari

*Roca 6.27-28, 32-36*

<sup>43</sup> –Moisesicca marinaja timitta-  
 manajonajaropi ajima najaro:  
 “Titesedenidsa tetideni huanacquiri  
 nana” quiquinanade. Ticcadeni  
 ididenicca marinaja timittamana-  
 jonajaro naqui: “Tiadeni huadide-  
 denipa manaco ticahidabaquijo”  
 quiquinanajari. <sup>44</sup>Naraha ohuattipi  
 ajima onajaro: Tiadeni huadidedeni-  
 dsam naqui pina tetideni huanacquiri  
 naji. Tiadeni najidsodedenipa Dio  
 pohuadeni bodi acco icamabaquij-  
 hijine Diodsa huati huati tiquinana,  
 onajaro. <sup>45</sup>Nadsana tiadenipi Abi  
 Diocca ejedeni tiquejenani ahuat

tanijine. Dio memehuaji madijaripa  
 bica tajari. Madija huapimadsa huati  
 huana tajari. Bicaquiri najarideni-  
 dsam huati huana tajari, tabaccora-  
 qquiri najaridenidsa naco huati  
 huana tajari. Dio pocca nahatohue  
 majipa Pohuadsa jehe quinajarideni,  
 Pohua Attidsa iboquiri najarideni  
 huapimadsa tossiabajacquiri.  
 Pocca nahatohue passo naqui Dio  
 Pohuajine huapimadsa caji taridsa-  
 jaro. <sup>46</sup>Tiadenidsa ohuatti ajima  
 najaro: Madija tiadenidsa huati-  
 deni huanacquiri najaridenidsara  
 tetideni huanacquiri nani ojari  
 nadsapi pina madija huapimacca  
 imassa tinanamanajaro. Najaro-  
 ssa tinanamanadsapi nidsa memeh-  
 uaji Dio tiadenidsa: “Jehe bica-  
 qquiri tiquinani” najarahitohui.  
 Ajana, imasiri cajimanajarideni  
 pina \*romanodenicca taminecca  
 dosseniji dsinero nanaccadedenipa  
 aja pohuadenidsa huatideni huana-  
 cquiri najaridenidsara huatideni  
 huanacquiri nahi ojari najari.  
 Paji, pohuadenissa tiquinejerana.  
 Tiadenipi tohuati huanehe denima  
 bica tanicca ticajimanadsana bica  
 tani. <sup>47</sup>Nadsama tiadenipi ticcadeni  
 madijadsa tetidsemanadsa: “¿Nija,  
 bica tinaqui?” tiquinaraha madija  
 ohuahadsa: “¿Nija, bica tinaqui?”  
 tiquinejeradsa pina madija ohuaha-  
 denicca madiessa tiquinajaro. Ajana,  
 Diodsa jehe quina-jarajarideni  
 poccadeni madijadsa: “¿Nija, bica  
 tinaqui?” nanaridsamana naraha  
 noccoden jidsa tajaridsapa: “¿Nija,  
 bica tinaqui?” quina-jarahi. Paji,  
 tiadenipi pohuadenissa tiquine-  
 jerana. <sup>48</sup>Ticcadeni Abi Dio memeh-  
 uaji madijaripa pocca tohuati  
 huanehe pajiranissa tajaro. Tiadeni

naqui tinapajiramananissa taji,  
pina ticcadeni Abi Diocca tohuati  
huanehessa tinanamanana, onajaro  
–nahi nade Jeso.

**Jesocca marinajapi:**

–Dio Pohnuadsa ima bicani  
tinanamananijinepi ajima  
tiquinani bica tani –najari

**6**<sup>1</sup> –Pajissara Dio Pohnuadsa  
tidsepedeni ijimanadsa ima  
bicani tinanamanadsapi madija  
qqui toquinahijinera tidsepedeni  
ijimana tejeraji. Madija tiadeni qqui  
toquinadsa attidenipa: “A, tijine-  
deni bica tani. Bicaqquri tiquinani”  
quinahitohuira timadimana tejeraji.  
Paji, attideni nama quinahitohuira  
timadimanadsapi Abi Dio memehuaaji  
madijaripa najaro ima nahato tapoja  
najari. Nidsa dsotode pohua bacco-  
huaji tidomodeni huadsapi: “Tijine-  
deni bica tani. Bicaqquri tiquinani”  
najarahitohui. Pocca daniji bicabote  
naqui tiadenidsa da inejeranitohui,  
onajaro –nahi nade Jeso.

<sup>2</sup> –Nadsama cappiramanajari-  
denidsa manaconi jirehe da tina-  
baqquinijinepi pohnuadenidsa teti  
huana tadsa manaconi jirehe da  
tinabaqquini bica tani. Naraha  
madija tijine bica tani qqui toquina-  
dsa: “A, bica tahi. Pohnuapa cappira-  
manajaridenidsa manaconi jirehe  
da da najari” quinahijine tohuini  
tadsapi bica tejerani, onajaro.  
Attideni nama quinahi tohuini  
tadsapi pina \*maidsajidede rabote-  
denissa tajaro. Pohnuadeni naco  
cappiramanajaridenidsa da da  
quinaraha huatideni huanacquiri  
najarajari. Pohnuadenipa madija  
mittamanahijine jodiodenicca  
Dio Atti mamarihuaji huati huati

toquinajari, amossinihuaji naco  
huati huati toquinajari. Pohnuadeni  
poccadeni imaraha: “Ijine bica  
tani, bicaqquri inani” quiquinana-  
jari. Madija ohuahadeni attidenipa:  
“¡Pajissa! Bicaqquri tiquinani”  
quinahitohuira madimanajari.  
Naraha ohuapi pajissara tiadeni-  
dsa huati onajaro: Najaridenipa  
tahide tohuini quinahicca caji-  
manapodsapa nidsa dsotode Dio  
Pohua baccohuaji domo huadsa  
najaridenidsa Diopa: “Jehe, epejeni.  
Bicaqquri tiquinani” najarahitohui.  
Pocca daniji bicabote naqui da  
inejeranitohui, onajaro. <sup>3</sup>Naraha  
tiapi cappiramanajaridenidsa da  
tinanijinepi ticca ima tecomeraridsa  
tejeraji. Titesse bica tajaridsa naco  
ticca ima huati tina-jejeraji, onajaro.  
<sup>4</sup>Ajina, cappiramanajaridenidsa  
da tinanijinepi madija ohuahadeni  
qqui toquina-jaradsana da tinani  
bica tani, onajaro. Nema tadsapi  
madija ohuahadeni ticca daniji  
nahatoqquri najararaha Abi Diona  
nahato tahi. Nidsa dsotode Dio  
Pohua baccohuaji tedsa tia catidse-  
dsapa: “Jehe, epejeni. Bica tinani”  
nahitohui. Pocca daniji bicabote  
naqui tiadsa da inanitohui, onajaro  
–nahi nade Jeso.

**Jesocca marinajapi: –Diodsa  
huati tiquinanijinepi ajima  
tiquinani bica tani –najari**

*Roca 11.2-4*

<sup>5</sup> –Abi Diodsa huati tiquinanijine  
naqui pina maidsajidede rabote-  
denissa tiquinejeraji, onajaro.  
Najaridenipa Diodsa huatide  
toquejenadsapa pina madija Diodsa  
disseraqquri najarissa quinaraha  
maidsamanajari. Nadsa najarideni

nama quiquinanajaridenipa jodio-  
denicca Dio Atti mamarihuaji domo  
huedsadsa, amossinihuaji domo  
huadsa naco madija ohuahadeni  
mittamanahijine Diodsa huatide  
totoquejena najari. Madija ohuaha-  
deni attidenipa: “A, Diodsa huatide  
disseraqqiri nahi” quinahitohuira  
mamadimana najari. Noccodeni  
jo najonahi quinahitohuira madi-  
manajari. Nadsama ohuapi pajissara  
tiadenidsa huati onajaro: Najari-  
denipa tahide tohuini quinahicca  
cajimanapodsapa nidsa dsotode  
Dio Pohua baccohuaji domo huadsa  
najaridenidsa Diopa: “Jehe, epejeni.  
Bicaqqiri tiquinani” najarahitohui.  
Pocca daniji bicabote naqui da  
inejeranitohui, onajaro. <sup>6</sup>Naraha  
tiapi Abi Diodsa huati tinanijinepi  
“Ohua icattaqquimana-jerana”  
tadsa ticca odsa bodihuaji tiqqe-  
dsima, noccobiji ticahacossa nadsa  
tia motta Diodsa huati tinaji. Nema  
tadsapi madija ohuahadeni ticca  
huatinaja mittamana-jararaha Abi  
Diona mittahi. Nidsa dsotode Dio  
Pohua baccohuaji tedsa tia catidse-  
dsapa: “Jehe, epejeni. Bica tinani”  
nahitohui. Pocca daniji bicabote  
naqui tiadsa da inanitohui, onajaro  
–nahi nade Jeso.

<sup>7</sup> –Diodsa huatide tijadsa naqui  
ticca huatinaja huati tinadsapi  
huati tinajaro, huati timanipoma-  
jaro, huati timanipomajaro tejeraji,  
onajaro. Ajana, Diodsa toque-  
jena-jarajaridenipa nama nama  
quiquinanajari. Tohuini quinahicca  
tohui pohuadeni cacahuade huatide  
toquejenadsapa huati toquinajari,  
huati nimanimana-pomajari, huati  
nimanimana-pomajari quiquinana-  
jari. “Nema inadsa etti mittahijine”

quiquinanaraha pohuama huati  
huati toquinajari. <sup>8</sup>Naraha tiadenipi  
pina pohuadenissa tiquinejerana.  
Diodsa ponima huati huati tiquine-  
jerana, onajaro. Ajina, ticappira-  
mananacca huapima Dio Pohuadsa  
huati tiquinejeraccadsama Pohua  
bodipa nahato tapohui, onajaro  
–nahi nade Jeso.

**Diodsa huati huati  
inanijinecca ima**

*Maraco 11.25-26; Roca 11.1-4*

<sup>9</sup> –Nadsama Diodsa huatide  
tiquejenanijinepi tettidenipi ajima  
tiquinaji:

“Jehe Abi Dio, memehuaji  
timadijaro, Tiadsa iquejena-  
jaropi ticca madija  
iquejenajaro. Tiapi nahatojide  
tijirani ojari tani. ¡Bica tinani!  
Madija huapima: ‘¡Dio, Tiapi  
deni tijani!’ quinana, inajaro.

<sup>10</sup> Ticca cacahuehe huapimadsa  
tinanaridsana, inajaro. Pina  
memehuaji Tiadsa madimana-  
jarideni huapima Tettidsa  
iboraqqiri dsadsanapomana  
najarissa quinahijine aji nami-  
huaji imadijaro ia huapima  
naqui Tettidsa iboraqqiri  
inana, inajaro.

<sup>11</sup> Itapari naco huada huajjiradsa  
iadsa da da tajo.

<sup>12</sup> Madija iadsa tabaccorehe inana-  
manadsa poccadeni tabacco-  
rehedsa: ‘Epejena, huadi  
onejerani’ inadsapi manaco  
icca tabaccorehe epeje tinanaji,  
Abi Dio. Icca tabaccorehe  
manaconi najidsohue iadsa  
tinana-jeraji, inajaro.

<sup>13</sup> Imasiritohui ibodi huatodsas  
naqui najaro tohuini

inejeranijine ia acco  
ticamabaquiji, imasiri  
inana-jeranijine, inajaro.  
Tabaccorehe jinede  
Satana pohuahuaaji ia joca  
todsimanibaquui-jarahijine  
ia tecahuabaquuinissa taji,  
inajaro.

[ Tiana ia huapima tecahua-  
baquui-dsanapojaro. ¡Daco  
tijirani! ¡Bica tinani! ihidsa-  
napo najaro. ] Epejeni.”

<sup>14</sup>Nadsama Jesopa pohuadenidsa  
denima huati tajari: –Jehe, ajina  
madija tiadsa ima inatabaccoradsa  
naqui tiapi: “Najaro imadsa ohuati  
ajimana. Pohuadsa ohuadi-jerana”  
taji. Nema tadsana ticca Abi memehua-  
huaji madijari ticca imasiridsa huati  
ajamahitohui. <sup>15</sup>Naraha madija  
ohuahacca imadsa epeje tejeradsapi  
ticca Abi Dio naco ticca imasiri  
epeje inana-jeranitohui, onajaro  
–nahi nade Jeso.

**Jesocca marinajapi: –Jipehe  
tinebocossamananijinepi ajima  
tiquinani bica tani –najari**

<sup>16</sup> –Diodsa huatide tiquejena-  
nijine jipehe tinebocossamanadsapi  
tipanodeni odsaquiri nejerana,  
pina tipanodeni bica tadsa timadi-  
manana, onajaro. Naraha tipano-  
deni odsaquiri nadsapi pina  
maidsajidede rabotedenissa tiquina-  
rana. Najaridenipa madija ohuaha-  
deni qqui toquinadsa: “A, jipehe  
nebocossamanahi, Diodsa dissera-  
quiri nahi” quinahijine tohuira  
quinadsapa pohuadenijine pohua-  
deni cacahuamanahissa tajara-  
dsapa ocasseraquiri nanaja najari.  
Nadsama pajissara tiadenidsa  
huati onajaro: Najaridenipa madija

attideni tohuira quinadsapa pohua-  
deni tohuini quinahicca tahide  
cajimanapojari. Nadsapa dsotode  
Dio Pohua baccohuaji domo huadsa  
Diopa pohuadenidsa: “Jehe, epejeni.  
Bicaquiri tiquinani” najarahitohui.  
Pocca daniji bicabote pohuadeni-  
dsa da inejeranitohui, onajaro.  
<sup>17</sup>Naraha jipehe tinebocossanijinepi  
tahide tipano ssahua, titati ssiri  
tadsana jipehe tinebocossani bica  
tani. <sup>18</sup>Nadsama jipehe tinebo-  
cossani madija ohuahadeni ssamo-  
quiri naraha Abi Diodsapi ahuato  
tani. Pohuana nahato tajari. Nidsa  
dsotode Pohua baccohuaji tedsa  
Diopa tiadsa: “Epejena, ticca ima  
bica tani” nahitohui. Pocca daniji  
bicabote naqui tiadsa da inanitohui,  
onajaro –nahi nade Jeso.

**–Memehuaaji Dio madihidsa  
ima bicanira tinahapimanana  
–najari Jeso  
Roca 12.33-34**

<sup>19</sup> –Jehe, aji namidsa timadi-  
manaccadsapi tidsepedenitaji  
tinahapimananijine tohuinira  
timadimana tejeraji. Ajina, todsepe-  
taji tinahapimanadsapi poni macca-  
nijine ssari nani caji tani.  
Motapi ponira majatoni caji  
tani. Motapi ponira botedsa  
jadsa tani. Motapi botie toja tani.  
Nema nadsapi tidsepedenitajipi  
jica-ca-ca... nemaneha amossi nani  
caji tani, onajaro. <sup>20</sup>Nadsama aji  
namidsa timadimanani paji nacca-  
dsama Dio Pohua tohuini nahicca  
tohuira timadimanaji, onajaro.  
Memehuaaji aja Dio madihidsana  
ima bicani tiadenidsa tohuapipon-  
ijinepi ajijaro namidsa tidsepedeni  
ihijimana naji. Nema tiquinadsapi

Diocca daniji bicabote tiadenidsa da inanitohui. Najaro Diocca danijipi poni maccanijine ssari nanijine nohuerani. Majatonijine nohuerani. Bobotide botihijine nohuerahi. Paji jicariniijine naqui nohueranitohui, onajaro. <sup>21</sup> Ajina, tiadenipi ajijaro namicca todsepetaji tohui, dsiniro tohuira timadimaneje nadsapi najarodsara tetidseridsamanajaro. Naraha Dio Pohua tohuini nahicca tohuira timadimanadsapi Diocca danijidsana tetidsemananitohui, onajaro –nahi nade Jeso.

**Dio ssiejene  
ibodidsa qqedsimahijine  
bica tani**

*Roca 11.34-36*

<sup>22</sup> –Inoccopi essiredsa pina jojororossa najaro. Inocco bica tadsapi essire ssiajani ijini. Idsepedsa naqui damade nahato inajaro. Emoridsa naqui ccaridsade nahato inajaro. Icca tarabaidsa naqui ipajirajaro. Ibodi huatode naqui nahato inajaro. <sup>23</sup> Naraha inocco dsidsi tajarossa najaro, essire nemanhe issamo tani. Dama inanijine naqui ssamo tani, iccaridsanijine naqui ssamo tani, icca tarabaidsa naqui ssamo tani. Imapi najarossa najaro tibodidenidsa Dio ssiejene toqqedsimadsapi tibodideni ssiajani cajini. Naraha Dio ssiejene toqqedsima-jeradsapi tibodidenidsa pina dsidsini ijiridsajarossa najaro. Aji tiadenipi: “Nahatoququiri inani. Ibodi ssiaja tani” tiquinaraha najaro ssiajanipi occa imassa nejeradsapi ssiajani ticajimana-jerajaro. Dsidsini oppina taniccadsa timadimanajaropaji, onajaro –nahi nade Jeso.

**Diotohui, dsinirotohui  
imadinijine ssamo tani**

*Roca 16.13*

<sup>24</sup> –Jehe, madija pohua dossedepamahadsa dsepe ijihijinepa pajarajarahi. Dossedepamaha cajidsapa ojariadsana huati huana tajari. Pohua attidsana ibora tahitohui. Ohuahadsa ajimani huati huana tadsapa pina pohuadsa jipera tajari-ssa nahitohui. Pohua attidsa ibo tahitohui.

–Madija Diodsa dsepe ijidsapa dsinirotohuira dsepe ijihijine ssamo tahi. Dsinirotohuira huatidsedsapa Diodsa huatidsehijine ssamo tahi. Ima pamehepi Diotohui, dsinirotohui najaripa madihijine ssamo tahi, onajaro –nahi nade Jeso.

**Dio pocca ejedeni  
ecahuabaquijari**

*Roca 12.22-31*

<sup>25</sup> –Nadsama tiadenidsa ohuattipi: Timadimananijinecca ticappiramanani noppineni ticappinamana tejeraji, onajaro. Pina ¿nejecora ojipapadseje? ¿Nejeco dsamatapa ppejenera dse onapadsaja? ¿Nejecora ohuedsapadseje? tiquinejeraji. Najarotohuipi tibodideni huahuatomacca nejerana, onajaro. Icca madipepi dsamatapaha ojari-jarahi. Icca madiena denima bica tajaro. Essire naqui etero edsanijinea ojari-jerani. Essirecca imana denima bica tajaro –nahi nade Jeso. <sup>26</sup> –Ajana, meme abarideni memedsa jahiridsajaripa qqui qqui tiquinani. Najaridenicca imadsa tibodideni huatoma-manaji. Pohuadenipa huidsajacca ppa nahi pperaququiri, huidsajacca ppa nahi

bono poreraquiri nadsapa nidsa dsotode jipamanahijine ppa nahi bono naco odsadsa ecahuamanagerajari. Naraha ticcadeni Abi Dio memehuaiji madijaripa pohuadendisa jipamanahijine da da ihinanajari. Diopa meme abaridenidsa huati huana taraha tiadenidsana denima huati huana tajari. Tiadenidsa naco tijipamananijinecca da da ihinanahitohui. <sup>27</sup>Naraha tiadenipi ¿nejecotohui tibodideni: ¿Denima omadi-dsanapopadseje? tiquinajaro? Najarotohui tibodideni huahuatomacca nadsapi ¿ticcadeni madie denima tinanamananijine nahatoquiri tiquinaqui? ¡Nahatoquiri tiquinejerani! Ponima tibodideni huahuatomacca nejerana, onajaro –nahi nade Jeso.

<sup>28</sup> –Nadsama ima onihi naqui: ¿Nejecotohui etero ticajicamanani noppineni ticappinamanajaro? Najarotohui tibodideni huahuatomacca nejeraji. Jari, qqui tiquinanaja mohue ppata taridsajari. Mohuepa tarabaidsera, huepe picocora, etero ssequiquira taraha ppata taridsadsapa pina etero bicani huedsamanajarissa najari. <sup>29</sup>Ajana, maitta-ccadsama naco Isaraeri potemahidenicca tamine \*Saromopa dsepe ssejide radsapa etero bicani huatini ccara tanicca huedsadsapa bica tataja naraha mohuena denima bicaquiri najari, onajaro. <sup>30</sup> ¡Jaho, ticcadeni jehenijipi badsira tani! ¿Nejecotohui tiadenipi “Dio ia tohuacahua-baqquihi” tiquinejerani? Ajina, dseropi etero huedsanijine cappiraraha Diojine poni mohueni cajidsapi pina etero bicani huedsajarossanani. Dseropi mohueni cajini bica taraha huada huada nadsa dsequeri

nadsapi botta ina tani. Naraha dseropi ajimanicca. Tiadenipi pina aji dserossa tiquinejerani. Diocca cacatidse tabaqqi tiquejenajaro. Nadsama Diopa tedsamananijinecca etero naqui denima tiadenidsa da inanitohui, onajaro –nahi nade Jeso.

<sup>31</sup> –Naraha tiadenipi timadimananijinecca ticappiramanani noppineni ticappinamana tejeraji. Pina ¿nejecora ojipapadseje? ¿Nejeco dsamatapa ppejenera dse onapadsaja? ¿Nejecora ohuedsapadseje? tiquinejerana, onajaro. <sup>32</sup> Diodsa toquejena-jararidenipa nama nama nanaridsamana najari. Poccadeni jijipa tohuira, pohuadeni dsepetaji tohuira bodideni huahuatoma-mana najari. Naraha ticcadeni Abi Dio memehuaiji madijari ticajimanani. Pahuapa ticappiramananicca huapima nanahato najari. <sup>33</sup> Diocca cacahuehecca imadsa tibodideni huatomaridsanijine Dio-tohuira tataridsamana naji. Dio Pohuajipa tahiccadsara tetetidsemana naji, onajaro. Nema tiquinadsana Diojine ticappiramananicca tiadenidsa inaridsanitohui, onajaro –nahi nade Jeso.

<sup>34</sup> –Jehe, titedsejemadenicca huada tahimarini tohui tibodideni huahuatoma-mana nejerana. Pina: “¿Dsemassa nejeco imara tojapadseje?” titiquina nejerana, onajaro. Jidapanacca ssiaja tahimarinira tibodideni huahuatoma-mana nana, onajaro –nahi nade Jeso.

### **Madija ohuahacca ima nattome tiquinejeraji**

*Roca 6.37-38, 41-42*

**7** <sup>1</sup> –Nadsama tiadenidsa ohuattipi: Madija ticattejidsamana tajarajo. Pina madija

ohuahacca ima tiadenidsa bica tejeradsapi: “A, namajide rahi, pocca ima bica tejerani” tiquinejeraji, onajaro. Madijadenidsa tettideni nema tiquinejeradsapi manaco Diopa tiadenidsa: “Ticcadeni ima naquí bica tejerani” najarahitohui. <sup>2</sup>Madija ohuahacca ima tibodidenidsa huatoma-manajaropi pina pocca ima nattome tiquinajarossa najaro. Naraha madija ohuahacca ima nattome tiquinadsapi manaco ticcadeni ima naquí nattome quinanitohui. Madija ohuahadsa tinanamanajarocca imapi manaco tiadenidsa najarossa inanamanitohui, onajaro. <sup>3</sup>Naraha tiadenipi timecotecca madie pina Diocca dossenijissa nejerani qqui tiquinadsa tettidenipi: “A, tijine bica tejerani” titiquina naraha tiadeni naquí imasiri ticajimanani. Nadsama najaro ticcadeni imapi pina timecote noccodsa ahua majiconi huedsani qqui tinajarocca imassa najaro. Timecotedsa: “A, tinoccodsa ahua majiconi huedsaha, tire oninena” taraha tinoccodsa naquí ahua majiconi imeni huedsani. Qqui tinanissa tejerani, tinocco ahuatora tani. <sup>4</sup>Nadsama tiadenipi imasiri ticajimandsapi ¿nejecotohui timecotedsara: “A, tijine bica tejerani. Tia acco ocamana, ticca ima tobicanijine” titiquina naraha tiadenipi tahide ticcadeni imaha tijinedeni tobicapojerajaro? <sup>5</sup>¡Jaho, nema tiquinadsapi pina mamaidsadenissa tiquinajaro! Ticcadeni ima bica tejeradsapi tahide ticcadeni imaha tinabica-manapoji. Nadsana timecote acco ticamamanahijine tipajiramanitohui, onajaro –nahi nade Jeso.

<sup>6</sup> –Tiadenidsa ohuatti oníhi naquí: Madija Dio Atti mittade jiperarquuri najaridenipa pina ettesa, pina porocossa quinajari. Ettesda bica tanicca da tiquinaraha tiadeni cca naja camahitohui. Poroco naco pohuadsa \*perla bica tanicca da tiquinaraha ssamo tadsa ttai ttai inanitohui –nahi nade Jeso.

**Diodsa huatide dissera  
inanijinecca ima**  
*Roca 11.9-13; 6.31*

<sup>7</sup> –Jehe, Abi Diodsa huati huati titiquina naji, onajaro. Dio Pohuadsa huati tiquinadsapi tiadenidsa ticcadeni huatinajassa nehe da inanitohui. Pina tohuini tanicca qquide dissera tinadsapi bacco tinanitohui. Najarossa najarocca Diodsa huatide dissera tinadsapi Pohuapa ticca huatinaja tiadsa inapajiranissa tanitohui. Pina madijacca odsadsa tiqquedsimanijine tohuini tadsa odsa jinededsa huahua tadsapi tiadsa noccobiji icatabojidsanitohui. Najarossa najarocca Diodsa huati huati tiquinadsapi ticcadeni huatinaja mittahi. <sup>8</sup>¡Pajissa! Madija Diodsa huati tadsapa Diopa pohuadsa pocca huatinaja da inanitohui. Madija naco Diodsa huatide dissera tadsapa Dio Pohuajine pocca huatinaja inapajiranissa tanitohui. Madijapa pina Diocca noccobijidsa huahua najarissa nadsa Diopa pohuadsa noccobiji icatabojidsanitohui, onajaro.

<sup>9</sup> –Ajana, madijapa pocca ejedeni pan tohui huati tadsapa ¿pohua bedidsa siba da ina taquí? Nohuerani. Tiadenidsapa madija nama najari nohuerahi. <sup>10</sup>Madija ohuaha naco pocca ejedeni aba tohui huati

tadsapa ¿pohua bedidsa macca da ina taco? Nohuerahi. <sup>11</sup> Tiadenipi tabaccorehe ticajimanaraha ticcadeni ejedenidsa bica tahicca dade nahatoqquiri tiquinani. Nadsapa ticcadeni Abi Dio memehuaji madijari Pohuadsa huati tiquinadsapi tiadenidsa bica tahicca dade denima jipa tahi, onajaro –nahi nade Jeso.

<sup>12</sup> –Jehe, nadsama tiadenidsa madija huapima ima bicanira inanamananjine tohuini tiquinadsapi madija huapimadsa naqui ima bicanira titinanamana naji, onajaro. Nema tiquinadsana Dio Atti tecahuamananissa tajaro. Aji Moisesicca marinajassa tinamanajaro, Dio Atti cacomeraqquiri najaridenicca dsodoniji naqui najarossa tinamanajaro, onajaro –nahi nade Jeso.

### **Jahui pamanicca ima**

*Roca 13.24*

<sup>13</sup> –Diocca cacahuehedsa tiquejenanjinepi ohuadsa jehe tiquinanissa taji. Pina noccobiji tojera tanihuaji jai tijedsimajarossa tiquinaji. Madijapa ohuadsa jehe quina-jarajidenipa pina noccobiji toja tanihuaji jai tojedsimajarissa quinajari. Pina jahui imeni toccade najora tanihuaji jai tojararissa quinajari. Naraha najaro jahuipi najidsohue jiquejeranihuaji toccajaro. Nahihuajina madija huemaha toquejenajari. <sup>14</sup> Naraha madija ohuadsa jehe quinahissa tajaridenipa noccobiji tojera tanihuaji jai tojedsimajari. Pina jahui bedenihuaji jai tojararissa quinajari. Najaro jahuihuaji jai tojadsa Diocca cacahuehedsa bacco toquinadsapa camittehe jiquejeranica cajimanahitohui. Nahihuajipa

madija pamadema dsanapojari –nahi nade Jeso.

### **Ahua bono tahimari**

*Roca 6.43-44*

<sup>15</sup> –Jehe, tiadenidsa ohuattipi: Paji, madija mamaidsadedeni tiadeni tocamaiidsabaqquihijine bacco toquinahitohui. “Dio tahimari ecomeraridsajaro” quinaraha maidsamanajari. Pohuadenipa pina edede joneqquiri najarissa quinaraha bodidenipa pina dsomaji oppinabotessa quinajari. <sup>16</sup> Poccadeni madie tinoccodenidsa qqui tiquinadsa ima bicani inanamana-jeradsapi nahatoqquiri tiquinanjine: mamaidsadedeni quejenajari. Ajina ¿cotihidsa uva bono pore pore quinaco? Nohuerahi. ¿Jessi ininedsa naco iquiera bono pore pore quinaco? Nohuerahi. <sup>17</sup> Ahua ede bica tadsapa bono naco bica taha cahua tahi. Naraha ahua ede bica tajaradsapa bono naco tabaccora taha cahua tahi. <sup>18</sup> Ahua ede bicahidsapa bono tabaccora taha cahua-jarajari. Ahua ede tabaccora tadsapa bono bica taha cahua-jarajari. <sup>19</sup> Ahua huapimapa bono bicahi cappiraridsa-manadsapa ca ippiridsamanadsa botta quinajari. <sup>20</sup> Aji madijacca ima naqui pina ahua bonocca imassa najaro. Madijapa: “Dio tahimari ecomeraridsajaro” quinaraha ima bicani inanamana-jeradsapi mamaidsadedeni quejenajari nahatoqquiri tiquinani –nahi nade Jeso.

### **Madija motapa Diocca cacahuehehuaji jai tojamacossa-jarahitohui**

*Roca 13.25-27*

<sup>21</sup> –Madijapa ohuadsa attideni: “Ohua Medsede” quiquinanahi huapi

taraha motapa Diocca cacahuehe-huaji jai tojedsima-jarahitohui. Occa Abi Dio memehuaji madijari Pohua tohuini nahiccara inanamajarodenina Diocca cacahuehehuaji jai tojedsimahitohui, onajaro. <sup>22</sup>Nadsapa nidsa madija huapimacca ima Dio icattemanijinecca huada bacco tadsapi ohuattidsa iboqquri najarideni ohuadsa ajama quinahitohui: “Ohua Medsede, ticca ima huapimapi ohohuacomeraridsa nadija. Tia oni hua onadsa naqui madija bodidenicca tocorimedeni dosse dosse ohoninebaqqi nadija. Tia oni hua onadsa naqui qqui toquinapo-jarajaricca ocanahatori canani huapi tadija” quinahitohui. Naraha najaridenipa Diocca cacahuehehuaji jai tojedsima-jarahitohui, onajaro. <sup>23</sup>Jehe, nidsa dsotode najarideni motadsa ohuattipi: Tiadenidsa onocco jidsa tani. Occa madija tiquejena-gerani. Dio Attidsa iboqquri tiquinadsapi Pohua tohuini nahicca tinanamana-gerajaro. ¡Aji ohuadsapi huajiji tinaji! onanitohui –nahi nade Jeso.

### **Odsa capamajarocca ima**

*Maraco 1.22; Roca 6.47-49*

<sup>24</sup> –Madija ohuatti mittamanadsa ohuattissa inanamajaropini pina aja madija pocca odsa nahatode nahato tajarissa quinajari. Madijapa pocca odsa icanahatodsapi nami ccara tanihuaji bacco tadsana huehuema ppa idsajaro. Nadsapi odsa daco cajirajaro. <sup>25</sup>Nadsapi passo cca, hueni cappanima, passo toqqemoja, jojode jadsirema jo jo nadsapi odsadsa ssonari ssonari naraha toquehedimajerajaro. Odsa toquehedima-jerajaropini huehuema nami ccara tanihuaji bacco teje najaro. <sup>26</sup>Naraha

madija ohuatti mittamanaraha ohuattissa inanamana-gerajaropini pina aja madija pocca odsa nahatode ssamo tajarissa quinajari. Najari madijapa pocca odsa icanahatodsapi nami ccara tanihuaji bacco tejeradsapi huehuema ssiqui daco nanidsara ppa idsajaro. <sup>27</sup>Nadsapi passo cca, hueni cappanima, passo toqqemoja, jojode jadsirema jo jo neje nadsapi odsa toquehedimajaro. Odsa toquehedimadsapi catirorijarossa najaro –nahi nade Jeso.

<sup>28</sup>Nadsama Jeso iadsa huati huati taha jicadsapa nahidsa madija huapima taharibobo canajari bodidenipa: –A, pocca marinaja bica taha –quinade. <sup>29</sup>Jeso pocca marinaja mari icanabaqqidsapa pohuana nahatojide rajari, atti caji tajaria. Aja jodiodenicca marinaja maridedeni attissa najarajari.

### **Huapi jadsimarohi Jeso inanomijari**

*Maraco 1.40-45; Roca 5.12-16*

**8** <sup>1</sup>Jeso ssonohuaji madija mari icanabaquua jicadsa qqe-dsippanidsapa madija huapi taha Jeso natti jahidsippanijari. <sup>2</sup>Huapima jahidsippaninaja madija dsamacoma onini \*leprajine huapi jadsimarohi Jesohuaji bacco najonajari. Pohua bodipa: –Jesopa deni tojahi, ohuapi ajimani ojani –nadsa Jeso baccuhuaji pohua pitods huiitta nadsa huati tajari: –Ohua Medsede, ohuapi bica onejeraraha tia jipa tinadsapi ohua tinanabicaniijine nahato tinani –nahi nade Jesodsas. <sup>3</sup>Nadsapa Jeso pohua dsepedsa bara inadsa: –Jehe, jipa onani. Tibicaji, onajaro –nahi nade Jeso. Nanaja amadsati pohua huapicca

tomossissi nadsapa tobicajari.

<sup>4</sup>Nadsapa pohnadsa Jeso attipa: –Aji tibicanicca ima madijadenidsa huati taridsa tejerana –najari. –Naraha Diodsa dada toqquimahuajina ticcaji, onajaro. Nanidsa tiqquedsimadsapi dada toqquimade ojariadsara tepi tobicani tia nohue tinaji. Nadsapi ticca dsamacoma Diodsa \*oppina tanicca tomossidsapi ticca daniji Diodsa tojanijine ohuaha ohuaha naha pina edede, ppiriri, oqui najari da da tidsimana. Pina Moisesicca marinajadsa iboraquiri inajarossa tinanaji, onajaro. Nadsapi huapimadsa ticca ima toppinerani ahuato tadsapi: “Pajissa tibicajaro” quinahijine, onajaro –nahi nade Jeso.

**Romanodenicca soldado  
dossedecca medse Jeso  
inanomijari  
Roca 7.1-10**

<sup>5</sup>Nahi dsotode Jesopa odsa panani Capernaohuaji bacco tanidsapa romanodenicca soldado dossede Jesodsa ccajonajari. Aja ccajonajaripa pocca dodosse tabaqqi 100 quinajari. Pohna bodipa: –Jeso ohua acco camahijine –nadsa Jesodsa huati tajari. <sup>6</sup>–Ohua Medsede, occa medsepa occa odsahuaji coma taha porijari. Comene dacoradsa ssomi tojamarodsapa poripaja –najari.

<sup>7</sup>Nadsapa Jeso: –Jehe, onanomi-hijine nani occana –najari. <sup>8</sup>Naraha soldado dossede attipa: –Jehe ohua Medsede, tiapi nahatojide tijirani naraha ohuapi ajimani, ssamo onani. Occa odsahuaji ticcanijine jiperata tinatide, onajaro. Naraha ajidsa huati tinadsapi nani occa odsahuajiccaraha, occa medse tettidsa tinanomi-hijine tipajirani nahato onani –najari

nade. <sup>9</sup>–Aji ohua naqui occa taminecca dossenijidsa omadijaro. Manaco soldadodenipa occa dossenijidsa madimanajari. Pohnadenitohui huahua onadsapi jahijona tahi. Dosse dosse onadsa naco ohuattidsa jai toja tahi. Occa medsedsa naqui: “Tidsepe ijiji” onadsa naqui pina aji odossejaro-sa inana tani. Nema nadsapi ajidsa huati tinadsa occa medse tonomihijine tipajirani, onajaro –nahi nade soldadodeni dossede atti.

<sup>10</sup>Najaro ima Jeso mittadsapa huatidsedsa pohna bodi: –A, pohnapa nahato taha –najari. Nadsapa pohna nattihuaji jahimissajaridenidsa huati tajari: –Ohuapi pajissara tiadenidsa huati onana: ¡Ajajari bodi namanahapa pajissa nahissa tajari! Tiadeni Isaraeri potemahideni huapimapi tettideni ohomitta naraha ajararissa najari tiadenidsapa nohuerahi. Pajissa tiquinanissa tani ohomitta nejnerani –nahi nade Jeso. <sup>11</sup>–Naraha ohuattipi tiadenidsa: Jehe, dsama nemanehedsa madiridsamanajarideni motapa Isaraerideni quejena-jararaha ohuadsa pajissa quinajaridenipa nidsa Diocca ejete jipaqqiue imeni tojadsapi nahidsapa huapima jipaqqimanahijine jahijonahitohui. Ticcadeni idideni Abarahao, Isahaca, \*Jacobonajarideni tedseje pohnadeni naco nani memehuaji Dio pocca cacahuehehuaji pohnadeni naco jipaqqimanahitohui, onajaro. <sup>12</sup>Diopa pocca cacahuehe memehujicca Abarahao potemahi Isaraeridenidsa tojanijine inanajorapora ohuadsa pajissa quina-jaradsapa Dio amossinihuaji hua ininebaqquihitohui. Dsidsinidsa toquejenadsa ocasserani ahuamandsanapodsapa panodeni todsahi

nadsa oji oji quinahitohui, onajaro  
–nahi nade Jeso.

<sup>13</sup>Nadsama romanodenicca soldado  
dossededsa Jesopa: –¡Jehe, epejena!  
Tiapi tibodi pajissa tanissa tadsapi  
ticca odsahuaji ticcanina. Nani bacco  
tinanidsapi tibodi tohuini tanicca  
tiadsa onanani qqui tinanitohui  
–nahi nade Jeso. Nanaja huati huati  
toquinaraha soldado dossede pocca  
odsahuaji pocca medse amadsati  
tonomijari quinade.

**Jesopa Pedro massodini  
inanomijaro**

*Maraco 1.29-31; Roca 4.38-39*

<sup>14</sup>Jeso Pedrocca odsahuaji toqqe-  
dsimadsapa Pedro massodini pori  
canani Jeso qqui tajari. Coma tajaro,  
huapini pporajararo. <sup>15</sup>Nadsapa  
Jeso poni dsapanidsa bara nadsapa  
huapini tonahuihui najaro. Nadsapi  
totehemadsa Jeso pocca mamari  
tabaqquima inajipabaqqujari.

**Jesopa comaqquiri najarideni  
inanomiridsa-baqqujari**

*Maraco 1.32-34; Roca 4.40-41*

<sup>16</sup>Jehe, dsomeme nadsapi madija  
bodidenidsa \*Satanacca dodosse  
tocorime cajimanajarideni Jesohuaji  
eccajonabaqqujari. Najaridenipa huapi  
taraha Jeso pohua attidsara tocorime  
dosse ininebaqquidsapa jahininejari  
nade. Comaqquiri najarideni naco  
huapima inanomiridsajari nade. <sup>17</sup>Aji  
Jesojine nema najaropi pina tahide Dio  
Atti cacomerabote Isahia itedsejema-  
cca ima ecomerapojarossa inanajaro.  
Najaroa aji: –Pohuana icca comani  
onihni onihni naridsajaro idiridsajaro.  
Icca dsamacoma naqui idiridsadsa  
pohuadsa tojadsapi inajicanitohui  
–napohui nade Isahia.

**Madija Jeso huatimade  
toquejenahijineraha**

*Roca 9.57-62*

<sup>18</sup>Nadsapa Jeso madija pohuadsa  
queriqquijonahi tohuapihi nahi qqui  
tadsapa pohua huatimadedenidsa:  
–Jina, coridsa jippehuaji jajjana  
–nahi nade.

<sup>19</sup>Nadsapa jai tojabote naraha jodio-  
denicca marinaja maride Jesohuaji  
ccajonadsapa: –Nija ohua Maride  
–najari. –Aji ticcaridsadsama ohua  
naqui tiadsa occana, onajaro –nahi  
nade. <sup>20</sup>Naraha Jesopa pohuadsa  
huati tajari: –Ohuadsa ticcaridsa-  
nijine tipajira-jeranitide. Ajana  
dsohuadsahuapa odinedeni cajiridsa-  
manahi. Ppiriri naco tadsarideni caji-  
ridsamanahi. Aji ohua \*Madija Bedipi  
odsa ocappirani. Ohuadanijinecca  
huahuada ocappirani –nade.

<sup>21</sup>Nadsapa Jesocca mamari ojariapa  
Jesodsa huati tajari: –Ohua Medsede,  
occa abi huatiahi ppa odsahijine  
tahide occa odsahuaji occanipocana.  
Nidsa dsotodena tiadsa occaridsa-  
nijine ¿jehe taqui? –nahi nade.

<sup>22</sup>Naraha Jeso pohuadsa huati tajari:  
–¡Poni! Jidapana ohuadsa ticcaji  
–najari. –Aja madijapa Diocca  
camittehe cappiramanajarideni caji  
tahi. Pohuadenina madija dsoque-  
dsa ppa idsamanahijine pajiramanahi  
–nahi nade Jeso pocca mamaridsa.

**Jesopa jojode inatappa  
ssodadani inatappa nanicca ima**

*Maraco 4.35-41; Roca 8.22-25*

<sup>23</sup>Nadsapa Jeso canoadsa toqqe-  
dsadsa pocca mamari tabaqqui naco  
pohuadsa jai tojedsadsa pohuadsa  
jai tojajari. <sup>24</sup>Nadsapa ori toquina-  
raha amadsati jojode dacorehema

ccajona, passo dacorehema ccajona nadsapi coridsa ssoda ssoda najaro-jine canoadsa passo ssonidsa ssonidsa najaro. Naraha Jesopa huadaja dsanapojari. <sup>25</sup>Nadsapa Jeso huadahihuaji jai tojeppidsa Jeso cobo cobo quinadsa: –¡Ia Medsede, nocco tijaji! ¡Ia acco ticamabaquiji! ¡Je icanabote nani! –quinahi nade.

<sup>26</sup>Nadsapa Jeso pohuadenidsa huati tajari: –¿Nejecotohui ticappinamanajaro? Tiadenipi ohuadsa: “Jehe, Jesopa ia tohuacahua-baquihijine pajirahi” ¿tiquenejerarorane? –nahi nade. Nadsapa totehemadsa jojode-  
ds, passods a huati tajari: –¡Epeje taji! –nahi nade. Nadsapi jojode, passo ssoda ssoda najaro naqui joma najaro. Joma nadsapi passo podsippa-nissa tajaro. <sup>27</sup>Nadsapa pocca mamari tabaqqi huapima: –A ¿nejeco madija? Ajina, jojode passo ssodadani tadsajani pohua attidsa ibora taha –quinahi nade.

**Cadarahuajicca madija  
bodidenidsa Satanacca  
dodosse tabaqqi tocorimedeni  
madidsamanajari**


*Maraco 5.1-20; Roca 8.26-39*

<sup>28</sup>Nadsapa coridsa jippehuaji bacco tajari Jeso. Najaro dsama

arobeni oninipi Cadara. Nahihuaji madija pamahapa tonoccobirihuaji mamadimana najari. Najarideni madija bodidenidsapa Satanacca dodosse tabaqqi tocorimedeni madidsamanajarijine huadidi tajari. Nadsapa nahi Cadarahuajicca madija huapimapa tocorime cajimanajarideni noppine cacappinamana nadsa tonoccobirihuajicca jahui jajahi toja najarajari. Naraha Jeso toquemoradsapa pohuadeni pamaha tonoccobirihuaji huadajonajari, Jesods bacco quinajari. <sup>29</sup>Nadsapa Jeso qqui toquinadsapa jadsirema huati huati toquinajari: –Dio Bedi ¿nejecotohuira ticcajonajaro? ¿Ia najidsode ticcajonajaroqui? Dio ia tonajidso-baquihijinecca huada bacco tejeraccaraha –quinahi nade.

<sup>30</sup>Naraha nahi huajira tanidsa poroco huapi taha jiparidsamanajari. <sup>31</sup>Nadsapa Jesods tocorime attidenia: –¡Jaho! Ia dosse tininebaquidsapi poroco bodidenidsara ia dosse tidsimabaquiji –quinahi nade Jesods.

<sup>32</sup>Nadsapa Jeso: –¡Jehe, porocods a tiquejenana! –nahi nade. Nadsapa madija bodidenicca tocorime jahininedsapa



porocodsana jai tojedsimaridsajari. Nanaja poroco huapimapa coridsa inidi sseberanihuaji domo toqqe-dsippadsa diri-ri-ri todsippadsapa cojo-jo-jo quinajari. Tocatojedsippajari. Je tocaniredsapa coridsadsa cacotedsanajari.

<sup>33</sup>Nadsapa poroco cacahuadedeni qqui toquinadsa odsa pananihuaji domo toccanijari. Bacco tanimanadsapa ima huapima huati naridsamanajari: –¡Tonoccobirihuaji madimanajarideni bodidenicca tocorimedeni Jesojine jahininpaja! –naridsamanahi nade. <sup>34</sup>Nadsapanani odsa pananicca madija huapima Jeso qquide jahijonajari. Bacco najonamanadsapa poccadeni dsamadsa Jeso toccanijine dossede dissassera tajari: –¡Ticcaniji, aji icca dsamadsapitimidatejeraji! –quinahi nade.

**Jesopa madija ssomi tojahi inabiquemanijari**

*Maraco 2.1-12; Roca 5.17-26*

**9** <sup>1</sup>Nadsapacanoadsajaitojedsanidsapacoridsajippehuajipohuadenedori najonamanapohuihuajiori tanimanadsahuana tocananimana-pomajari. Jesopohuamamadinahi Capernaohuajibaccotanimanajarinade. <sup>2</sup>Narahanahihuajipamadijaidetone biqueradsaisso ssomitohajipohuataborodsapordisa Jesodsa eccajonamanajari. Jesopohuatohuidisseraqquirinahiqqui tadsapapohua bodidsanahato tajari: –Pajissa, Jesopamadijananomihijine nahotahi –quinahi Jesopohuadsahuatoadsapi comatajaridsahuati tajari: –Otesse, ¡ticappina-jeraji! Aji imasiritinanajaro huapimapi

onanamossini. Jidapapiticca ima Diodsa tobicani –najarinade.

<sup>3</sup>Jesoatti namanadsapajodidenediccamarinajamaridedenimotamittamanadsapapohuadenedisseeje cosseri najari: –Apaja, Jesopa: “Imasironanamossina” naha. Pohua attipa: “Ohuapi pina Dio ojani” nanajanajari-ssanaha. ¡Jesocaimapibicatejerani, pina Dio itamassojarissanahi! –quinahinade. <sup>4</sup>Naraha Jesopohuadenedibodidenicca imanahato tadsapapohuadenedisahuati tajari: –¿Nejecotohui ohuadsa ima tabaccora taniccaratibodideni huatomanajaro? –nahinade. <sup>5</sup>–Naraha ¿nejecomanajaromana tiadenidsadenimanajoratanitani? Ajamadijacomatajaricca imasironanamossini ¿najorataqui? Comatajaronanabicahina ¿denimanajoratajarorane? <sup>6</sup>Naraha ohua \*Madija Bedi oजारopi madijacca imasironanamossinijine Dioccadacorehe ocajini nahatoqquiritiquinanijinepi, aji namidsanaquihuatitocajini nahatoqquiritiquinanijine comatajaridsahuati onana –najari. Nadsapamadijassomitohajidsapohua attipa: –¡Titehemaji! ¡Titaborotididsaticca odsahuajiticaniji! –nahinade Jeso.

<sup>7</sup>Nadsapatotehemadsapocca odsahuajitoccanijarinade.

<sup>8</sup>Nadsamamadijassomitohajitonomihimadijahuapimaqquitoquinadsapacappinamanarahuatidsemanadsa: –A ¡Diopa bica tahi, bica tahi! –quinajari. –Dio poccadacorehemadijanamihuajimadijaridsainanani qqui inani –quinahinade.

**Ohua onipi Mateo. Otohui Jeso  
huahua najari**

*Maraco 2.13-17; Roca 5.27-32*

<sup>9</sup>Nadsama Jeso jahui ccajonadsa ohua qqui tajari. Ohuapi Mateo. Ohuapi \*romanodenicca taminecca dosseniji dsiniro nanaccade ojarode. Nahi romanodenidsa dsiniro da taniijine ihinaccamana nanihuajicca odsa bedeni bodidsa ohuittidsaraha Jeso ohuadsa huati tajari: –Jina, ohuadsa ticcaji –nade. Nadsapi otehemadsa pohuadsa occajarode.

<sup>10</sup>Nahi dsotode occa odsahuaji ijipanijine huahuanaridsa jassi inahuajanidsapi nahidsa Jeso qquide jahidsimajari. Otesседeni romanodenicca taminecca dosseniji dsiniro nanaccadedeni huapima naco jahidsimajari. Jodiodenicca marinaja ecahuamana-jerajarodeni naco iadsama jassi nahuajanijari. Jeso pohua huatimadedeni ia naqui pohuadeni tedseje jipade iquejenajaro. <sup>11</sup>Naraha jodiodeni mota marinaja pariseodsas jehe quinajaridenipa madija bicaququiri najarajarideni tedseje ijipani qqui toquinajari. Najaro imadsa jiperaququiri nadsapa iadsa huati toquinajaride: –A ¿nejecotohui tiadeni maridepa romanodenicca taminecca dosseniji dsiniro nanaccadedeni tedseje, imasiri cajimanajarideni tedseje jipajari? –quinade. (Aja madija nama najarideni tedsejepa jipade \*oppinata ni quiquinanajari, pariseodeni, jodiodenicca marinaja maridedeni tedseje.)

<sup>12</sup>Naraha pohuadeni attideni mittadsa manaco Jeso huati tajari:

–Nomiqquri najaridenipa toponi totonanomide tohuini quina-jararaha comaququiri najaridenina toponi totonanomide tohuini quiquinanajari –nade. –Ohuapi pina toponi totonanomidessa onajaro. Madijadenicca ima Diosda tobicanijine pohuadeni accode occajonajarode. <sup>13</sup>Naraha madijapa: “Iapi bicaququiri inani” quiquina-najaridenicca ima onanabicanijine occajona-jerajaro. Imasiri totonanadedenicca ima onanabicanijinena occajonajaro. Jari, ajijaro ima ticahatteraji. Maittaccadsama Dio Atti cacomerabote Osea dsodo inajaro:

“Tohuati huanehe, acco camehe tohuini onani. Moisesicca marinajassa tinanamanadsapi ohuadsa ticcadeni \*bani bedi ono tojahijine da da titiquina naraha madija ohuahadsa tetideni huaneraququiri nadsapi ticcadeni daniji jipera onani. Madija huapimadsa tetideni huanaququiri nanijinena jipa onani. Pohuadeni acco ticamabaququimanadsa naco jipa onani” napohui nade Dio –nade Jeso.

**Jesodsas jipehe nebocossanicca  
ima huati toquinajari**

*Maraco 2.18-22; Roca 5.33-39*

<sup>14</sup>Nadsapa Huano Baotistacca \*mamari tabaqqui Jesohuaji bacco najonamanadsapa pohuadsa huati toquinajari: –Nija. Iapi Diossara huati huati idsanaponijine jipehe ihinebocossa nani. Jodiodeni marinaja pariseodsas jehe quinajarideni naco jipehe nenebocossamana naraha ¿nejecotohui ticca

mamari tabaqqi tedsejedeni jipehe titinebocossamana nejerajaro?

–quinade.

<sup>15</sup>Nadsapa Jeso pohuadenidsa huati tajari: –Dsabissopa amoneje cajibote najari pocca ejete tojadsapi ¿pohuadsa queriqquimanajarideni huatidsemanera taco? Huatidsemana tahi. Dsabisso cajibote najari tedseje huatidsemanadsapa jipehe nebocossamana-jarajari. Naraha nidsa huada onihiccadsa madija ohuahadeni dsabisso cajibote najari inanadsoqqe-manahijine pohua iaccamanadsapa pohua tessedenipa jipehe nebocossamanahitohui –nade Jeso. (Aja pohua atti nama najaripa pohuapa pina dsabisso cajibote najari. Jeso pohuadenidsa madiccadsapa pohua huatimadedeni jipehe nenebocossamana najaraccajari, najari.)

<sup>16</sup>–Ima onihi naqui ajima najaro: Etero ssessequidenipi etero jadanidsapi etero dsati ihibedsacossamana nejerajaro. Etero dsatipi etero jadanidsa podsacossadsa dsotode ssabo nadsapi joca naqqi tani. Nadsa etero jadani sseo tapomadsapi denima totabaccora tani –nade Jeso. (Aja pohua atti nama najaripa pocca marinaja pina jodiodenicca marinajassa nejerani. Jeso pocca marinajapi dsati.)

<sup>17</sup>–Ima onihi naqui ajima najaro: Uva ppejene nahatodsatipa bani etero ssequi nahi jadahidsa sso sso ihidsamana najarajari. Uva ppejene nahatodsatipa bani etero jadahidsa sso todsadsa sscatadsapa jocaquera tajarijine sseo tahi caji tahi. Sseo tadsapa uva ppejene sso taha jica tahi, dsamine naco totabaccoradsapa coro quina tahi.

Naraha uva ppejene dsatipa bani etero ssequi nahi dsatidsara sso sso totdsa nadsana uva ppejenepa ecahuahissa tajari. Aja dsamine naco totabaccora-jarajari –nade Jeso. (Aja pohua atti nama najaripa madija bodi dsati tojadsana Jesocca marinaja dsati ecahuanijine pajirahi, najari.)

**Jairo bedeni tonominicca ima,  
Amoneje amaissoranjaja coma  
taraha tonominicca ima**  
*Maraco 5.21-43; Roca 8.40-56*

<sup>18</sup>Jesopa pohuadeni atti ecomeradsanapodsapi jodiodenicca Dio Atti mamarihuaicca tamine Jesodsa huati tahijine ccajonajari. Jeso-huaji bacco najonadsapa pohua bodi: –Jesopa deni tojahi, ohuapi ajimani ojani –nadsa Jeso baccuhuaji pohua pitodsa huitta tocattedsa najari. Nadsapa Jesodsa huati tajari: –Occa ejedeni huatiapaja. Occa odsahuaji ticcadsa tidsepedsa poni bara tadsa tijine camittemanidsa madipomanijine –najari. <sup>19</sup>Nadsapa Jeso pocca mamari tabaqqi tedseje pohua natti jai tojamissajari.

<sup>20-21</sup>Naraha jahuidsas amoneje coma tajaro Jeso toccahi qqii tajaro. Ponipi dsamacoma onini amaissoranjaja cajijaro. Poni coma tanicca huajanopa 12 naraha amajicaquera tanicca tonahanajonajaro. Nadsapi Jeso qqii tadsa poni bodinipi: –Jehe, pocca eterora bara onadsapi onominitohui –najaro. Nadsama Jeso nattihuaji toccamissadsa tohuajiressissi nadsa pocca etero iponi bara inajaro. <sup>22</sup>Nadsapa Jeso piti nahuajanidsa qqii taneje amoneje coma tajaro

qqui tajari. Qqui tadsapa: –Asi, ticappina tejeraji. Tibodipi ohuadsa: “Jehe, Jeso ohua tonanomihijine pajirahi” tadsapi najarojine jidapapi ticca dsamacoma toccapa –najari Jeso. Nadsapi amadsati amani totappadsapi tonomijaro.

<sup>23</sup>Nadsapa denima tossoniquimamana dsanapodsapa jodiodenicca Dio Atti mamarihuajicca tamine tadsarihuaji Jeso bacco tajari. Bacco tadsapa madija toqueriqquihi qqui tajari. Ejedeni ppa todsanijine najoramanadsa torededeni tore tore quinajari, madija motapa jadsirema oji oji camajari, motapa johua johua camajari. <sup>24</sup>Naraha Jeso attipa: –¡Jari, huapima ajijaro odsacca jai tijenaji! Ejedenipi dsoqqe-jerani. Huadajaro –najari. Naraha pohuadenipa Jeso atti jaja icanamanajari.

<sup>25</sup>Naraha pohuapa madija dosse ininebaquidsa Jeso toqquedsimajari. Toqquedsimadsa ejedeni poni dsapani equidi nadsa tothemajaro. <sup>26</sup>Nadsapa najaro dsama arobenihuaji madimanajarideni huapima mittaridsamanajari. Ejedeni camittermaninicca ima tojaribaquiridsajarode.

**Nocco siri pamaha noccodeni ssire tocanirejaricca ima**

<sup>27</sup>Jesopa ejedenicca odsadsa qqenadsapa tocanijari. Toccani toccani nanaja nocco siri pamaha Jeso natti tohuedamissajari. Tohuedamissadsa huahua tamissamanajari: –¡\*Dabi Potemahi! ¡Iadsa teti huana taji inaha! –tamissamanajari.

<sup>28</sup>Nadsapa Jeso odsa bacco tadsapa toqquedsimajari. Naraha

nocco siri pamaha huedajonajaripa Jesodsa tohuajiressimanadsa Jeso pohuadenidsa huati tajari: –Jari, ohuadsa tibodidenipi ¿nejecoma tiquinani? “Ia tonanomibaquihijine pajirajari” ¿tiquinajaroqui? –nade. Nadsapa: –Jehe ia Medsede, ia tinanomibaquiniijine nahato tinani, inajaro –quinade.

<sup>29</sup>Nadsapa nocco siri pamaha nocco bara inabaquidsa Jesopa: –Jehe, ohuadsa pajissa tiquina-dsapi tinoccodeni ssire tanitohui –nade. <sup>30</sup>Jeso atti nama nadsapa nocco siri pamaha noccodeni ssire tocanirejari. Nadsapa Jeso pohuadenidsa huati tajari: –¡Paji, ajijaro imapi madijadenidsa tecomamanaji! –nade. <sup>31</sup>Naraha tohuedanidsapa pohuadeni cacomamana-jarajari. Poccadeni ima ecomeraridsa-manajaro. Najaro dsama arobenihuaji madimanajarideni huapima –Jeso nocco siri pamaha inanomibaquijari –ima mittaridsamanajari nade.

**Ebeno siri ebeno tobicahicca ima**

*Mateo 12.22-24; Roca 11.14-15*

<sup>32</sup>Nocco siri pamaha tocanomire-dsa tohuedaniraha manaco ebeno siri eccajonamanajari. Pohua bodidsapa \*Satanacca dodosse tocorime madidsajarijine atti cappirajari.

<sup>33</sup>Naraha Jeso pohua bodicca dosse ininedsapa ebeno biquemanidsapa atti cajipomajari. Nadsapa madija huapima qqui toquinadsapa: –A, bica tahi. ¡Jesopa nahato tahi! –quinajari. Attideni naco: –Aji ia Isaraeri potemahi icca dsamadsa nama nahi qqui qqui inapo-jaraccade –quinade. <sup>34</sup>Naraha jodiodeni mota marinaja pariseodsa jehe

quinajarideni attidenia: –Ajana, Jesopa tocorimedenicca tamine Satanacca dacorehe cajijarijinea pocca dodosse tabaqqui dosse ininebaqqujaripaja –quinaraha maidsa-manajaride.

**Jesopa dsama huapimacca  
madijadsa huati  
cahanari canajari**

<sup>35</sup>Nadsama Jesopa odsa panani onihi, onihi naridsajarodsa, odsa capamema najaro onihi, onihi naridsajarodsa bacco bacco naridsa nadsapa poccadeni Dio Atti mamarihuaji mari mari nanaridsa najari. Jesopa Diocca cacahuehecca ima bicani mari mari nanaridsa najari. Comani onihi, onihi cajiridsamanajarideni naco ihinanomi-baqquiridsa najari. <sup>36</sup>Jeso madija pohuatohui jahijonana canahi qqui inabaqquidsapa pohuadenipa pina edede pohuadeni cacahuade jiraha pohuama mamadiri naridsamanajarissa quinajari. Nama quinadsapa Jeso pohua bodidsa: –A, tohuati nahanaqquri nahi –nadsa pohuadenitohui huati cahanariri canaridsajari. Madija huapimapa pohuadeni acco camade, pohuadeni maride cappiramanadsapa pina edede pohuadeni cacahuade nohueradsa nanajidso toquejenajarissa quina tahi. <sup>37</sup>Nadsapa Jeso pocca mamari tabaqquidsapa huati tajari: –Madija Dio jiraha madimanahi huapi taraha pohuadeni maridea huapi tajarahi. Pina huidsajacca ppa nahi bono jicajarajarissa quinaraha poredea madija pama quinajari. <sup>38</sup>Nadsapi huidsaja jinede Diodsa huati tiquinaji, Pohua Atti maride dosse inabaqquidsapa bono porede tohuapihijine –nade Jeso.

**\*Jesocca dodosse tabaqqui  
inajarodsa pocca nahatohue  
inanaridsajaro**

*Maraco 3.13-19; Roca 6.12-16*

**10** <sup>1</sup>Nadsapa Jeso itohui pocca dodosse tabaqqui 12 inajaro, itohui huahua nadsapa iadsa pocca nahatohue inanaridsajarode. Nadsapi ia naqui madija bodidenicca tocorime dosse inineridsa-baqquihijine ia tonapajira-baqquihissa tajari. Nadsapa iadsa pocca nahatohue inanaridsadsa naqui comaqquri najarideni naco comani onihi, onihi cajiridsamanaraha ihinanomi-ridsabaqqui nahijine ia tonapajira-baqquijaride.

<sup>2</sup>Nadsama ia pocca dodosse tabaqqui iquejenajaropi ia oni huapimapi ajima inajaro: Tahidepa Ssino, oni ohuaha naqui \*Pedro. Pedro pohua ohuaha onipa Adiri. Madija ohuaha onipa Satiaco. Pohua ohuahapa \*Huano. Pohuadeni pamahapa Sebedeo bedi. <sup>3</sup>Madija ohuahadeni naco Feripe, Batorome, Tomas, quinajari. Ohuapi Mateo romanodenicca taminecca dosseniji dsinero nanaccade ojararode. Madija ohuahapa Satiaco. Satiacopa Arapeo bedi. Ohuaha naco Tadeo (pohua oni ohuahapa \*Joda). <sup>4</sup>Madija ohuaha naco Ssino, pohuadsa romanodeni momohuade quiquinanajari. Madija ohuahapa \*Joda Iscariote. Najaripa Jeso ccaccorade. Nadsapi 12 inajaro Jesodsa iquejenajarode.

**Jesopa pocca dodosse tabaqqui  
12 inajaro madija maride ia  
dosse taridsabaqquijari**

*Maraco 6.7-13; Roca 9.1-6*

<sup>5</sup>Jesopa pocca dodosse tabaqqui 12 inajaropi pohua tahimari mari

icanaridsabaquihijine ia dosse tabaqquijari. Ia dosse tabaqquijaraccadsama ia mari tocana-baqquijaride. Pohua attipa: –Jehe, tiadenipi otahimari madija mari ticanabaqquiridsahijine jai tijadsapi \*jodio quejena-jarajaridenidsapi jai tija-jeraji. Dsama Samariacca odsa pananihuaaji naqui jai tijedsima tejeraji. <sup>6</sup> Naraha \*Isaraeri potemahi jodiodenihuaajina jai tijani bica tani. Najaridenipa pina edede jano toquejenajarissa quinajari. Jehe, najaridenidsana jajahi tijaridsa naji, onajaro. <sup>7</sup> Najaridenidsara jai tijaridsadsa otahimari tecomeraridsamananissa taji. “Diocca cacahuehepi iadsa bacco najonabote nani” taridsamanana, onajaro. <sup>8</sup> Comaqquri najarideni Diocca dacorehema titinanomi-baqquimana nana. Madija dsoqquemana-jarideni naco Diocca dacorehema pohuadeni titinahatonimana nana. Madija dsamacoma onini \*leprajine jadsimanajarideni naco Diocca dacorehema huapidenicca titinanomi-baqquimana nana. Madija bodidenidsa Satanacca dodosse tabaqqui tocorime madi-dsamanajarideni naco bodidenicca dosse dosse titininebaqquimana najo, onajaro. Jehe, tiadenidsapi manaconi jirehe Dio pocca dacorehe tiadenidsa inanajaro. Tiadeni naqui najarideni tobiquemani-manadsapa manaconitohui huati tiquinejeraji, onajaro –nade Jeso.

<sup>9</sup> –Ticcadeni benehidsa naqui dsiniro tiaccamana tejeraji. Oro poni, plata poni, ccarara onihinaqui poni. <sup>10</sup> Benehicca saco naqui tiaccamana tejeraji, poni. Ticcadeni etero onihitedsamananijinecca

naqui poni. Temoridenicca ohuahapa tiaccamana tajarajo. Aja tedsamanajarira tiaccamanahiojari najo. Tiadeni totocahuejidsa ahua naqui tiaccamana tejeraji, poni. Nadsama otahimari maridera tidsepedeni ihijiridsamana nadsapiticcadeni mamari tabaqquina ticcadeni madiejine tiadenidsa da da nanaridsamana nahi bica tahi –nade Jeso.

<sup>11</sup> –Nadsama odsa panani onihihuaaji, odsa capamema najaro onihihuaaji naqui bacco tiquina-dsapi nahicca madija bica tajari, tiadenidsa jipa tajari tohuira qquitaridsamanana. Madija bica tajari bacco tiquinadsapa najaricca odsadsara timadimanani bica tani. Odsa panani onihihuaaji jai tija-jeraccadsama aji bacco tiquinapolarocca odsadsara timadimanana, onajaro. <sup>12</sup> Jehe, nadsama najaro odsadsa madimanajaridenidsa jai tijedsimadsapi pohuadenidsa: “¿Nija, bicaqquri tiquinaqui? Diocca jonehe tiadenidsa tojana” tiquinana. <sup>13</sup> Nadsama ticcadeni marinaja mittamanadsa, tiadenidsa bicaqquri nadsapa Diocca jonehe pohuadenidsa tojanitohui. Naraha tiadenidsa, ticcadeni marinajadsa naco jiperaqquri nadsapa Diocca jonehe pohuadenidsa toja-jeranitohui. <sup>14</sup> Nadsapa tiadenidsa jiperaqquri nadsa: “Ajidsa timadimanaji” quina-jaradsapa, aja ticcadeni marinaja mittade jiperaqquri nadsa naco najaro odsadsa jai tijeqquimani bica tani. Madija nama quinahicca odsa tinebomanadsapi temoridenicca sadariadsa ssiqui ma tajaro catojanijine pporo pporo tiquinana. Nahi poccadeni

ibohue bodideni huatoma-manahijine –nade Jeso.<sup>15</sup> –Jehe, pajissara tiadenidsa huati onana: Nidsaranibote madija huapimacca ima Dio icattemanijinecca huada bacco tadsa Dio pocca najidsohue tojadsapi najaridenidsapa denima oppina tanitohui. Ajina maittaccadsama odsa panani \*Sodomacca madija, odsa panani onihi Comoracca madija, nahihuaji madija madiridsamanajarideni naco tabaccoraqquri nadsapa Diojine jicaridsapojariपा. Naraha pohuadenipa nidsa dsama jicadsapi poccadene imasiri manaconipa najidsohue oppina tajaro pohuadenidsa ssonarinitohui. Naraha ohuattidsa jiperaqquri najaridenidsana najidsohue denima oppina tanicca ssonarinitohui –nade Jeso.

#### Najidsohue tojanitohui

<sup>16</sup> –Jehe Ꞁtibodideni huatoma-manaji! Ohua tiadeni dosse onabaqquijaropi pina edede dsomaji panahihuaji tiadeni dosse onabaqquijarossa najaro. Jai tijaridsanihuajipi madija tiadenidsa huadiqquri nahi caji tahi. Nema nadsapi tinoccodeni panaji. Pina macca nocco panajarissa tiquinaji. Naraha tiadenipi tedimana tejerana, pina midsori jone tajarossa tiquinaji, onajaro.<sup>17</sup> ꞀPaji, tinoccodeni panaji! Madija huadiqquri najari aniridsahi. Najaridenipa tiadeni tadamamandapsa jodiodenicca taminedenihuaji tiadeni tohuaqquedsimabaqqui-manahitohui. Jodiodenicca Dio Atti mamarihuaji naqui tiadeni tacossi-manahitohui.<sup>18</sup> Otahimari tiadenidsa tojajaro acconi huadimanadsa dsama cacahuadedenihuaji tiadeni

tohuaqquedsimabaqqui-manahitohui. Dsama onihicca dsama onihicca madija tamine deni toquejenarihuaji naco tiadeni tohuaqquedsimabaqqui-manahitohui. Naraha nema nehe ticcadeni ima tecomeramandapsapi taminedeni, jodio quejena-jararideni naco otahimari mittamanahijine.<sup>19</sup> Nadsama taminedenidsa tiadeni tohuaqquedsimabaqqui-manadsapa pohuadenidsa ticcadeni ima tecomeramananjine Ꞁnejecoma onapadseje? tiquinejerana. Ticappinamana tejerana, onajaro. Nahidsa taminedenidsa tecomeramananjine Dio Pohua Corimena tettideni acco tocamabaqquihitohui.<sup>20</sup> Huati tiquinadsapi tettideniraha ticcadeni Abi Dio Pohua Corimejinena huati tiquinajaro, onajaro –nade Jeso.

<sup>21</sup> –Naraha najidsohuepi tiadenidsaha ssonarini ojari nejeranitohui. Aja ohuadsa jehe quinajaridenipa otahimaridsa toquejenarijine pohua ohuahadeniraha pohuadenidsa huadiqquri nadsapa ehccora-baqquimana nahitohui, inajicabaqqui-manahijine. Imehideni naco pohua bedideni otahimaridsa toquejenarijine bedidenidsa huadiqquri nadsapa pohuadeni bedideni ehccora-baqquimana nahitohui, inajicabaqqui-manahijine. Bedideni naco imehideni otahimaridsa toquejenarijine pohuadeni imehidenidsa huadiqquri nadsapa imehideni ihinajica-baqquimana nahitohui.<sup>22</sup> Occa madija tiquejenadsapi madija huapima tiadenidsa jiperaqquri nahitohui. ꞀNaraha tiadenipi dacoco tijiraji! Najaro huadie tinahanamana-dsanapodsapi dsama jicani bacco tiquina-dsa tiadenina ticassiejeranitohui.

<sup>23</sup>Naraha tiadenidsa jiperaquiri najarideni tiadeni tonajidso-baqqi-manadsapa ¡huassinaja odsa panani onihihuaji tidomodeni toccana! Tiadeni tonajidso-baqqimanager pomadsa naco ¡odsa onihihuaji tidomodeni toccapomana! onajaro. Pajissara tiadenidsa huati onajaropi: Nidsa Isaraeri potemahidenicca odsa panani huapimadsa maride jai tijaridsani jiquejeraraha Madija Bedi ohua ohuatomani-pomanitohui, onajaro –nade Jeso.

<sup>24</sup> –Tetideni ajimamana tejerana: Madija pocca mamari tabaquiipa pohuadeni maridedsa deni toquejena-jarahi. Pohuadeni maridena denima nahato tajari. Madijacca dodosse tabaqqi naco pohuadeni dossededsa deni toquejena-jarahi. Naraha pohuadeni dossedena denima nahato tajari. <sup>25</sup>Najarossa najaroa aji madija pohua maridedsa ima ssonaridsapi pohuadsa naqui ima ssonari tani. Nadsapa pohua atti: “Epeje, ohua maridedsa nama quinadsapa ohuadsa naqui nama quinana” nahi bica tani. Madija pohua dossededsa ima ssonaridsapi pohuadsa naqui ima ssonari tani. Aji ohuapi ticcadeni tamine ojani ohua itamassomanadsa pina: “Tiapi tocorimedenicca tamine \*Beheosebo” quinadsapa tiadeni occa madija tiquejenarodenidsa naco denima tatamasso quinahitohui –nade Jeso.

–¿Nejecojaridsara ticappinamananijine? –najari Jeso

*Roca 12.2-7*

<sup>26</sup> –Nadsama tiadenidsa jiperaquiri najarideni noppinadenipi ticappinamana tejerana, onajaro.

Ajina, jidapana poccadeni tabaccorehe inajimamanaraha nidsa dsotodena ahuato tanitohui. Ima bicani ahuatora tanidsa inanamana, ima bica tejeranicca naqui ahuatora tanidsa inanamana naraha nidsa dsotodena najaro ima huapima ahuato tanitohui. <sup>27</sup>Aji ohuattipi dsome tiadenidsa huati huati onajaropi nidsa ssiajanidsa tecomeramanaji. Teribodenidsa ojidsa huati huati onajaro naqui nidsa amossinihuajina jadsirema tecomeramanaji, onajaro –nade Jeso.

<sup>28</sup> –Nadsama otahimaridsa tiquejenarajinepi madija tiadeni tonajicabaqquihijine tohuini quinara najarideni noppinadenipi ticappinamana tejeraji. Najaridenipa timedeni jicanijine pajiramanaraha nidsa tijicani nattinipi aji jororoni jiquejeranihuaji ticorimedeni hua todsimabaqquihijine ssamoququiri nahitohui. Diona tiadeni tonajicabaqquihijine pajirahi. Aji jororoni jiquejeranihuaji ticorimedeni hua todsimabaqquihijine naco pajirahi. Nadsama Dio noppinena ticappinamanaji, onajaro –nade Jeso.

<sup>29-30</sup> –Diopa madija huapimacca ima nahato tajari. Aji, titatideni conani huapima onini huade naco nahato tajari. Diopa tiadeni tohuacahua-baqquihitohui. Pohuapa dsama huapimacca cacahuade naco nahato tajari. Ppiriri naco Dio: “Jehe huatia-jarana” nadsapa huatiera tahi. Naraha Dio: “Jehe huatiana” nadsana huatia tahi. Nadsama ppiriri manaconepa ¿huati ccara taco? Huati ccarera tahi. Ppiriri pamaha manaconepa

ccarara cajarie da da ihicanamana najaro. <sup>31</sup>Nema nadsapi ¡ticappinamana tejeraji! onajaro. Ppiriripa ajamani toquejenaraha huapima Dio ecahuabaquijari. Naraha Diopatiadenidsana denima huati huana tajari. Tiadeni tohuacahua-baqquihissa tahitohui, onajaro –nade Jeso.

**Madija ohuaha  
mittamanahijine: –Ohuapi  
Jesocca ojani –quinajarideni  
tahimarideni  
Roca 12.8-9**

<sup>32</sup> –Madija ojariapa madija ohuaha mittamanahijine pohua cacomeradsa: “Ohuapi Jesocca madija ojani” nadsapa manaco ohuapi occa Abi Dio memehuaji madijaridsa ohuacomeranitohui: “Ajajari madijapa occa tojahi” onanitohui. <sup>33</sup>Naraha madijapa madija ohuaha mittamanahijine pohua cacomeradsa: “Ohuapi Jesocca madija ojajerani” nadsapa manaco ohuapi occa Abi Dio memehuaji madijaridsa ohuacomeranitohui: “Najaripa occa madija jarahi” onanitohui –nade Jeso.

**Jesojinepa madija pohuadenira  
pohuadenira naridsamanajari  
Roca 12.51-53; 14.26-27**

<sup>34</sup> –Tiadenipi tibodidenidsa: “Jehe, Jesopa ajijaro namidsa jonehe tojaridsanijine ccajonajari” tiquinanitide. Naraha ohuapi madija cajonerara canahijine occajonajerani. Madija cahadirere canahijinera occajonajaro –nade Jeso. <sup>35-36</sup> –Nadsama aji occajonaropimadija pohuadenira pohuadenira naridsamanahijine. Madija motapa

ohuadsa jehe quinajari. Madija motapa ohuadsa jehe quina-jarajari. Nadsama madija ohuadsa jehe najaripa pocca odsadsa madija madimanajarideni ohuadsa jehe quina-jaradsapa pocca huadi toquejenajari. Jehe, occajonaropimadija nanitohui: Dsabissoapa imehi tedseje cacahadire nahitohui. Bedenipi imeni tadsajani cacahadire nanitohui. Jinomadinipi massodini tadsajani cacahadire nanitohui –nade Jeso.

<sup>37</sup> –Madijapa pocca madijadsa denima huati huana tadsa ohuadsapa ajamani huati huana tadsapa najari madijapa occa toja-jarahitohui. Aja madija pohua imehidsa, pohua imenidsa huati huana taraha ohuadsapa ajamani huati huana tadsapa occa madija toja-jarahitohui. Pohua bedidsa, pohua bedenidsa huati huana taraha ohuadsapa ajamani huati huana tadsapa occa madija toja-jarahi. <sup>38</sup> Madija ohuadsa dissera tajaradsapa occa madija tojahijine pajira-jarahi. Occa madija tojahijinepa otahimarijine ocasserani inahanaraha nema nehe otahimaridsara dissera tajari. Puhuadsa: “\*Ahua porimacossanidsa tia inanadsoqqena” quinadsa naco pohua attipa: “Epejena odsoqqena. Jeso onebo-jarahi” nadsapa najarina occa madija tojajari. <sup>39</sup> Madijapa pocca madie ohuadsa eccoradsapi pohua inandsoqqe-manaraha camittehe jiquejeraniccapicajidsanapohuitohui. Naraha madija ohuaha pocca madie ohuadsa acco tadsa ajijaro namidsa madi-dsanapohuijine tohuinira nadsapa dsoqquehitohui. Dsoqquedsapa camittehe jiquejeranicca caji-jarahitohui –nade Jeso.

**Madijapa tiadenidsa  
bicaqquri nadsapa Diodsa  
naco bicaqquri nahi**

*Maraco 9.41*

<sup>40</sup> Jesopa pocca dodosse tabaqqi-  
dsa denima huati tajari: –Madijapa  
pocca odsahuaji jai tijedsimanijine  
tiadenidsa pohua attipa: “Jehe, Jeso  
tahimari teccajonamanajaro bica  
tani. ¡Jai tijedsimaji!” nadsa najari  
madijapa tiadenidsa bica tadsapa  
ohuadsa naco bica tajari. Ohuadsa  
bica tadsapa ohua Cadossedabi  
Diodsa naco bica tajari –nade  
Jeso. <sup>41</sup> –Nadsama madijapa Dio  
Atti cacomerabotedsa pohua attipa:  
“Pajissa, Diocca dodosse tijani.  
Dio Atti tecomeradsapi mittade  
jipa onani” nadsa najari madija-  
dsapa Dio pocca biquehe inana-  
nitohui. Pina Dio pocca biquehe  
Pohua Atti cacomeraqquri najari-  
denidsa inanaridsajarossa najaro  
pohuadsa naqui inananitohui.  
Nadsama madijapa Diojine madihi-  
ssa dsanapojaridsa pohua attipa:  
“Jehe, Diodsa timadinissa dsanapo-  
dsapi ohuadsa bica tinani. ¡Occa  
odsahuaji tiqqedsimaji!” nadsa  
najari madijadsapa Dio pocca  
biquehe inananitohui. Pina Dio  
pocca biquehe madija madimanahi-  
ssa tajaridenidsa inanaridsajarossa  
najaro pohuadsa naqui inananitohui  
–nade Jeso. <sup>42</sup> –Nadsama madijapa  
occa mamari ojarai ajamani tojajari  
tohuati nahana tajaridsa pohua  
bodipa: “Jehe, ajararipa Jesocca  
madija, pohuadsa accora onana”  
nadsa pohuadsa da inadsa bica  
tani. Passo nahuini dse nahijine da  
icanadsa naco manaco nidsarani-  
bote Diopa pocca biquehe najari

madijadsa inananitohui. ¡Pajissara  
huati onajaro! –nade Jeso, pocca  
dodosse tabaqqi jai tojaridsahijine  
dosse inabaqqidsa.

**Huano Baotista pocca dodosse  
tabaqqi tahimarideni**

*Roca 7.18-35*

**11** <sup>1</sup> Jeso pocca dodosse  
tabaqqi 12 inajaro pohua  
tahimari maride iquejenaridsanijine  
ia mari tocanabaqquia jicadsapa  
madija huapima mari icanabaqqi-  
ridsahijine ia huapima jajajarode.  
Jeso naco iadsama toccajaride.  
Najaro dsama arobeni onini  
Carireahuajicca odsa panani onihi,  
onihihuaji, odsa capamema najaro  
onihi, onihi nanihuaji Dio Atti  
ehcomeraridsa najarode.

<sup>2</sup> Nadsama Huano Baotistapa  
toponi cocoro todsimadsa huedsa-  
raha madija attideni: –Cristo-  
Mesiapa canahatori canahi  
–quinahi ima mittajari. Mitta-  
dsapa pocca dodosse tabaqqi  
Jesodsa huati toquinahijine dosse  
inabaqqijari. <sup>3</sup> Nadsapa iahuaji  
jahijonadsa bacco najonamanadsapa  
Jesodsa huati toquinajaride: –Ia  
maride Huanopa tiadsa huatide  
ia dosse najonabaqqijari. Pohua  
attipa: “¿Tiapi aja tohui imadijaro  
\*Cristo-Mesia tijaqui? ¿Ouhahatohui  
imadicanijinerane?” nade Huano  
atti –quinade.

<sup>4</sup> Nadsapa Huano dosse inajona-  
baqqijaridenidsa Jeso pohua  
cacomerajari: –Jehe, ticadanidsa  
Huanodsa huati tinanimanaji. Aji  
qqi tiquinajaro, aji timittamana-  
jaro pohuadsa huati tinanimanana  
–nade Jeso. <sup>5</sup> –Ajima tiquinana:  
“Madija nocco sirideni nocco ssire

tocanirehi. Madija isso sirideni naco tocanomiredsa jahiridsahi. Madija dsamacoma onini \*leprajine huapideni jadsimarotarideni naco imedeni tobicaridsahi. Madija huaribodeni didiquirei najarideni naco huaribodeni ssire tocanireridsahi. Madija huatiajarideni naco camittemani-ridsamanahi, madija tohuati nahanaquuri najarideni naco icassiejeranijinecca ima mari icanabaquimanadsa mittaridsamanahi” tinanimanana tiadeni maridedsa –nade Jeso. <sup>6</sup> –Aja madija mota attidenipa: “Jesopa Cristo-Mesia jarahi, pocca imapi onih, Cristo-Mesiacca imassa nejerani” quinaraha madija mota nama quina-jarajari attidenipa: “Pajissa Jesopa icca Mesia” quinadsa pohuadenidsana Dio pocca biquehe inananitohui. Ajijaro ima huapima Huanodsa huati tinanimanana –nade Jeso.

<sup>7</sup>Nadsapa Huano dosse inajonabaquijarideni tohuedanihi natti Jesopa pohuadsa queriquimanajaridenidsa Huano tahimari huati tajari: –Nadsama dsama huamoni ssono caji, siba caji tanihuajipi ¿nejeco qquidera jajahi tija najarotte? Aja madija pocca ima japari tajaro pina boba jojodejine jene jene tocanajarissa najari ¿nama najari qquide jajahi tija najarottarane? Naraha Huano Baotistapa pocca ima japari tejerade. <sup>8</sup>Huamoni-huaji jajahi tija nadsapi ¿nejeco qquidera jajahi tija najarotte? Aja madija etero huatini ccara tanicca huedsajari qquide ¿jajahi tija najarottarane? Naraha tiadenipi nahatoquuri tiquinani: Madija etero huatini ccara tanicca huedsamanajaridenipa taminedenicca

odsadsana mamadimana najari. <sup>9</sup>Nadsapa ¿nejecotohuira nanihuaji jajahi tija najarotte? ¿Dio Atti cacomerabottecca marinaja mittade jajahi tija najarottaqui? Jehu ¿pajissa! Pocca marinajatohui jajahi tija najaroa. Huanopa pina Dio Atti cacomeraquuri najaridenissa naraha pohuapa deni tojajari. Pohua dsepe ijjaripa ima deni tojanicca cajijari. Najaro imapi otahimari Cristo-Mesia tiadeni Idinide ojararopaji. Najaro ima inanajora-ridsapojaropaji. <sup>10</sup>Aja, Huano Baotistapa maittaccadsama pohua tedsejemacca ima Dio Atti cacomerabote Maraquia dsodo inapojaro. Najaropi pina Diopa Cristo-Mesiadsa huati tapojarissa najaro:

“Tahide titahimari tohuaccade madija ojaria titedsejema dosse onapohuitohui. Nahi mittamanadsa madija bodidenipa titohui najoramanapohuijine, pina tijahine najoramanapojarossa inanamanitohui, onajaro” napohui nade Dio Atti –nade Jeso atti. <sup>11</sup> –Nadsama pajissara tiadenidsa huati onajaro: Aji namidsa madiridsamanajaridenidsa naco madija ohuaha pina Huano Baotistassa najari nohuerahi. Huano Baotista pohuajinena madija bodideni otahimari-tohui Diocca cacahuehecca ima dsati inanajorabaquipojari. Najarojine Huanopa namidsa madiridsamanajarideni huapimadsa deni tojajari. Naraha nidsa dsotode madijapa Diocca cacahuehecca ima dsati tojani qqui toquinadsa najarodsa toquejenadsapa pohuadenipa Huano

Baotistadsa deni toquejenahitohui. Madija ajamani tojajari pina tohuati nahana tajari pohua naco Diocca cacahuehedsa tojadsapa pohua naco Huano Baotistadsa deni tojahitohui –nade Jeso.

<sup>12</sup> –Jehe, Diocca cacahuehecca ima dsati madijadsa tojanijine Huano Baotistapa tahide mari mari najonapojari. Jidapana ohua naqui maride nema onajonarao ajijaropaji. Naraha madijapa Diocca cacahuehecca imadsa jiperaququiri nadsa pohuadenijine najidsohue ssonari ssonari najonaropaji. Jicanijine disseraququiri naraha pajirama-jarahi. <sup>13</sup> Maittaccadsama Dio Atti cacomeraququiri najarideni Moisesicca marinajadsa naco Dio Atti ecomeramaneje najonaponi najarao aja Huanopaja. Huapima Diocca cacahuehecca ima naqui mari mari nanajonamana najari –nade Jeso. <sup>14</sup> –Nadsama ajijaro ima timittamananjine tipajiramanadsapi: “Jehe, pajissa” tiquinaji. Najaro imapi Huanopa pina Dio Atti cacomerabote nidsa ccajonahitohui quiquinanajaripa Eriassa najari. (Aji Dio Atti dsodo nanidsapi: “Nidsa Ohuatti cacomerabote onipa Eria tiadenidsa dosse onahitohui” napohui nade Dio.) <sup>15</sup> Nadsama teribodeni ticajimanadsapi ohuatti timittamananissa taji, onajaro –nade Jeso.

<sup>16</sup> –Naraha jidapanana aja madija madiridsamanajaridenipa ¿pina nejecojaridenissa quinarjari? –nade. Nadsapa pocca marinaja mittamanahissa tahijine ajijaro namidsa imadinnica imadsa mari icanabaququijari. Pohua attipa: –Jehe, madija jidapana

madiridsamanajaridenipa pina ejedenideni boronidsa jassi tadsa poccadeni ittome tossamods ahuaji johua, ahuaji johua quinarjari nadsa najari, onajaro. <sup>17</sup> Pohuadenipa pohuadeni tessedenidsa: “Jaho, dsobi tiquinanjine totoredsa tore tore inaraha tetidsemanajerani, dsobi dsobi tiquinejerani” quinarjari. “Ittomedsa naqui tiadeni oji inanabaququinijine ajie tohuati nahana taniccadsa jiri jiri inaraha tiadenipi oji tiquinehe nejerani” quinarjari. <sup>18</sup> Jehe, aja madija jidapana madimanageridenipa pina ejedeni jami-manajarissa quinahi onajaropi Huano Baotista madidsa Dio Atti cacomerade tojadsapa ejetecca jipaqueiecca jijipa jipa-jarahi. Ejetecca dsedse dse najarahi. Nadsa johua johua quinarsa attidenipa: “Huano Baotistacca madie jidsa tani. ¡Pohua bodidsa Satana-cca dodosse tocorime madidsajari itidija!” quiquinanajari. <sup>19</sup> Nani dsotode ohua Madija Bedi ojararao ejetecca jipaqueiecca jijipa ojipa, dsedse dse onadsapa ohuadsa johua johua quinarjari attidenipa: “Jaho, madijadsa jipa naridsajide rahi, dsedsejide rahi. Romano-denicca taminecca dosseniji dsinero nanaccadenidsa ccaridsajari. Madija imasiri cajimanageri tedseje naco ccaridsajide rahi” quiquinanajari ohuadsa. Attidenipa Huanods, ohuadsa nama quinaraha nidsa imasiri cajimanageridenipa ettidsa iboraququiri nadsa bodideni cacajiquimera, imarideni cacajiquimera nadsapa Diocca nahatohue, pocca pajissehe ahuato tanitohui –nade Jeso.

**Iboqquiri najaridenicca ima***Roca 10.13-15*

<sup>20</sup> Jesopa odsa panani onihi onihi naridsajarocca madija poccadeni ibohue tahimarini huati tajari. Poccadeni odsa pananihuaji Jeso pohua canahatori canahicca denima inahatoridsaraha bodideni cacajiqquimera-manaha najaradsapa poccadeni imasiridsa apaja quina-jarajari. <sup>21</sup> Pohua attipa: –Jaho, odsa panani Corasinahuaji timadimanajarodenipi najidsohue oppina tanicca tiadenidsa ssonarinitohui. Jaho, odsa panani Besaidahuaji timadimanajarodeni naqui najidsohue oppina tanicca tiadenidsa ssonarinitohui. Ajina, ticcadeni odsa pananihuaji ocanahatori canani qqui qqui tiquinaraha tibodideni cacajiquimerehe nejerade. Naraha maittaccadsama odsa panani Tirohuaji madimanapjaridenipa tabaccoraqquiri najari, aji odsa panani Sidohuaji madimanapjarideni naco tabaccoraqquiri najari pohuadeni huapimapa ocanahatori canani qqui toquinapo-jarajari. Nassa qqui toquinadsapa Diodsa toquejenahijine najomana-jarahitohuiraha. Poccadeni imasirijine bodideni ocassera tadsapa \*etero jidsa tanicca huedsamandsa dsippo oconi pohuadeni tatidsa huira huira quinadsa oji oji quinahitohuiraha –nade Jeso. <sup>22</sup> –Naraha aji Corasinahuaji timadimanajaro tiadenidsa, Besaidahuaji timadimanajaro tiadenidsa naqui ohuattipi: Nidsa \*madija huapimacca ima cattemanijinecca huada bacco Dio Pohua baccohuaji tidomodeni huadsapi Tirohuaji madimanajaridenidsa Dio pocca najidsohue ajimani tojanitohui. Sidohuaji madimanajaridenidsa naco

ajimani tojanitohui. Naraha tiadenidsana Dio pocca najidsohue denima oppina tanitohui –nade Jeso.

<sup>23</sup> –Jaho, odsa panani Capernaohuaji timadimanajarodeni naqui najidsohue oppina tanicca tiadenidsa ssonarinitohui. Dio memehuaji madijaridsa bacco tiquinadsa tiadenidsa Pohua Attipa: “Jehe, tiadenipi bicaqquiri tiquinani” ¿napadsaja? ¡Nama najarahitohui! Ticcadeni ibohuejinepi \*nami odini huaji tani jicaquini nohueranihuaji tiadeni hua todsimahitohui. Ajina, ticcadeni odsa pananihuaji ocanahatori canani qqui qqui tiquinaraha tibodideni cacajiquimerehe nejerade. Naraha maittaccadsama odsa panani Sodoma huaji madimanapjaridenipa imasiri ssequiri nadsa Diojine memehuajicca dsippo siba quejemani ppocorajaro dsoda odsa, madija huapima jicajari. Naraha pohuadenipa ocanahatori canani qqui toquinapo-jarajari. Nassa qqui toquinadsapa pohuadeni bodideni cacajiquimera-manadsa Dio pohuadeni inajica-jarahitohuiraha. Jidapana Sodomadsapi madija madimanahi paja naccahitohuiraha –nade Jeso. <sup>24</sup> –Naraha aji Capernaohuaji timadimanajaro tiadenidsa ohuattipi: Nidsa dsama jicadsa huapima imarideni icattemaridsanijine Dio Pohua baccohuaji domo huadsapa Sodoma huaji madimanajaridenidsa Dio pocca najidsohue ajimani tojanitohui. Naraha tiadenidsana Dio pocca najidsohue denima oppina tanitohui –nade Jeso.

**Jesopa Imehidsa huati tajari***Roca 10.21-22*

<sup>25</sup> Nahi dsotode Jesopa Imehidsa huati tajari: –Jehe Abi, Tiadsa

ohuatidsejaro. Tiapi memehuaji madimanajarideni Cacahuade tija, namihuaji madimanajarideni Cacahuade tija najaro. Jehe, madija nahatoqquiri najaridenipa ajjaro dsamacca ima tocahattera-  
 raha Tiadsapa jiperaqquiri najari. Nadsama tijinepi ticca pajissehecca ima mittamana-jarahijine pohua-  
 denidsa ahuatora tinanajaro. Naraha madija motadenipa: “Iapi ssamomo inajaro, pina ejedeni bedissa inajaro”  
 quiquinanajaridenidsana ticca ima pajissacca ahuato tinanajaro. <sup>26</sup> Jehe, Abi ¡pajissa! Tia jipa tinadsapi tijine nema tinanajarode –nade Jeso.

<sup>27</sup>Nadsapa Jeso iadsa huati tapoma-  
 jari: –Occa Abipa ohuadsa pocca nahatohue huapima inanaridsajaro. Occa Abina pohua motta ohuadsa nahato tahi ojari najari. Occa Abipa nadsama Pohua ojari naha ohuadsa nahato taha nama najonajari. Ohuapi Abi Diocca Ejedeni ojani. Ohua naqui nadsama. Ohua ojari onehe Pohua-  
 dsa nahato onajonajaro. Nadsama ohua Dio Bedi ojadsapí madijadeni ohuadsa toquejenajaripa pohuadeni-  
 dsa jipa onadsapi ojine pohuadenipa Dio Pohuadsa noccodeni tojidsera-  
 hitohui –nade Jeso.

**Ticcadeni imajine ja tiquejena-  
 dsapi Jesodsara tiquejenaji**

<sup>28</sup> –Nadsama ima ccanajani temanadsapi pina ccanajabote jore tiquinadsa ja tiquejenajarossa nadsapi ohuahujira jai tijajonaji. Otahimaridsa pajissa tiquinadsapi tibodideni jassi onanabaqqui-  
 nitohui. <sup>29</sup>Occa marinaja tiadeni-  
 dsa tojanijinepi ohuadsa tiadeni teccoramanaji, ohuadsa iboraqquiri tiquinanijine, onajaro. Ohuadsa

ticahatteraji. Tiadeni Maride ohuapi jone onani, bica onani. Tibodi-  
 deni onabicabaqqunitohui. <sup>30</sup>Occa marinaja tiadenidsa tojanijinepi ojine pajiranissa tani. Ohuadsa pajissa tiquinadsapi pina ppahua taniccassa nani –nade Jeso.

**Jassinajacca huadadsa Jeso  
 pocca dodosse tabaqqi iapi  
 aroso jidsadsa trigo bono pore  
 idsanapojari**

*Maraco 2.23-28; Roca 6.1-5*

**12** <sup>1</sup>Nadsapi dsotode naqui <sup>\*</sup>jassinajacca huada bacco tadsa Jeso, pocca dodosse tabaqqi tedseje huidsaja nocconi jajie-  
 qqumadsa ipemidsapi aroso jidsa-  
 dsa trigo bono qqui inajari. Dside ippiridsadsa dsojo dsojo icajidseri nadsa pore siqui apa, pore siqui apa inade. <sup>2</sup>Naraha jodiideni mota marinaja pariseodsas jehe quinajaridenipa ia qqui toquinadsa Jesodsas attidenipa: –¡Ajana! Jassinajacca huadadsapi idsepe ijinijine <sup>\*</sup>oppina taraha ticca dodosse tabaqqi trigo bono dside ippiridsamandsapa pina jassinajacca huada jerajarodsas dsepedeni ijaminajarissas quinaha –quinade.

<sup>3</sup>Nadsapa Jeso pohuadenidsa huati tajari: –¿Naraha tiadenipi aji Dio Atti maittaccadsas dsodaniccadsas Dabicca ima hua hua titiquina naraha tetideni ajimanajarorane? Najaro imapi Dabipa pohua tessedeni tedseje pemimanadsapa pan Diodsas da tahicca oppina taraha jipamanajari. <sup>4</sup>Diodsas dada toqquimahuaji toqquedsimadsas cacahuadedsas pan tohui huati tajari. Pan ohuaha nohueradsas Diodsas da tahiccaraha

Dabi jipajari, pohua tessedenidsa naco da inabaquidsa jipamanajari. Najari pan Diodsa da tahipa dada toquima cacahuadedenira jijipamana najariraha Dabideni peminandsa jipamanajari oppinera tahi –najari Jeso.<sup>5</sup> –Nadsama Moisesicca marinajadsa naqui ¿dada toquima cacahuade tahimarideni hua hua titiquina naraha tetideni ajimamanajarorane? Aji, maittaccadsama Moisesicca marinajapi: Jassinajacca huadadsa dada toquima cacahuadedenipa dsepedeni ijimanaraha pohuadenedisa najaro huadapi oppinera tani, napohui nade Moisesi.<sup>6</sup> Naraha tiadenidsa ohuattipi: Aji \*Diodsa dada toquimacca odsapi deni tojanicca tojaccade. Naraha jidapana aja, tiadenidsa madijaripa Abi Diojine pohuana deni tojajari. Jidapanana Diodsa dada toquimacca odsapi pohuadsa ajimani tojajaro. Najari deni tojajari onajaropi ohuapaji –nade Jeso.<sup>7</sup> –Maittaccadsama Dio Atti cacomerabote Osea dsodo inapjaropi:

“Tohuati huanehe, acco camehe tohuini onani. Ohuadsa ticcadeni bani bedi ono tojahijine da da titiquina naraha madija ohuadsa tetideni huaneraquiri nadsapi ticcadeni daniji jipera onani.

Madija huapimadsa tetideni huanaquiri nanijinena jipa onani. Pohuadeni acco acco titicamabaquimana dsadsanapo nadsa naqui jipa onani” napohui nade Dio.

Naraha najaro dsodonijipi timittamana-jerajaro. Nassa timittamana-dsapi ima cappiramanajarideni

johua ticanabaquimana-jarahitohuiraha.<sup>8</sup> Aji Madija Bedi ojajaroa jassinajacca huadapi ohuana jinede ojani. Jassinajacca ima cacahuadepi ohuana paji –nade Jeso.

### **Madija dsepe siricca ima**

*Maraco 3.1-6; Roca 6.6-11*

<sup>9</sup>Nahidsa Jeso toccadsapa Dio Atti mamarihuaji toquedsimajaride.

<sup>10</sup>Nadsapa nahihuajicca madija dsepe siri naco nahidsa huittaritari. Nadsa pariseodenipa Jesodsa huati toquinajari: –Nija, Moisesicca marinajadsa, icca madijacca marinajadsa naqui jassinajacca huadadsa madija coma tajari inanomihijine ¿oppinera taqui? Najaropi pina jassinajacca huada jerajarodsa idsepe ijjarossa naraha –quinajari. Pohuadeni bodipa: –Jidapana jassinajacca huadadsa ajajari dsepe siri inanomidsapa Jesodsa ima inahananijine –quinajari.

<sup>11</sup>Naraha Jesopa: –¡Jari! Manaco ohuatti tecomeramanaji. Ajina, pina ticcadeni edede itide. Jassinajacca huadadsaraha ticcadeni edede odidsa tossonidsimadsapa ¿tidinimana-jaraco? ¡Tidinimannahitohui! onajaro. <sup>12</sup>Naraha ticcadeni ededepa ¿tiadenidsa bica tajaraco? Ededepa bica tahi. Naraha ia madijapi denima bicaquiri inajaro. Nadsapi jassinajacca huadadsa edededsa bica inanani oppinera tadsapi madijadsa naqui bica inabaquihijine oppinera tani, onajaro –nade Jeso.

<sup>13</sup>Nadsapa madija dsepe siri-dsa Jeso attipa: –Jari, tidsepe ohuahuaji da ticanajonaji –nade. Nanaja pohua dsepe pohuahuaji

da icanadsapi dsepe tocanomijaro. Pina pohua dsepe onihissa camanijaro. <sup>14</sup>Naraha pariseodenipa dsotode nahidsapa jai tojeninedsapa imahaha canajari: –¿Nejecoma inandasa Jeso inandasoqqehijine? –quinajari. Nadsapa najaro ima huati toquinahijine queriqquimana-jari quinade.

**Maittaccadsama Dio Atti  
cacomerabotepa Jeso  
tahimari dsodo inapojaro**

<sup>15</sup>Jesopa pohua inanadsoqqe-manahijine tohuini quinahi nahato tadsapa Dio Atti mamarihuaji nebotsa toccajari. Ia pocca dodosse tabaqqi ia naqui huaji tani-huaji jaijajaro. Nadsapa pohuadsa madija huapi taha jahijonadsapa comaqquri najarideni huapima inanomibaqquijari. <sup>16</sup>Naraha inanomibaqquidsapa pohuadenidsa huati tajari: –Tiadeni onanombaqquijaro tecomamanana. Aja madija huapimadsa otahimari huati taridsamana tejeraji, onajaro –nade Jeso. <sup>17</sup>Nadsama Jesocca imapi pina maittaccadsama Djojine Pohua Atti cacomerabote Isahia dsodo inapojarossa najaro:

<sup>18</sup> –¡Ticattomama canaji!  
Ajajaripa tiadeni Idinide tojahijine occa Ejedeni Ohuattidsa ibora tahijine ocattapojari. Pohuatohui ohuati huana tajararo. Pihuapa Ohua catidsehissa tajari. Ocorime pohuadsa onanadsapi Ohuatti inapajiranissa tani-tohui. Pihuapa aja madija tabaccorehe inebomanadsa occa biqueheda toquejena-hijine tahimarini dsama

huapimacca madijadsa huati huati naridsahitohui.

<sup>19</sup>Pihuapa pohuadsa jiperaqquri najarideni tedseje ahuaji huati ahuaji huati quinarahitohui. Johuahuera tahitohui. Amossinidsa pohua atti mohui tadsa atti atti najarahitohui.

<sup>20</sup>Pihuapa boba ede jai tahi paja jai inanari-jarahitohui. Naparina jororone cahuidsa jami-mi nadsa naco pihuapa paja icanahuiri-jarahitohui. (Najaro imapi pina aja madija pohuadsa jehe nahissa tajarajari ettajo-jarahitohui. Madija pocca jeheniji tomijiraraha pihuapa najari acco icamahitohui.)

Nama dsanapodsapa nidsa dsotode pohuajine occa biquehe deni tojadsapi tabaccorehe inajicanitohui.

<sup>21</sup>Nadsama dsama huapimacca madija pohuatohui quinadsa pohua canajoranhitohui madimanajari, najari Dio –napohui nade Isahia.

**Jesocca dacorehe ahuato  
tajaroraha pohuadsa ima  
inanamanajaro**

*Mateo 9.32-34; Maraco 3.20-30;  
9.40; Roca 11.14-23; 12.10*

<sup>22</sup>Nadsapa madija pohua bodidsa \*Satanacca dodosse tocorime madidsajari. Najarijine nocco siri, ebano siri nadsapa qqui tajarajari, atti naco cappiraha madijari. Pihuata tessedenipa Jesohuaji eccajonamanajari. Nadsama Jesopa pohua bodicca dosse ininedsapa tonomijari. Qqui tapomajari, atti naco

cajipomajari. <sup>23</sup>Nadsapa nahi-huajicca madija huapima najaro qqui toquinadsapa: –A, bica tahi. ¡Jesopa nahato tahi! –quinajari. Attideni naco: –¿Ajajari Jesopa, tamine \*Dabi Potemahico? Aja ia Idinide, pohuatohui imadijaro ¿ccaronajarico? –quinajari.

<sup>24</sup>Naraha pariseodeni najaro ima mittamanadsa maidsamanadsa attidenia: –Ajana, Jesopa tocorimedenicca tamine \*Beheosebocca dacorehe cajijarijinea pocca dodosse tabaqqi dosse ininebaqqijaripaja –quinajari.

<sup>25</sup>Naraha Jesopa pohuadeni bodi nahato tajari. Bodideni huatomanahijine pohuadenidsa ajijaro ima huati huati tajari: –Dsama huapimacca taminepa madija ecahuabaqquiraha dsotode pocca madija cahadiremanadsa ahuaji atti ahuaji atti quinadsapa pocca cacahuehe inassamomanajaro. Nadsapa pocca madija domo tocca tahi. Najarossa najaro odsa pananicca madija cahadiredsapa tojaribaqqi tahi. Ima onihi naqui najarossa najaro madija ojaría pocca odsacca madija cahadiredsapa poccadeni ima tossamonitohui. <sup>26</sup>Ima najarossa najaroa Satanapa pocca dodosse tabaqqi madija bodidsa madidsamanajarideni dosse ininebaqqidsapa pina pohua pocca madija tedseje cahadirejarissa najari. Nama nadsapa pocca dossehe inassamodsapi sara tabaqqi hitohuiraha. ¿Nadsapa pocca dodosse madija bodicca dosse ininehijine jipa taco? Jipera tahi. Aji ohuadsa tettidenipi: “Satanacca dacorehedsa pocca dodosse dosse tininejari” tiquinaraha najaropi pajissa jerani. Nassa

najaro pajissa tojadsapi Satana pohua pocca dodosse tabaqqi inajaribaqqi-ridsa hitohuiraha. <sup>27</sup>Ajina, ohuadsa: “Beheosebocca dacorehe ticajini” tiquinaraha ticcadeni mamari tabaqqi naco Satanacca dodosse tabaqqi dosse dosse ihininebaqqimana najari. Naraha pohuadenipa ¿nejecojaricca dacorehedsa nama quinajari? Aja ticcadeni mamari tabaqqipa dacorehe cajimanadsapa Satanacca dodosse tabaqqi dosse ininebaqqi-manaraha pohuadenidsa: “Beheosebocca dacorehe ticajimanani” ¿tiquinattaqui? Nema tiquinejerani, onajaro. Nadsama ¿nejecotohui ohuadsa nema tiquinajaro? Tibodidenipi quejemama canajaro –nade Jeso. <sup>28</sup>–Naraha ohuapi Dio Corimecca dacorehe ocajije najaro Satanacca dodosse tabaqqi dosse dosse ohoninebaqquiridsa najari. Nema onandsapi tiadenidsa ahua to onanajaro: jidapana Diocca cacahuehe tiadenidsa bacco najonajaropaji, onajaro –nade Jeso.

<sup>29</sup>–Nadsama Satanapa dacorehe cajiraha ohuapi deni ojajaro. Pohuapa ajamani pina ajijaro ima tiadenidsa huati onabote najarossa najaro. Nadsama bobotidepa: “Odsacca todsepetaji obotina” najariraha odsa jinede dacorabote odsadsa madidsadsapa botihijine pajira-jaraha. Naraha bobotide denima dacoradsapa odsa jinede dama inadsa jore inaqquidsapa pohua dsepetaji botihijine pajiraha. Ima najarossa najaroa aji ohua pina bobotide denima dacorajarissa onajaro. Occa dacorehe deni tojadsapi pina Satana jore

onaquijjarissa nadsa pocca dodosse tabaqqi dosse dosse ohoninebaqqi najaripaja –nade Jeso.

<sup>30</sup>Nadsapa Jeso denima huati huati tajari: –Nadsama madija ohuadsa toja-jaradsapa occa huadi tojajari. Pohua naco madija ohuadsa toque-jenahijine pohuadeni acco icambaqqi-jaradsa pohuajine ohuadsa tohuajimanajari, onajaro –nade Jeso. <sup>31</sup>–Nama nadsapa tiadenidsa ohuattipi: Madija imasiri inamanaraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni imasiri huapima epeje inananitohui. Naraha Dio Corime itamassomanadsa, pohuajine tojajarodsa maidsehe huahua quinadsa naco Diopa pohuadeni atti huati ajama-jarahitohui. Poccadeni imasiri epeje inana-jeranitohui –nade Jeso. <sup>32</sup>–Aji ohua Madija Bedi ojararodsa madija atti atti quinadsa ohua itamassomanaraha nidsa dsotode: “Icca ima inebona” quinadsapa poccadeni imasiri, poccadeni tamassohue Diodsa ecomeramanadsa Diopa poccadeni imasiri epeje inananitohui. Naraha Dio Corime itamassomanadsa pohuajine tojajarodsa maidsehe huahua quinadsa naco Diopa pohuadeni atti huati ajama-jarahitohui. Jidapana imadiccadsama poccadeni imasiri epeje inana-jeranitohui. Nidsa dsotode Dio pocca cacahuehe tojadsa naqui epeje inana-jeranitohui, onajaro –nade Jeso.

### **Ahua bono tahimari**

*Roca 6.43-45*

<sup>33</sup>Nadsama Jesopa ahuacca imadsa mari icanabaqqihijine huati

huati tajari: –Ahua bicahi ppa tadsa tecahuahissa tadsapa bono bica taha cahua tahi. Naraha ahua ppa tadsa tecahua-jaradsapa bono tabaccora taha cahua tahi. Nadsama ahua huapima bono cajiridsadsapa bono bicahi cajihi nahato inadsapi: “Najari ahuapa bica tahi” inajaro. Bono tabaccora tahi cajihi nahato inadsapi: “Najari ahuapa tabaccora tahi” inajaro. <sup>34</sup>Jaho, maidsaqqiri tiquinani. Tebenodenipi pina macca ebenossa tiquinajaro. Tibodideni tabaccoraqqiri nadsapi ima tabaccora tajarodsara tebenodenidsa atti atti titiquina najaro. Aja madija huapimapa pohuadeni bodidsa ima caji tadsapi najaro imara huati huati totoquina najari. <sup>35</sup>Nadsama madija bica tajaripa pohua bodidsa ima bicani ecahuadsapi ima bicanira huati huati tataja nahitohui. Naraha madija bica tajarajaripa pohua bodidsa ima tabaccora tani ecahuadsapi ima tabaccora taniccara huati huati tataja nahitohui. <sup>36</sup>Nadsama tiadenidsa huati onajaro: Ima ponimacca huati huati tiquinadsapi nidsa \*madija huapimacca ima cattermanijinecca huada bacco tadsa Dio Pohua baccohuaji tidomodeni huadsapi aji ima ponimacca huati huati tiquinapjarocca huapima dsori teje cama-jeranitohui, onajaro. Diopa tiadenidsa: “Jari, ohuadsa ticcadeni ima tecomermanaji. ¿Nejecotohui tettideni nema nema titiquina najaro?” nahitohui. <sup>37</sup>Nadsama pina jidacca ahuacca ima huati onajarossa najaro aji tettideni huapima Dio nattome inadsapi tohuatti tabaccora tanicca ticajimanadsapi Diopa: “Tabaccora tinani. Tia onajidsona” nahitohui.

Naraha tetti deni bica tanicca ticajimanadsapi Diopa: “Bica tinani. Tia ocatidsena” nahitohui, onajaro –nade Jeso.

**Madija tabaccoraququiri  
najarideni Jeso canahatori  
canahijine tohuini quinajari**

*Maraco 8.12; Roca 11.29-32*

<sup>38</sup>Naraha Jeso atti mittamana dsapa jodiodenicca marinaja maridedeni mota, marinaja pariseodsas jehe quinajarideni mota naco Jesodsa huati toquinajari: –Jari Mamaride, pajissa Diocca dacorehe ticajidsapi memehujicca nahatohue bicabote ahuato tinanaji. Qqui inana, inajaro –quinade.

<sup>39</sup>Naraha Jesopa pohuadenidsa huati tajari: –Jidapana timadimanagerodeni tabaccoraququiri tiquinehe timadimanajaro. Tahidepi tetti deni: “Diocca iquejenani” tiquinaraha dsotodepi Pohua Atti tinebomanajaro. Aji ocanahatoriri cananijine tohuira huati tiquinaraha occa nahatohue onahatona onejerani. Naraha ocanahatoriri cananicca ima ojariena qqui tiquinanitohui. Najaropi Dio Atti cacomerabote \*Jonasocca imassa najaro. <sup>40</sup>Najaroa aji Jonaso pina huatiajarissa nadsa abamehi bodidsa huada huatinimade tojari nehe madidsajarissa najaro aji ohua \*Madija Bedi oजारopi nidsa ohuatiadsa nami bodihuaji huada huatinimade tojari nehe omadinitohui. Pina Jonasocca imassa najaro ohuadsa tojanitohui –nade Jeso. <sup>41</sup>–Nadsapi nidsa madija huapimacca ima cattemanijinecca huada bacco tadsapi Dio Pohua baccohuaji tidomodeni huanitohui. Nahidsapa odsa panani Ninibehuaji

madimanajaridenipa ticcadeni ima tiadenidsa inassonarimananjine huati toquinahitohui: “Iapi Jonasocca ima imittadsa ibodi cacajiquimerade. Naraha tiadenidsapa Dio Atti cacomerabote deni tojajari madiraha pohua atti mittade iboququiri tiquinajaro. Nema tiquinadsapi Dio tiadeni tohuattajo-baqquidsapa bica tani, inajaro” quinahitohui Ninibecca madija –nade Jeso. <sup>42</sup>–Najarohuadadsa dsama Sebahujicca tamine amoneje madijaro naqui ticcadeni ima tiadenidsa inassonarinjine huati tanitohui. Poni attinipi: “Ohuapi dsama huaji tanihuaji omadiraha tamine \*Saromocca nahatohue omittanijine occajonade. Naraha tiadenidsa madijaripa denima nahatotaraha pohua atti mittade iboququiri tiquinajaro. Nema tiquinadsapi Dio tiadeni tohuattajo-baqquidsapa bica tani, onajaro” nanitohui Sebahujicca tamine amoneje attinipi –nade Jeso.

**Satanacca dodosse tocorime  
toccaraha ccanipoma tahi**

*Roca 11.24-26*

<sup>43</sup>Jesopa ima onihidsa mari icanabaququijari. Pohua attipa: –Nadsama tocorime ojaria madija bodidsa madidsaraha qquenadsapa toccajari. Aji dsama huamo tanihuaji, passo nohueranihuaji pohua madihijine qquide toccadsa qqui qqui naridsaraha pohua madihijine bacco tajarari. <sup>44</sup>Nadsapa: “Jehe, occa mamadi botehuaji occanipomana” najari tocorime atti. Nadsapa ccanipomajari. Bacco nanidsa madija pohua bodi tohuirehi qqui tadsapa pina odsa johue tocanehe huisso tocanajaro-ssa naraha tomdirajaro. <sup>45</sup>Nadsapa

tocorime toccapomadsa pohua tessedeni tocorime 7 quinaha jina inanibaquijari. Najaridenipa denima tabaccoraquiri naraha pohua tedseje jai tojedsimajari, madimanahijine. Nadsama ima nema najaro madijadsa tojadsapi pocca madie tabaccora taporaha dsotodepi denima totabaccorajaro. Tiadenidsa najarossa najaro tojanitohui. Jidapana tabaccoraquiri tiquinehe timadimanajarodeni otahimaridsa pajissa tiquinejersapi ticcadeni madie denima totabaccoranitohui –nade Jeso.

**Jeso imeni, pohua imecotedeni**

*Maraco 3.31-35; Roca 8.19-21*

<sup>46</sup>Jehe, Jesopa madijadsa huatide tojaraha amossinihuajipa Jeso imeni, pohua imecotedeni tedseje: –Jesodsa huati inana –quinadsa pohuatohui domo huajari. <sup>47</sup>Nadsa Jesodsa madija ojaría attipa: –Ticca ami, timecotedeni amossinidsa domo huapaja. “Tiadsa huati inana” quinajari –najari.

<sup>48</sup>Naraha pohuadsa huati tajari-dsa Jeso attipa: –Occa amipi ¿nejecojarona paji? Ohuemecotedeni naco ¿nejecojaridenina paja? –nade. <sup>49</sup>Aji, ia pocca dodosse tabaqquideni ia dsopi tabaqquidsa Jeso attipa: –Ajajaridenina pina occa amissa, pina ohuemecotedenissa quinajari, onajaro. <sup>50</sup>Madijadenipa occa Abi Dio memehuaji madijari Pohua jipa tahicca ihinanamana najarodenina pina ohuemecotedenissa quinajari. Amonejedeni naqui Dio Pohua jipa tahicca ihinanamana najarodenina pina occa amissa, pina ohuemecotedenissa quinajaro, onajaro –nade Jeso.

**Jesocca marinaja huidsaja ppappadecca ima tadsajani mari icanabaquijari**

*Maraco 4.1-9; Roca 8.4-8*

**13** <sup>1</sup>Dsotodepa najaro huadadsa coridsa inidicca ssiquihuaji toqqe-dsippadsa huittajari. <sup>2</sup>Madija huapi



taha nahi pohuahuaaji jahidsippa-  
dsa Jeso mari icanabaquihijine  
canoadsa toquedsadsapa canoacca  
huihuittaridsa huittarijari. Nadsama  
madija huapimapa nahi coridsa  
inidicca ssiquidsa domo huajari.

<sup>3</sup>Nadsapa Jeso pocca marinaja  
ajijaro namidsa imadinicca ima  
tadsajani pohuadenidsa huati huati  
tajari. Pocca imapi ajima najarode:

–Huidsaja ppappadepa pocca  
huidsaja huirade toccajari. <sup>4</sup>Nocco  
huira inaridsajari. Naraha motapa  
jahuihuaji catojaja najari. Nadsapa  
ppiriri jahironadsa amadsati saca  
quinajari. <sup>5</sup>Aja nocco huira naridsa-  
jari mota naco siba ccababa tanidsa  
catojajari. Nanidsapi ssiqui bicani  
badsira taraha nama naha huassi-  
naja moro tajari. <sup>6</sup>Moro taraha jabo  
huapihuajira toccabaquijari. Maji  
ccajonadsapa maji ppoconejine  
botejari. <sup>7</sup>Nocco mota naco nami-  
dsa cotihi caji tahihuaji catojajaria  
cotihi tedseje paja moro toquinarihi  
naraha cotihijine ssomi tojajari.

<sup>8</sup>Naraha nocco mota huira naridsa-  
jaripa nami bicanidsa catojaridsa-  
dsapa mororo canaridsadsa bica  
taha napijari. Bono cajiridsadsapa  
ede ojariapa bono 100 naha cajijari.  
Ede ohuahaccapa bono 60 naha  
cajijari. Ede ohuahaccapa bono 30  
naha cajijari. <sup>9</sup>Nadsama teribodeni  
ticajimanadsapi ohuatti timitta-  
mananissa taji, onajaro –nade Jeso.

**Madija motapa Jesocca  
marinaja mittamana-jarajari**

*Maraco 4.10-12; Roca 8.9-10*

<sup>10</sup>Nadsama ia, pocca dodosse  
tabaqqi iquejenajaropi Jeso pohua-  
huaaji huajijira icanadsa ajima inade:  
–¿Nejecotohui titahimari ajijaro

namidsa imadinicca ima tadsajani  
pohuadeni mari mari titicanaridsa-  
baqqi najaritta? –inade.

<sup>11</sup>Naraha Jeso iadsa ecomerade:  
–Jehe maittaccadsama Diocca  
cacahuehecca ima dsati najorapo-  
raha madija inahattabaqqi-jara-  
ccade. Naraha jidapanana Dio  
Pohujine pocca cacahuehe tahi-  
marini dsati tiadenidsana ahuato  
tani. Naraha madija motapa Dio  
Pohujine pohuadenidsa ahuatora  
tadsa mittamana-jarajari –nade.  
<sup>12</sup>–Ajina, Diocca cacahuehe tahi-  
marini mari ocanaridsabaquihicca  
madija tohuattajaripa Diojine  
najaripa denima tohuattahitohui.  
Nadsapa najarina denima nahato  
tahissa tahitohui. Naraha Diocca  
cacahuehe tahimarini mari ocanar-  
idsabaquihicca madija mimitta  
naraha tohuatta-jaradsapa occa  
marinaja cappirahissa tahitohui.  
Badsira taha tohuattadsapa najaro  
naqui amossi nanitohui. <sup>13</sup>Nema  
najarojine otahimari ajijaro nami-  
dsa imadinicca ima tadsajani  
madijadeni mari ocanaridsa-  
baqqiija naridsapohui najari.  
Pohuadenipa qqii qqii toquinaraha  
pina qqii toquirahi najaripaja. Dio-  
cca dosseniji mimittamana naraha  
pina mittamanerahi najari. Pohua-  
deni bodi naco ssamoqqiri najari.  
<sup>14</sup>Nadsama poccadeni imapi pina  
maittaccadsama Dio Atti cacomera-  
bote Isahia dsodo inapojarossa  
najaro inanamanajaro. Aji Isahia  
attipa:

“Teribodeni ticajimanaraha  
pina timittamanerani  
nanitohui.

Tinoccodeni ticajimanaraha  
pina qqii tiquirani nanitohui.

<sup>15</sup> Ajajari madija bodideni  
tossamoridsadsapa paja  
tossamomanarihi nahitohui.  
Huaribodeni moda nahi nadsapa  
pina mittamanerahi nahitohui.  
Noccodeni naco modsi quina-  
dsapa pina noccodeni  
cappiramanajarissa nahitohui.  
Nama quinadsapa qqui toqui-  
nahijine ssamoqquiri, mitta-  
manahijine ssamoqquiri,  
bodideni tocatterahijine  
ssamoqquiri nadsapa  
bodideni cacajiquimera-  
manahijine ssamoqquiri nahi.  
Nassa bodideni cacajiquimera-  
manadsa ohuadsa toquejena-  
dsapa onabicabaquihitohui-  
raha”

nahi nade Dio –nade Jeso.

<sup>16</sup> –Naraha aji tiadenina ohua  
ocanahatoriri canajaro tinoccodenidsa  
qqui tiquinaridsajaropi Dio tiadeni-  
dsa ima bicani inanajaropaji. Teribo-  
denidsa naqui occa marinaja timitta-  
manajaropi Dio tiadenidsa ima bicani  
inanajaropaji. <sup>17</sup> Pajissara tiadenidsa  
huati onajaro: Maittaccadsama Dio  
Atti cacomeraqquiri najarideni, Dio-  
dsa iboraqquiri najarideni naco occa  
nahatohue aji jidapana tiadeni qqui  
tiquinajarocca qqui toquinahijine  
tohuini quinaporaha tahide tojicapo-  
dsapa qqui toquina-jarajari. Aji occa  
marinaja timittamanajarocca naqui  
najaro mittamanahijine tohuini quina-  
poraha tojicapodsapa mittamana-jara-  
jari –nade Jeso.

–Huidsaja ppappadecca imapi  
ajima najarona paji –najari Jeso

*Maraco 4.13-20; Roca 8.11-15*

<sup>18</sup> Nadsama Jesopa pocca marinaja  
ajijaro namidsa imadinicca ima

tadsajani mari icanabaquipoma-  
dsa naco pohua attipa: –¡Jari,  
titaharibomananissa taji! Huidsaja  
ppappadecca imapi ajima najaro:  
<sup>19</sup> Nocco huira inaridsajari mota  
jahuihuaji catojaripa pina madija  
Diocca cacahuehe tahimarini mitta-  
manaraha ja quina-jaradsa pina  
mittamanerahi nadsapa bodideni-  
dsa Dio Atti toqqedsima-jerajaro-  
ssa najaro. Aja ppiriri nocco saca  
inaridsajaripa pina maidsehe jinede  
\*Satana ccajonadsa bodideni ina-  
ssamobaquijarissa najaro. Nadsapa  
Dio Atti pohuadenidsa nohuerajaro.

<sup>20</sup> –Madija ohuaha bodideni-  
cca imapi pina aji siba ccababa  
tajarocca imassa najaro. Dio Atti  
mittamanadsa amadsati huatidse-  
manajari. <sup>21</sup> Pohuadenipa Diodsa  
jehe dsanapomanahijineraha Dio  
Atti pohuadeni bodidsa toja-jera-  
jaropi pina siba ccababa tanidsa  
nocco moro taraha jabo huapi-  
huajira toccabaquijaricca imassa  
najaro. Nadsama aja maji ppocone-  
jine botejaricca imapi Dio Attidsa  
jehe quinajarijine pohuadenidsa  
najidsohue ssonaridsa, ocasserani  
ahuamanadsapa jehe quidsati atti-  
denia: “Epejena, Dio Attipi inebona”  
quinajari.

<sup>22</sup> –Madija ohuaha bodideni-  
cca imapi pina namidsa cotihi  
caji tajaricca imassa najaro.  
Pohuadenipa Dio Atti mittamana-  
raha pohuadeni dsepedeni ihiji-  
mana najarotohuira disserahiquiri  
nadsapa Dio Atti tocatterahissa  
tajarajari. Dsiniro tohuira quina-  
dsa naco najaro imajine Dio Atti  
huatideni ajamamanajari. Pocca-  
deni jeheniji pina aja nocco moro  
taraha cotihijine ssomi tojadsapa

bono-jarajarissa najaro. Dio Atti mittamanaraha pohuadenijine Dio Atti madija ohuahadenidsa tojaranitohui.

<sup>23</sup> –Naraha madija ohuaha bodidenicca imapi pina aji nami bica tajarocca imassa najaro. Dio Atti mittamanadsapa jehe quinahissa tajari. Poccadeni jeheniji napidsapi pina aja nocco nami bicanidsa moro tahissa tadsapa bono cajijari. Ede ojariapa bono 100 naha cajiridsajari. Ede ohuahaccapa bono 60 naha cajijari. Ede ohuahaccapa bono 30 naha cajijari. Aja Diodsa jehe quinahissa tajaripa madija mari icanabaqqui-ridsadsapa madija ohuaha ohuaha quinaha Diodsa inanabaqqui-manahitohui –nade Jeso.

**Aroso jidsadsa trigo tedseje  
dsero quejemanicca ima**

<sup>24</sup> Jesopa pocca marinaja ajijaro namidsa imadinicca ima tadsajani madija mari icanabaqquipomajari: –Jehe, Diocca cacahuehe tahirinari onihi naqui pina huidsaja jinede pocca huidsajahuaji nocco bicahi huira inaridsajaricca imassa najaro. <sup>25</sup> Dsome huapima cahadijadsapa pocca huadi ccajonajaria aroso jidsadsa trigo bicahi tetepidsa dsero nocconi pina trigossa najaro huira inaridsajaro. Huira inaridsaha jicadsapa aja huidsaja jinededsa huadi tajaripa toccanijari. <sup>26</sup> Nadsapa trigo bicahi moro tajari, bono cajijari. Dsero pina trigossa najaro naqui moro tajaro. <sup>27</sup> Nadsa huidsaja jinedecca dodosse tabaqqui qqui toquinadsa pohuadeni dosseduaji jai tojanidsapa huati toquinajari: “Ia dossede ¿trigo noccora ticca huidsajadsa huira tajarajarittaco?

¿Nejecohuajicca dsero pina trigossa najaro nocconi ccajonajarotte? inajaro” quinajari. <sup>28</sup> Naraha huidsaja jinede attipa: “Jaho, madija ohuadsa huadi tajaripa dsero nocconi huira inaridsajaroa” najari. Nadsa pocca dodosse tabaqqui attidenipa: “Jipa tinadsapi dsero dsoppade jaijanipomana, inajaro” quinajari.

<sup>29</sup> Naraha jinede attipa: “¿Poni! Najaro dsero dsoppa tiquinejerana. Trigo naco dsoppa tiquirana” najari.

<sup>30</sup> “Apajaccana, pamaha napimanaccana. Nidsa trigo bono jadadsana ahuato tahitohui. Nadsana bonotohui edema ti tiquinaridsahijine bica tahi. Nadsapa titidedenidsa ajima onanitohui: Jari, tahide dsero ti tiquinapona, onanitohui. Tide jicadsa ponira hua naqquidsapi jore nacossadsana botta tiquinaji, onanitohui. Naraha trigo bicahi bonotohui edema ti tiquinadsapa occa odsahuaji ohuadsa tojahijine jore jore tanimanajo, onanitohui” najari huidsaja jinede atti. Jehe, Diocca cacahuehepi najaro imassa najaro –nade Jeso.

**Jesopa mostaza noccocca ima  
tadsajani mari icanabaqquijari**

*Maraco 4.30-32; Roca 13.18-19*

<sup>31</sup> Nadsapa Jeso pocca ima huati tapomahijine ajijaro namidsa imadinicca ima tadsajani mari icanabaqquipomajari: –Diocca cacahuehepi pina \*mostaza noccocca imassa najaro. Madijapa pocca huidsajadsa mostaza nocco ppa idsajari. <sup>32</sup> Najari mostaza noccopa potera tajari. Ppa nahi nocco ohuaha naco potera tajari caji taraha mostaza noccopa denima potera tahi. Naraha mostaza nocco moro tadsapa huidsajacca ppa

nahidsa pohuana deni tojajari.  
 Napidsapa pina ahua imehissa  
 najari. Motaradsapa pohua inine-  
 dsapa ppiriri pohuadeni tadsari bina  
 tarimana tahi. Jehe, Diocca cacahue-  
 hecca ima mari ocanabaqqui-  
 jaripa pina najaro imassa najaro.  
 Tahidepi madija pamahadsa tojapo-  
 jaro. Dsotodena madija huapimadsa  
 tojaridsadsapi Diocca cacahueheda  
 madija tohuapihitohui –nade Jeso.

**Jesopa pan ssaja tahijine  
 quequejemacca ima tadsajani  
 mari icanabaqquijari**

*Roca 13.20-21*

<sup>33</sup>Nadsapa Jeso pohua tahimari  
 ajijaro namidsa imadinicca ima  
 tadsajani mari icanabaqquipomadsa  
 naco: –Jehe, Diocca cacahuehe  
 tahimarini onihi naqui pina pan  
 ssaja tahijinecca imassa najaro.  
 Amoneje pan inahatohuijinepa \*pan  
 ssaja tahijine quequejema levadura  
 trigo ria nahidsa icanejemajari.  
 Ssaja tahijine quequejema badsira  
 taraha trigo ria nahi harina 3 kilopa  
 motarajari. Naraha ssaja tahijine  
 quequejema trigo ria nahi harina-  
 dsa tojaribaqquidsapa ssaja tajari.  
 Aji Diocca cacahuehecca ima naqui  
 najaro imassa najaro. Tahidepa  
 madija pamaraha dsotodena Diocca  
 cacahuehecca ima dsama huapima-  
 dsa tojaribaqquidsapa madija huapima-  
 dsa tojaridsajaro –nade Jeso.

**Jesopa pohua tahimari  
 ajijaro namidsa imadinicca  
 ima tadsajani mari mari  
 ihicanabaqqui najari**

*Maraco 4.33-34*

<sup>34</sup>Jehe, Jesopa pohua tahimari  
 ajijaro namidsa imadinicca ima

onihi onihi najaro tadsajani madija  
 huapima mari mari ihicanabaqqui  
 najari. Pohuadenidsa huati tadsapa  
 ajijaro namidsa imadinicca ima-  
 dsara mari mari ihicanabaqqui  
 najaride. <sup>35</sup>Jeso nama najaripa  
 aja maittaccadsamacca Dio Atti  
 cacomerabote Jeso tedsejemacca  
 ima dsodo inaponicca najarossa  
 inanajaro. Najaro ima Dio Atti  
 dsodo nanidsa ajima najaro:

–Otahimari ajijaro namidsa  
 imadinicca ima tadsajani  
 mari mari ohocanabaqqui  
 nahitohui.

Dsama onahato-jeraccadsama  
 naqui otahimari ahuatora  
 tajonaraha.

Nidsa ojine najaro ima ahuato-  
 ridsadsapi madija huapima  
 mari ocanabaqquiridsahitohui  
 –napohui nade Dio Atti cacomera-  
 bote.

–Aroso jidsadsa trigo tedseje  
 dsero quejemanicca marinajapi  
 ajima najaropaji –najari Jeso

<sup>36</sup>Nadsapa nahidsa Jeso madija  
 huapima inebobaqquidsapa  
 toqqemoranjari. Odsahuaji  
 toqqedsimanidsapa nahidsa  
 pocca dodosse tabaqquideni iapi  
 pohuahuaji huajijira inadsa huati  
 inajaro: –Jari, jidacca huidsajac-  
 ca aroso jidsadsa trigo tedseje  
 dsero quejemani tahimarini huati  
 tinapojaro iadsa huati timani-  
 pomaji, imittanissa tanijine, inajaro  
 –inade.

<sup>37</sup>Nadsapa ia mari tocana-  
 baqquijari: –Jehe, ohuapi Madija  
 Bedi ojajaroa pina trigo bicahi  
 huihuiradessa onajaro. <sup>38</sup>Nadsama  
 huidsajapi ajijaro dsamassa najaro.

Trigo bicahi noccopa pina madija Diocca cacahueheda toquejenajari-ssa najari. Pohuadenipa Dio Attidsa iboraquiri najari. Naraha dseropi pina madija Diocca huadi Satana attidsa iboraquiri najarideni-ssa najaro. <sup>39</sup>Nadsa dsero nocconi huihuiradepa huidsaja jinedecca huadi Satana. Nadsama nidsa trigo bono jadadsa ti nahijinecca huada bacco tajaropi pina nidsa dsama jicadsa Dio Pohuadsa toquejenajarideni icattejidsa-baqquihijine tahimarissa najaro. Aja trigo titidenipa Diocca dodosse tabaqqui memehujicca. <sup>40</sup>Aji dsero huanaqqidsa botta quinaniijinecca imapi nidsa ajijaro dsama jicadsa madijadsa najarossa najaro tojanitohui, onajaro. <sup>41</sup>Naraha nidsa ohuapi Madija Bedi ojararoa memehujaji omadipomadsa occa dodosse tabaqqui memehujicca dosse onaronaridsa-baqquidsapa imasiri mamaridedeni, imasiri totonanadedeni tedseje huapima icattejidsa-baqqui-manahitohui, Diocca cacahueheda toquejena-jarahijine. <sup>42</sup>Najarideni huapimapa jororoni jiquejeranihuaji hua idsima-baqqui-manahitohui. Nahihuajipa ocasserani ahuamana-dsanapodsapa panodeni todsahi nadsa oji oji quinahitohui. <sup>43</sup>Nadsama icattejidsa-baqquimanaha jicadsapa madija Dio Pohua jipa tahicca inanamanajarodenina aja Pohuadsa toquejenajarideni huapima Abi Diocca cacahueheda madimana-dsanapodsapa pina maji dsibehi tajarissa quinahitohui. Nadsama teribodeni ticajimanadsapi ohuatti timittamananissa taji, onajaro –nade Jeso.

**Todsepetaji huatini ccara tanicca inajimani tahimarinidsa mari icanabaquijari**

<sup>44</sup> –Jehe, Diocca cacahuehepi pina todsepetaji bicabote huatini ccara tanicassa najaro. Madijapa pajimaranihuaji qquide ccaridsadsa todsepetaji tonajimani bacco inajaro. Todsepetaji bicabote, huatini ccara tanicca qqi tadsapa najaro todsepetaji denima inajimopomajaro. Nadsapa huatidse-dsa toccanijari. Pocca odsahuaji bacco tanidsapa pohua dsepetaji nemanehi manaconitohui da inehi jicajaro. Najaro manaconi caji-dsapa aja pohua qquide ccaridsapohuihuaji toccapomajari. Nadsapa najaro dsama mita inadsapi pocca tojajaro. Aji todsepetaji bicabote huatini ccara tanicca pohuajine tonajimani naqui pocca tojajaro. Najaro imassa najaro Diocca cacahuehe denima bica tadsapi madija pocca imabote nemanehi inebo-dsapi Diodsara huatidse-dsanapohitohui –nade Jeso.

**Bicabote huatini ccara tanicca perla tahimarinidsa mari icanabaquijari**

<sup>45</sup> –Jehe, Diocca cacahuehe tahimari onih naqui pina madija tomatocca huatini ccara tanicca \*perla mittade tohuini nadsa qquide ccaridsajari. <sup>46</sup>Nadsama perla bicabote huatini ccara tanicca bacco inadsapa jinededsa: “Ohuadsa tecahuaji” nadsa pocca odsahuaji toccanijari. Pohua dsepetaji inequeriquidsa nemanehi da inadsapa najaro manaconidsa perla mittade toccapomajari. Mitta

inadsapi pocca tojajaro. Jehe, Diocca cacahuehepi najaro imassa najaro. Icca imabote nemanehenebodsapi Diocca cacahuehe bicabote iadsa tojajaro –nade Jeso.

**Aba cocoro tahimarinidsa  
mari icanabaqqujari**

<sup>47</sup> –Jehe, Diocca cacahuehe tahimarinini onihi naqui pina aba cocoro imenibote passo imenihuaji tappa icadsippamanadsa joca icamoranimanadsapa aba ohuaha, ohuaha naha huemajari. <sup>48</sup>Nadsapa aba cocorodsia ijihissa tadsapa ssiquihuajina joca icamoranimanadsapa jassi tadsa aba bica tajarira icattejidsamanadsa dsamednsa hua idsaridsamanajari. Naraha aba tabaccora tajaripa hua quinajari. <sup>49-50</sup>Najarossa nanitohui nidsa ajijaro dsama jicadsa naqui. Tahidepa Diocca huadidsa toquejenajarideni Dio inajidso-baqquihijinepa pina aba tabaccora tajari tocattejidsadessa quinahitohui. Diocca dodosse tabaqqui memehuajiccana madija tabaccoraqquri najari icattejidsabaqqui-manaccachitohui. Pohuadenira domo huahitohui. Najaridenipa \*jororoni jiquejeranihuaji hua todsimabaqquihitohui. Nahihuajipa ocasserani ahuanadsanapodsapa panodeni todsahinadsa oji oji quinahitohui. Naraha ohuadsa toquejenajarideni, aja Dio Pohua jipa tahicca inanamanajardenina Dio madihihuaji toquejenahitohui, onajaro –nade Jeso.

**Todsepetaji jadani, todsepetaji  
dsati tadsajani tahimarinidsa  
mari icanabaqqujari**

<sup>51</sup>Nadsapa Jeso iadsa huati tajari: –¿Nija? Occa ima aji tiadeni

mari mari ohocanabaqqui najaro ¿timitamananissa taqui? –nade. Nadsapa: –Jehe, imittani –inade, ia huapima.

<sup>52</sup>Nadsapa iadsa Jeso attia: –Nema nadsapi jodiodenicca marinaja maridedeni Diocca cacahuehe tahimarinini dsatidsa toquejenadsapa pina odsa jinedessa quinajari. Odsa jinedepa pohua dsepetaji odsa bodihuaji ecahuajaro. Todsepetaji jadani caji, todsepetaji dsati naqui caji najari. Nadsapa pohua bodi nahato tadsa todsepetaji jadani dsojo inine tani. Todsepetaji dsati naqui dsojo inine tani. Nadsama aja Dio Atti maridedeni madija maride toquejenadsapa Dio Atti dsodo napojarocca, Diocca cacahuehe tahimarinini dsati tadsajani maride nahatoqquri najari –nade Jeso.

**Jesopa Nasaretihuaji toccanidsa  
mari icanabaqqujari**

*Maraco 6.1-6; Roca 4.16-30*

<sup>53</sup>Nadsama Jesopa pocca marinaja ajijaro namidsa imadicca ima tadsajani huatide jicadsapa nahihuaji nebodsia <sup>54</sup>pohua napihihuajina toccanijaride. Odsa panani Nasareti bacco tanidsapa poccadeni Dio Atti mamarihuaji toqquedsimadsa mari icanabaqqujari. Naraha nahicca madijapa Jeso canahatoriri canahi qqiu toquinapo-jaradsa huajo caniredsia attidenipa: –A ¿nejecohuaji tohuattajaritta? –quinade. –¿Nejecojaricca nahatohue Jesodsa tojajarotte? –quinade. <sup>55</sup> –¡Naraha ajajaripa ahua nanahatode bedia! Imeni oninipi Maria. Pohua imecotedeni naco: Satiaco, Dsodse,

Ssino, \*Joda quinajaripajade.  
<sup>56</sup> ¿Pohua caripenedeni naqui aji imadinidsa madimana-jeraqui? Madimanani. Nadsama ¿nejeco-huajicca nahatohue pohuadsa tojajarotte? –quinade. <sup>57</sup>Nadsapa pohua atti mittade tojiperamanageri. Nadsapa Jeso attia: –Ohuadsa pajissa tiquinejeradsapi pina Dio Atti cacomeraquiqui najarideni tahimarissa tinanamanajaro: Madija huapimapa aja Dio Atti cacomera-botedsa: “Pajissa Diocca dossenijia” quiquinanaraha aja pohua dsamariccapa nama quina-jarahi, pocca odsacca naco pohua attidsa jiperarquiqui naha nama najonanageri –nade. <sup>58</sup>Nadsapa nahihuajicca madija Jesodsa pajissa quina-jaradsapa pohua canahato-huajapohui canahicca huapi tejerani. Madija pamahara inanomibaquijaride.

#### Huano Baotista dsoqquehicca ima

*Maraco 6.14-24; Roca 9.7-9*

**14** <sup>1</sup>Nadsapa Jeso canahatori canaridsadsapa pocca ima tojaribaquijaro. Nadsapa dsama arobeni Carireahuajicca tamine \*Herodepa Jesocca ima huati huati toquinahi mittadsapa <sup>2</sup>pocca dodosse tabaqquidsapa huati tajari. Herode attipa: –Aja canahatori canajaripa \*Huano Baotista dsoqqueraha nahatonijari. Najaro nahatonihijine canahatori canahi –nahi nade tamine Herode.

<sup>3-4</sup>Nadsama Herode atti nama nadsa tahide pohuajine Huano Baotista inanadsoqqe-manapogari. Najaro imapi ajima najaro: Tahidepa tamine Herode pohua imecote Feripecca amoneje Herodia icajidsa ima tojajaro. Huanopa

poccadeni ima mittadsa Herodedsa huati tajari: –Diocca dossenijidsapi timecotecca amoneje tidijidsadsapi bica tejerani –nanaja najari Huano. Najaro ima Herodia mittadsapi Huanodsa huadijaro. Ponicca maqquidsapa dosse dosse nadsa tamine Herodepa pocca dodosse tabaqqui idossebaqquidsapa Huano dama quinaadsapa toponi cocoro todsimadsa coro idsimanageri. <sup>5</sup>Nadsapa tamine Herodepa Huano Baotista dsoqquehijine tohuini naraha madija noppinedeni cappinajari. Ajana, madijadeni huapimapa: –¡Huano Baotista attipa pajissa! Pohuapa Dio Atti cacomerabote –quinajari huapima.

<sup>6</sup>Naraha huada onihidsa tamine Herode pohua tossonahicca huada bacco tadsa ejete inanajaro. Herodia bedeni dsobi dsobi todsadsapi huapima qqui toquinajari. Nadsapa tamine Herode ponicca dsobinaja bica tani qqui tadsa huatidsedsapa <sup>7</sup>dsohuatodsa pohua attia: –Jari jata, ticca huatinaja ohuadsa huati tinaji. Nadsapi tiadsa da onanitohui –najari. –¡Pajissa! Tia ocamaidsa-jerajaro, ohuattissa onanitohui –nahi nade tamine Herode. <sup>8</sup>Nadsapi dsohuatocca ami attinipi: –Huano Baotista tati-tohui huati tinaji –nadsa najarossa inanajaro. Attinipi: –Ohuadsa Huano Baotista tati parato imehidsa huittidsadsa da ticanajo –nani nade dsohuato attini.

<sup>9</sup>Nadsapa Herode pohua bodi jipera taraha pohua atti tahide: –Tia ocamaidsa-jerajaro, ohuattissa onanitohui –nanaja napodsa pohua tessedeni: –Pajissehe huati tajari –quinahijine tohuini nadsapa:

– Jehe, Huano matto ca tijidsa-  
dsapa paratodsa ponidsa da ticanajo  
– najari. <sup>10</sup>Nadsapa pocca dodosse  
toponi cocorohuaji dosse inajari.  
Nadsapa tamine Herode attidsa  
Huano matto ca iijdsamanajari.  
<sup>11</sup>Nadsama tati paratodsa ettidsadsa  
dsojo icadsimanidsapa dsohuatodsa  
da icanajari. Nadsapi dsohuato poni  
imenidsa da icanajari. <sup>12</sup>Nadsapa  
Huanocca dodosse tabaqquideni  
assiretohui jahijonadsa dsojo inine-  
manajari. Nadsapa ppa idsamana-  
jari. Dsotodepa: –Najaro ima Jeso-  
dsa huati inana –quinadsa Jesodsa  
huatide jai tojajari.

**Jeso madija 5 mil quinajarideni  
inajipabaqqijari**

*Maraco 6.30-44; Roca 9.10-17;*

*Huano 6.1-14*

<sup>13</sup>Jesopa –Huano Baotista  
dsoqquehi –quinahi ima mittad-  
sapa pohua motta madihijine  
madija madide nohuerahihuaji  
canoadsa jaijaro ia huapima.  
Naraha madija huapimapa –Jeso  
toccahi –quinahi ima mittamana-  
dsa odsa onihi onihi naridsanica  
madija Jeso pohuatohui coridsa  
huapi jai tojabacossajari. Dsotorini-  
huaji jai huajanijari. <sup>14</sup>Nadsapa Jeso  
canao huana tocanadsa toqqe-  
morajari. Nanaja madija pohuatohui  
jai tojajarideni bacco toquinapodsa  
domo hueri nahi qqai inabaqqi-  
jari. Nadsapa pohuadenitohui huati  
cahanari canadsapa comaqqiuri  
najarideni inanomiridsa-baqqijari.

<sup>15</sup>Nadsapa maji toccadsa pocca  
dodosse tabaqqui iapi Jesodsa huati  
inade: –Ahuajipa madija madide  
nohuerahi. Maji toccahi. Madija  
dosse tinanibaqqujo, ahuajipa

dsamatapa mitta quinahijine  
nohuerahi. Aja, odsacca dsamatapa  
mittade jai tojanina –nade.

<sup>16</sup>Naraha Jesopa: –Jai tojani-  
hijinepa ¡pohua! Ajadsa tiadeni  
tinajipabaqquimanajo –nade.

<sup>17</sup>Naraha iapi: –Iadsapa pan 5, aba  
pama napaja. Denima icappirani  
–nade. <sup>18</sup>Nadsapa Jeso attia:  
–¡Apaja! Najari ohuadsa teccajona-  
manajo –najari.

<sup>19</sup>Nadsapa Jeso madija huapimadsa  
huati tajari: –Nani dsero caji tanidsa  
jassi jassi tineri naridsaji –nade.  
Nadsapa Jeso pan 5 naha inacca, aba  
pamaha idsaba nadsa memehuaji  
tocattamacossa nadsa Diodsa huati  
tajari: –Jehe, epejeni. Ticca daniji  
iadsa bica tahi –najari. Nadsapa  
Jeso canahatori canajarijine pan,  
aba najari tohuapidsa icanabobi-  
ridsadsapa pocca dodosse tabaqqi  
iadsa pan da inabaqqijari. Iana  
madija jassi jassi teri najaridenidsa  
pan da inabaqquiridsajaride. <sup>20</sup>Da  
inabaqquiridsadsa jipamanadsapa  
accararidsa-manajari. Jipamanahissa  
taraha mota tojajari. Pan bobi, aba  
ime mota inaccaniridsa-manadsapa  
quiqui 12 naha iijiridsajari. <sup>21</sup>Nadsa  
aja madija jipamanajaridenipa  
maqquideje 5 mil quinajari. Denima  
poccadeni amoneje, poccadeni  
ejedenideni naco jipamanajari.

**Jeso passo tetepi  
ccajonajaricca ima**

*Maraco 6.45-52; Huano 6.16-21*

<sup>22</sup>Nadsapa canahatori canahicca  
pan jipamanahi nattipa Jeso pocca  
dodosse tabaqqui ia coridsa jippe-  
huaji ia dosse tabaqquipojari: –Jari,  
canoadsa jai tijedsadsa tahide jippe-  
huaji jai tijapoji, onajaro –nade.

Naraha Jeso pohuapa nahidsa ibo-ccajari. Nadsapa madija huapimadsa huati tajari: –Epejeni, huapima jai tijanina –nade. <sup>23</sup>Nadsapa madija jai tojanihijine huati taha jicadsapa manaco pohua motta ssonohuaji denima toqqemorajari, imehi Diodsa huati tahijine. Jeso pohua motta nahi ssonohuaji Diodsa huatide tojadsa cadsomejari. <sup>24</sup>Naraha iapi coridsa nocconi ori inaraha jojode itedsejema ccajonadsapi passo ssoda ssoda najarojine canoa quehena-cossajaro. <sup>25</sup>Nadsapa ssiajaricossadsa Jesopa qqedsippanidsa passo tetepi iahuaji ccamissajonadsa ia bacco tamissabaquijari. <sup>26</sup>Nadsapa

Jeso passo tetepi ccajonahi qqui inadsapi otessedeni tedseje ijabojo najarode. Pohua noppine icappinadsapi johua johua inade: –¡Tocorime itidija! –inajarode ia huapima.

<sup>27</sup>Naraha iadsa Jesopa: –¡Ticappinamana tejeraji, ohuapi ohua! –nade.

<sup>28</sup>Nadsapa Pedro attia: –Ohua Medsede ¿pajissa tiaqui? Pajissa tijadsapi tiahuaji passo tetepi occanijine ohuadsa huahua taji, onajaro –najari.

<sup>29</sup>Nadsapa Pedrodsa Jeso huahua najari: –Jehe, ticcajonaji –najari. Nadsa Pedropa canoadsa huittidsaraha totehema, passodsapa



toquedsippadsapa Jesohuaji passo tetepi toccajari. <sup>30</sup>Naraha jojode dacorajaro, oppina tani qqui tadsa Pedro bodi cappinajari. Cappinadsapa passodsapa jaro dsanajari. Jaro dsanadsapa Jesotohui huahua najari: –¡Ohua! ¡Ohua! ¡Ohua Medsede, ohua tidimoraji! –najari Pedro.

<sup>31</sup>Nadsa Jesopa amadsati Pedro dsepedsa dama mari idsanadsapa huati tajari: –Pedro, ticca jeheniji pajiranissa tejerajarojine jaro tidsanajaropaji. ¿Nejecotohui ohuadsa: “Jehe, Jesopa passo tetepi occanijine pajirahi” tejerajaro? –nade Jeso.

<sup>32</sup>Nadsama canoadsa huededsanidsapa jojode totappajaro. <sup>33</sup>Nani canoadsa jassi idsaraha ia huapima ibodipi: –Jeso deni tojahi, iapi ajimani iquejenani –inadsa Jeso baccohuaji ipitodsapa jassi idsadsapi pohuadsa huati inajaro: –Pajissa, tiapi \*Dio Bedi tijani –inajarode, ia huapima.

**Jenesarehuaji Jesopa  
comaquiri najari  
inanomiridsa-baquijari**

*Maraco 6.53-56*

<sup>34</sup>Dsotode coridsa jippehuaji iaqqeidsadsapi dsama onini Jenesarehuaji bacco inajaro. <sup>35</sup>Nadsapi jajjemoradsa nahihuaji madimajarideni Jeso qqui toquinajari. Nadsapa –Jeso iadsa bacco nahi –quinahi ima tojaridsadsapi comaquiri najarideni pohuadeni tesse ehecacajona-baquimana najaride. <sup>36</sup>Nadsama huapima Jesotohui disseraquiri nadsa pohuadeni attidenipa: –¡Jeso, ohua tinanomiji! ¡Ticca etero iponira bara onanijine

ahuaji ticcajonaji! –quiquinana-jari. Nadsapa pocca etero iponi bara quinajarideni huapimapa tocanomireridsahissa tajari.

**Jodiodenicca marinajajine  
Diocca dosseniji huahuattajo  
tojajaro**

*Maraco 7.1-13*

**15** <sup>1</sup>Nadsapa huada onihidsa odsa panani Jerosarehuajicca jodiodeni marinaja pariseodsapa jehe quinajarideni, jodiodenicca marinaja maridedeni tedseje Jesodsa bacco najonamanajari. Jesocca dodosse tabaqqi pohuadeni dsepe ssahuarahi jipamanahi qqui toquinadsapa Jesodsa huati toquinajari: <sup>2</sup> –¿Nejecotohui ticca dodosse tabaqqipa jodio quejenaraha icca ididenicca marinaja ecahuamana-jerajaro? –quinade. –Ajana, pohuadeni dsepe ssahuarahi jipamanadsapa Diodsa bica tejerani, iadsa naqui \*oppina tani, ihinanajaro –quinade.

<sup>3</sup>Naraha Jesopa: –Jari, tahide ohuatti tecomeramanaji. ¿Nejecotohui tiadenipi Diocca dosseniji nahatoqqiri tiquinaraha najaro dosseniji tecahuamananissa tejerajaro? Aji ticcadeni ididenicca marinajadsana disseraquiri tiquinadsapi Diocca dosseniji ponima tinamanajaro. <sup>4</sup>Ajina, Diocca dossenijipi: “Ticcadeni abidsa, ticcadeni amidsa tetideni huanaquiri nana. Pohuadenitohui tetideni huanaquiri nadsa attidenidsa iboraquiri tiquinana” napohui nade. Pohua atti naqui:

“Madijapa imehidsa, imenidsa imasiri inanadsapi manaco najaripa dsoqqehitohui”

napohui nade Dio Atti, Moisesijine dsodo nanidsa. <sup>5</sup>Naraha tettetidenipi: “Madija imehidsa, imenidsa pohua attipa: ‘Jaho, tiadeni acco ocambaqquinijneraha ocajijaro huapimapa Diodsa da onahijine onapodsapi tiadeni acco ocambaqquinijine opajira-jerani’ nadsa pocca abi, pocca ami acco icambaqqui-jaradsapa bica tani” tiquinaraha. <sup>6</sup>Ticcadeni madijacca marinajadsana “bica tani” titiquina nadsapi tijinedeni Diocca dosseniji huahuattajo tinanamana-jaro. <sup>7</sup>Jaho, tiadenipi maidsehe ticajimanani. Maittaccadsama Diojine Pohua Atti cacomerabote Isahiapa ticcadeni imassa nehe dsodo inapojaro. Jidapanana najarossa najarodsata timadimanajaro. Ajana, maittaccadsama Diojine Isahiapa:

<sup>8</sup>“Ajarideni madijapa ohuadsa: ‘Dio, tiapi bica tinani’ quiquinanaraha pohuadeni bodidenidsa otohui quina-jarahi.

<sup>9</sup>Pohuama ohuadsa jiri jiri quiquinanajari. Pohuadeni maride naco: ‘Dio Atti mari mari inajaro’ quiquinanaraha madijacca marinajara mari mari nanaridsamana najari” napohui nade Dio Atti –nade Jeso.

**Tabaccorehe madija bodidsa ahuatomsapi imasiri toja tani**

*Maraco 7.14-23*

<sup>10</sup>Dsotodepa Jeso madija pohuahuaji jahijonahijine tohuideni huahua najari. Pohuahuaji bacco najonamanadsa Jesopa: –Jari, ohuatti titaharibobo canaji timittamananissa tanijine –nade.

<sup>11</sup>–Tiadenidsapi jijipa oppina tahicca caji tahi. Madija nama nahicca jipadsapa tettetidenipi: “Diodsa bica

tejerani, Moisesicca marinajadsa naqui \*oppina tani” titiquina najaro. Naraha ohuattipi ajima najaro: Huapima itaparipa dappi inadsa ibodidsa tojadsapa imasiri toja-jerani. Naraha ebenodsas huati huati ihinanajarojinena madijadsa imasiri ihinanamana najaro –nade Jeso.

<sup>12</sup>Nadsapi ia pocca dodosse tabaqqi iquejenajaropi madija atti atti quinahi imittadsa manaco Jesodsas huati inajarode: –Nija, jidacca huati tinajarocca ima pariseodeni mittamanadsapa tettidsa nacasseraqquri nahi ¿nahato tinaqui? –inade.

<sup>13-14</sup>Naraha Jeso attia: –¡Epeje! ¡Nama dsanapomanahitohui! Madija occa Abi Dio memehuaji madijaridsa toquejenajaridenipa pina pocca huidsajacca ppa nahissa quinajari. Naraha aja pariseodenipa pina pohuama moro toquinajarissas quinajari. Nadsama huidsaja jinedepa pohuama moro tahicca jaboma dsoppa inadsa ajacca hua inajari. Dio naco najaro imassa inananitohui. Pohuadsa toquejenajararideni aji jororoni jiquejeranihuaji hua idsimabaqquihitohui. Ajana, pohuadeni attipa: “Dio Atti maride iquejenajaropi pina noccodeni siri jahinedeni dsopi icanabaqquijarissa inajaro” quinaraha pohuadeni huapima naco pina noccodeni sirissa quinajari. Pohuama noccodeni siri ohuahadeni jahinedeni dsopide toquejenajari. Nadsama nocco siri pamahapa pohua tesse jahine dsopide tojaridsadsapa odi tohuajarodsas pohuadeni pamahapa tocatojedsimera tahi. Aja pariseodenipa pina najaro imassa inamanajaro.

Paji, pohuadenidsa tiquejemamana tejeraji, onajaro –nade Jeso.

<sup>15</sup>Nadsa Pedropa Jesodsa huati tajari: –Ia Maride, ticca marinaja aji “Huapima itapari dappi inadsa ibodidsa tojadsapa imasiri toja- jerani” tajaropi ¿nejecoma najaro? –nade Pedro. <sup>16</sup>Nadsapa Jeso attia: –¿Tiadeni naqui occa marinaja timittamana- jerajaroqui? <sup>17</sup>Timittamananissa tanijinepi tiadeni mari ocanabaquipomana. Aja ejeridsa toquedsimajari itapari. Itaparipa idsonedsa totoquedsima najari. Dsotode miji inadsapa toqqe- qquimajari. <sup>18</sup>Naraha ejeridsa qquenajaropi etti. Ettiipi ibodi huatodsas ebenojine huati huati inajaro. Najaro huati huati inajaro- jinena imasiri totoja najaro. <sup>19</sup>Ajina, tabaccorehe huapimapi madija pohua bodidsa ahuatomadsa pohua todossenidsapa imasiri inanajaro. Najaropi pina madija imasiritohui pohua bodi huatojari, madija inana- dsosquehijine tohuini najari, madija amoneje cajiraha amoneje onihi ajade tohuini najari, amoneje maqqi cajiraha maqquideje ohuaha najade tohuini najaro, maqquideje tabira- raha amoneje ajade tohuini najari, amoneje tabiraraha maqquideje najade tohuini najaro, najaro ima madija pohua bodidsa ahuatoma- dsapi imasiri toja tani. Tabaccorehe onihi naqui pina botie tohuini najari, maidsehe huati tahijine tohuini najari, madija tatamasso nahijine tohuini najari. <sup>20</sup>Najaro tabaccorehe huapimajinepi madija pohua bodi totabaccorajari. Najarojinena madija imasiri ihinanamana najaro. Naraha idsepe ssahuarani iijpadsapi ibodi- dsas imasiri toja- jerani. Aja jodiodeni

marinaja pariseodsas jehe quinajari- deni, jodiodenicca marinaja maride- deni tedseje attidenipa: “Ia ehuerani icca ima Diodsa tohuirenijinepi huajjiradsa idsepe ssahua ssahua inadsa tohuirenijine” quiquinana- raha ibodidsa imasiri ecahuadsapi idsepera ssahua inaraha imapi tohuirenijine ssamo tani –nade Jeso.

**Jodio madija jeraraha Jesodsa  
pajissa najaro**  
*Maraco 7.24-30*

<sup>21</sup>Nadsapa nahihuaji mari icana- baquica jicadsapa Jeso toccajari. Odsas panani pamehe Tiro, Sidohuaji toccajari. <sup>22</sup>Nanihuajicca amonejepi Canahacca madija, jodio jerani. Najaro amoneje bacco ijidsade. Jeso qqui tadsapi huahua huahua najaro: –¡Ohua Medsede, tiapi maittaccas- dsamacca tamine \*Dabi Potemahi tijajaro! ¡Otohui teti huana taji! –nade, johua johua nadsa. –Occa ejedeni tocorime cajijaro. Najarijine ponipi ocasserani ahuadsanapojaro –nade.

<sup>23</sup>Naraha Jeso ponidsa huati tajarajari, joma najari. Nadsapi ia pocca dodosse tabaquia pohua- dsas huati inajaro: –Apaja, ponid- sa: “¡Ticcaniji!” taji, inajaro. Aji inattihuaji huahua huahua namissas- jonajaro tocasserani nani –inade. <sup>24</sup>Nadsapa Jeso attia: –Occa Abi Dio ohua dosse naronajaripa \*Isaraeri potemahi jodiodenidsas ohua dosse naronajaride. Najari- denipa pina edede jano toqejena- jarissa quinajari –nade Jeso.

<sup>25</sup>Naraha ponipi dissera tadsapi joppa namissajaro, tossoniquima, Jeso pohua baccohuaji poni pitonid- sas huittajaro. Poni attinipi:

–¡Ohua Medsede, ohua acco ticamaji! –nade. <sup>26</sup>Nadsapa Jeso ponidsa huati tajari: –Madija ohuaha \*jodio quejena-jarajari tahide acco ocamabaquipo-huijinepa bica tejerani. Najaro imapi pina madija pocca ejedenidenidsa dsamatapa da inaraha idinidsa pocca ettedsana da inajari-ssa najaro. Naraha Diocca madija jodiodenina tahide acco ocambaquipo-huijine bica tani –nade Jeso.

<sup>27</sup>Nadsa Jeso attidsa ponipi: –Pajissa, ohua Medsede, naraha ettepa pohua jinedecca huahuanaridsa dsamatapa tabotto catojadsapa pohua naco jipajari. Jodio ojajera-rahaha ohuadsa ticca acco camehe badsira tehe tinanaji, onajaro –nade Jesodsa.

<sup>28</sup>Attini nema nadsapi ponidsa Jesopa: –Jehe, amoneje, tiapi ohuadsa jehe tanissa tajaro. Ohuadsa tibodipi: “Jehe, Jesopa occa ejedeni inanomihijine pajirahi” tadsapi ticca huatinaja tiadsa onanana, onajaro –nanaja nadsapa ponicca odsahuaji bedeni tonomijaro.

**Jesopa huapima  
inanomiridsa-baqqujari**

<sup>29</sup>Jehe, Jeso toccanidsapa Carireacca coridsahuaji toqqe-dsippanipomajari. Coridsa poni huapi toccabacossajari, ssonohuaji toqqemoradsapa nahi ssonods huijtajari. <sup>30</sup>Nadsapa madija huapima Jesotohui ssonohuaji jahimorajari. Jesodsa bacco nimoramanajaridenidsapa isso siri quejemamana, nocco siri quejemamana, biji siri quejemamana, ebene

siri quejemamana najari. Comaqquri najari huapi taha quejemanajari. Nadsapa Jesohuaji comaqquri najarideni pohnadeni tesse eccajonabaqqui-manadsapa pohua baccohuaji ettaridsamanadsa inanomibaqqujari. <sup>31</sup>Inanomibaqquidsapa madija nahidsa queri-qquimanajarideni qqui toquinadsa jabojo quinajari. Aja ebene siriraha atti nimanipomajari. Biji ttomoraha biji cajimanimanapomajari. Isso siriraha issodeni biquemaniridsamanadsapa jahiridsapomajari. Noccodeni siri naco noccodeni biquemanimanajari. Nadsapa madija attidenipa: –¡A, Isaraeri potemahi jodiodenica Diopa bica tahi, deni tojahi! –quinajari, huapima Diodsa huatidsemanadsa.

**Jeso madija 4 mil quinajarideni  
inajipabaqqujari  
Maraco 8.1-10**

<sup>32</sup>Nadsapi ia pocca dodosse tabaqqi iquejenajaro Jeso itohui huahua napomadsapa iadsa huati tajari: –Madija huapimatohui ohuati cahanariri canani. Huada 3 nehe ohuadsa jahiridsadsapa pohnadeni tapari jicajari. Nema nanipi pohnadenidsa: “Jai tianiji” onanijine jipera onajaro. Pohnadenipa pemi huatiacossaja camarana –nade Jeso.

<sup>33</sup>Naraha pocca dodosse tabaqqi iquejenajaro ettipi: –Naraha iapi madija madide nohuerahihuaji iqueriqquidsapi ¿nejecohuaji madija huapima jipamanahijine dsamatapa mita inapadsaja? –inajarode.

<sup>34</sup>Naraha iadsa Jesopa: –¿Nejecomaha naha pan ticajimanani? –nade. Nadsapi ettia: –Pan 7 naha icaji, aba bedi pamaha icaji nani –inade.

<sup>35</sup>Nadsapa madija huapimadsa Jeso huati tajari: –Jari, jassi tinaridsaji –najari. <sup>36</sup>Nadsapa pan 7 naha pohua dsepedsa inacca, aba pamaha idsaba nadsa Jesopa Diosda huati tajari: –Jehe Abi Dio, epejeni, ticca daniji iadsa bica tahi –nadsapa pan icanabobiridsajari. Icanabobiridsadsapa pocca dodosse tabaqquideni iadsa da inabaqqujari. Iana madija huapimadsa da inabaqquiridsajaride. <sup>37</sup>Nadsapa Jeso canahatori canajarijine pan, aba najari tohuapidsa madija huapima jipamanadsapa accararidsa-manajari. Jipamanahissa taraha mota tojajari. Pan bobi, aba ime mota iana inaccaniridsadsapa quiqui 7 naraha ijiridsade. <sup>38</sup>Aja jipamanajaridenipa maqquideje 4 mil quinajari. Denima poccadeni amoneje, poccadeni ejedenideni naco jipamanajari. <sup>39</sup>Dsotode madija huapimadsa Jeso attipa: –Jehe, jidapanana jai tjaninissa tana –najari. Nadsapa Jeso canoadsa toqquedsanipomajari. Coridsa jippehuaji jajjadsapi dsama Macadaohuaji bacco inajaro.

**Pariseodeni, sadoseodeni  
tedsejepa: –Jeso canahatori  
canahi qqui inana –quinajari**  
*Maraco 8.11-13; Roca 12.54-56*

**16** <sup>1</sup>Jesopa dsama Macadaodsa bacco tadsa nahicca Isaraeri potemahi jodiideni mota \*marinaja onini pariseodsa jehe quinajarideni, \*marinaja onini sadoseodsa jehe quinajarideni tedseje pohua qquide jahijonajari. Pohuadeni bodipa: –Jeso nattome inana, pocca ima tossamonijine –quinadsapa Jesodsa huati toquinajari: –Jeso, pajissa

Diocca dacorehe ticajidsapi memehuaajicca nahatohue bicabote ahuato tinanaji. Qqui inana –quinade.

<sup>2</sup>Naraha pohuadenidsa Jeso attipa: –Tiadenipi maji tocca-cca nadsa memehuaji maccohua ssire-re nani qqui tiquinadsapi: “A, dsemassapi meme bica tanitohui” titiquina najaro. <sup>3</sup>Aji dsidsidsamassa naqui memehuaji maccohua diji tadsa tettidenipi: “Jidapapi jojode, passo caji tani” titiquina najaro. Meme qquide nahatoqquri tiquinaraha aji jidapanacca ima dsati tojajaropi qquide ssamoqquri tiquinani. Diojine ajijaro dsamadsa Cristo-Mesia dsepe ijiridsahi tiadenidsa ahuato taraha tiadenipi ticahattera-jerajaro –nade Jeso. <sup>4</sup>–Jidapana timadimanajarodeni tabaccoraqquri tiquinehe timadimanajaro. Tahidepi tettideni: “Diocca iquejenani” tiquinaraha dsotodepi Pohua Atti tinebomanajaro. Tiadenipi ocanahatoriri cananijine tohuira huati tiquinaraha occa nahatohue onahatona onejerani. Naraha ocanahatoriri cananicca ima ojariena qqui tiquinanitohui. Najaropi \*Jonasocca imassa najaro –nade Jeso. (Aja pohua atti nama najaripa Jonaso pina huatijarissa naraha Diojine tossiajadsa madi-pomajari.)

Nadsapa nahihuaajicca madija inebobaqquidsa Jeso toccapomajari.

**–Paji, marinaja onini pariseo,  
marinaja onih onini sadoseo  
naqui tiadenidsa toja-jerana  
–najari Jeso**

*Maraco 8.14-21; Roca 12.1*

<sup>5</sup>Nadsapi Jeso pocca dodosse tabaqquideni ia huapimapi coridsa

jippehuaji jaijaraha ijipanijine itapari eti ajimadsapi dsojo inajarade.

<sup>6</sup>Nadsama nahi canoadsa jassi idsa-dsa Jeso iadsa huati tajaride: –Teti-deni huatoji. Marinaja onini pariseo, marinaja onih onini sadoseo naqui pina \*pan ssaja tahijine quequejema tahimarissa najaro. Paji, najaro tiadenidsa toja-jeranijine tiadenipi dacoco tijiraji, onajaro –nade Jeso. <sup>7</sup>Pohua atti nama nadsapa iara ojidsa huati icanirere canade: –¿Nejecotohui pohua atti nama najari? Aji ijipanijine pan icappirajarocca huati tajarirana –inade. <sup>8</sup>Naraha Jesopa ibodi nahato tadsa huati tajari: –Jaho, ticcadeni jehenijipi badsira tani. ¿Nejecotohui ohuadsa: “Jehe, Jesopa ia tonajipabaquihijine pajirahi” tiquinejerani? ¿Nejecotohui pan ticappiramananicca imadsara imahaha ticanajaro? <sup>9</sup>¿Nejecoma nadsa ticahatteranjine? Tibodideni huatomaji. Madija 5 mil quinaraha pan 5 naha dside onariridsadsa jiparidsamanajaride. Mota tojadsapa quiqui ijiridsahi qqui tiqunaraha ¿tetideni ajimajaroqui? <sup>10</sup>Aja madija 4 mil quinaraha pan 7 naha dside onariridsadsa jiparidsamana-pomajaride. Motapa quiqui ijiridsahi qqui tiquinapomarahe ¿tetideni ajimajaroqui? <sup>11</sup>¿Nejecotohui occa mari-najadsa tibodideni huatoma-jerajaro? Pancca ima huati onejerapa. Aji pariseo, sadoseo najaro marinajassa tinanamana-jeranijine dacoco tijiraji, onajaro. Najaro marinaja pamehepi tojaribaquui tani. Pina pan ssaja tahijine quequejema tahimarissa najaro –nade Jeso.

<sup>12</sup>Nadsana ibodi huatoma-jararo. Jesopa pan ijipanijinecca quequejema tahimaridsa ia mari

tocanabaquijaripa marinaja pariseo, marinaja sadoseo iadsa toja-jeranijine huati huati tajari inade.

–**Jesopa Cristo-Mesia –najari Pedro**

*Maraco 8.27-30; Roca 9.18-21*

<sup>13</sup>Dsotode Jeso, pohua huatimadedeni ia inadsa odsa panani Sesarea de Piripohuaji jaijajaro. Jahui jaijadsa Jeso iadsa huati tajari: –Madijapa ohua Madija Bedi otahimari huati huati nanaridsamana nadsapa ohuadsa attideni ¿nejecoma nejecoma quiquinanajari? –nade Jeso iadsa.

<sup>14</sup>Naraha ettipi: –Tiadsa madija motapa: “Huan Baotista tijani” quiquinanajari. Ohuahadenipa: “Maittaccadsamacca Dio Atti cacomerabote Eria tijani” quiquinanajari. Ohuahadeni naco: “Maittaccadsamacca Dio Atti cacomerabote Jeremia tijani” quiquinanajari. Madija ohuaha attideni naco: “Maittaccadsamacca Dio Atti cacomerabote ohuaha tijani” quiquinanajari –inade Jesodsa.

<sup>15</sup>Nadsapa Jeso iadsa huati tajari: –Naraha tiadenidsapi ¿nejecojari ojani? –nade.

<sup>16</sup>Naraha manaco Pedro huati tajari: –Tiapi \*Cristo-Mesia tijani. Dio camitta tajari Bedi tijani –nade.

<sup>17</sup>Nadsapa Pedrodsa Jeso attipa: –Jehe Ssino, tiapi \*Huanocca ejedeni tijajaro. Diopa tiadsa ima bicani inanajaro. Aji otahimari nahato tinajaropi madijajine jerani. Occa Abi memehuaji madijarina otahimari Cristo-Mesia ojani tiadsa ahuato inanajaro. <sup>18</sup>Jidapapi tia

onipi “Pedro” onajaro. (Ettidsapi: Siba, inajaro.) Tiapi otahimari mari ticanabaquidsapa ohuadsa pajissa quinajarideni tohuapiridsa-hitohui. Nadsapi \*otahimaridsa quequeriquimana nahijinecca tojaridsanijine. Najaro otahimari-dsa quequeriquimana nahiccapi dacorajaro, pina sibassa najaro. Amossi nanijine ssamo tajaro. Dsoqqehecce dacorehe naqui otahimaridsa quequeriquimana nahicca inajicanijine pajira-jerajaro. <sup>19</sup>Pedro, occa dacorehe tiadsa onananitohui, tetti dacoranijine. Najaropi pina Diocca cacahuehecce noccobijicca pipico tiadsa da onajarissa nahitohui. Madija otahimari mari ticanabaquidsa pajissa quinadsapa Diocca cacahueheda toquejenahitohui. Pina Diocca cacahuehecce noccobiji pohuadenidsa ticanahabajarossa nanitohui. Tetti dacorajarojine naqui ajijaro namicca imadsa: “Jehe, bica tani” tadsapi Dio memehuaji madijari naco: “Jehe, bica tani” nahitohui. Naraha ima onihidsa: “Najaropi poni, bica tejerani” tadsapi Dio memehuaji madijari naco: “Poni, bica tejerani” nahitohui –nade Jeso.

<sup>20</sup>Nadsapa pohua huatimade iadsa Jeso pohua attipa: –Ohuapi Cristo-Mesia ojani madija ohuahadenidsa tecomamanaccana –nade.

**Jesopa pohua dsoqqehecce  
ima huati tapojari**

*Maraco 8.31–9.1; Roca 9.22-27*

<sup>21</sup>Dsotode Jeso pocca dodosse tabaqqi ia mari tocanabaquidsapa ajama najaride: –Occa Abicca dossenijidsa odsa panani Jerosarehuaji occanitohui. Nanidsa

\*jodiodeni ime jochuideni, \*dada toqqimade tamedeni, jodio-denicca marinaja maridedeni quinajaridenijine najidsohue imeni ocasserani onahananitohui. Nadsapi ohua inanadsoqqe-mananitohui. Naraha ohua ppa idsamanaraha huada huatinimade tojari nadsapi Abi Dio ohua nahatonihitohui –nade Jeso.

<sup>22</sup>Naraha Pedroa Jeso iaccacca nadsa huati tajari: –Jidacca ima huati tinajaro ticca ima nema najaro imapi huati tina tejeraji. Diopa tidsoqueni jipera tahi. Dio tia cacahuahi –nahi nade Pedro. <sup>23</sup>Naraha Jeso tahide huajanidsa Pedrodsa huati tajari: –¡Paji, otedsejemapi! Ohua teccocco tejeraji, onajaro. Tettipi pina maidsehe jinede Satana attissa nani. Diocca dossenijidsa ibora onanijineraha tettidsara ibora onadsapi Dio jipa tahicca onanajeranitohui. Tiapi Dio jipa tahicca ssamo tinani. Madija tohuini quinariccana nahato tinajaro –nahi nade Jeso Pedrodsa.

<sup>24</sup>Nadsapa Jeso pohua huatimade iadsa denima huati huati tajari: –Aji “Jesocca madija iquejenana” tiquinadsapi tiadeni tohuini tiquinanicca tohui tetideni ajimanaji. Ohuadsara disseraqqiri tiquinaji. Madija tiadenidsa: “\*Ahua porimacossanidsa tidsoqqeji” quinadsa naco: “Jehe, odsoqueni bica tani. Jeso onebojarahi” titidsanapomana nana, onajaro. <sup>25</sup>Tiadenipi ticcadeni madie ohuadsa teccoramanadsapi madija tiadeni tonajicabaqqimanaraha camittehe jiquejericca ticajimana-dsanaponitohui.

Naraha madija ohuahapa pocca madie ohuadsa eccocodsapi, pina ajijaro namidsa madi-dsanapohuijine tohuinira nadsapa najaripa dsoqquehitohui. Dsoqquedsapa camittehe jiquejeranicca caji-jarahitohui –nade Jeso. <sup>26</sup> –Madija naco ajijaro namicca biquehe tohuini madidsa, ajijaro dsamacca ima deni tojanicca tohuini madidsa naco huapima pahuadsa tojaraha Diotohui najaradsapa nidsa pohua dsoqquedsa jororoni jiquejeranicca dsori tajarahitohui. Nadsapa pohua cajijaricca huapima ponima tojanitohui. Pohua pohua cajijariccasda camittehe jiquejeranicca mitta inanijine ssamo tani. <sup>27</sup>Naraha ohuapi Madija Bedi ojajaroa nidsaranibote Abi Dio ssiejenema pocca dodosse tabaqqi memehuajicca tedseje occaronapomanitohui. Nadsapa madija madihissa tajari pocca madie tonanabicadsa Diosda dsepe ijjaripa nidsa pahuadsa denima bica tanicca da onanitohui. Madija ohuadsa dissera tajarajari Diosda badsira tehe dsepe ijjaripa bica tanicca badsira tehe pahuadsa da onanitohui. Naraha madija ima bica tajarodsda dsepe ijjaradsapa occa daniji cappirahitohui. Madija ima tabaccora tajarodsda dsepe ijjaripa occa najidsohue cajihitohui. <sup>28</sup>Ohuapi pajissara tiadenidsa huati onajaro: Ajidsa tidomodeni huajaro motadenipi tidsoqquemana-jeraccadsama ajijaro titedsejemadenicca ima qqui tiquinanitohui. Najaroa aji ohua Madija Bedi ojajaroa nidsaranibote madija ohuacahuabaqquihijine occa deni tojehema occaronapomanitohui, onajaro –nade Jeso.

**Jeso assire tojidsa,  
jidseremani najari**

*Maraco 9.2-13; Roca 9.28-36*

**17** <sup>1</sup>Jeso pohua tedsejemacca ima huati tahi nattini huada 6 nadsa ssonohuaji Jeso toqqemoradsapa Pedro, Satiaco, Huano quinajaridenira iaqqemorabaqquijari. Jai tojemoradsapa ssono tetepihuaji bacco tomoramanaajari. <sup>2</sup>Nahidsa qqui toquinanaja Jeso pano todsibehijaro pina maji ssiejenessa najari. Pocca etero naqui tonopojaro pina ssiaja tajarossa najaro. <sup>3</sup>Nadsapa qqui toquinanaja Eria, \*Moisesi tedseje Jesodsda ahuatamanadsa imahaha canajari. (Pohuadenipa maittaccadsamacca Dio Atti cacomeraqquri najarideni.)

<sup>4</sup>Nadsapa Pedro Jesodsda huati tajari: –Ohua Medsede, iapi ajidsa iquejenadsa bica tani. Ticcadeni odsa huahuaqquide 3 canehe inahatona. Nadsapi tiadsa, Moisesidsa, Eriadsa cananijine –nahi nade Pedro. <sup>5</sup>Pedro huati huati nanaja pohuadeni tetepihuaji essen dsibehi tajaro ccaronajaro. Ccaronadsapi pohuadenidsa ijihuajanijaro. Nadsapa nahi essen bodidsa atti qquenajaro: –Ajajaripa occa Ejedeni. Pahuadsa ohuati huana tajaro. Pocca ima bica tajarojine ohuatidsejaro. Pohua atti timittamananissa taji –nahi nade Dio.

<sup>6</sup>Nadsapa Pedrodeni atti mohuini mittamanadsa cappinamanadsapa pohuadeni baccohuaji domodeni pona najari. <sup>7</sup>Nadsapa Jeso pohuadenihuaji ccanijari. Bara inabaquidsa pohua attipa: –Titehemamanaji, ticappinamana tejeraji –nahi nade. <sup>8</sup>Nadsapa totehemamanadsa qqui toquinanaja

Jesodsa madija ohuahapa nohuerajari. Pohua motta hua canajari.

<sup>9</sup>Nadsapa ssonohuaji jahidsippanidsa Jeso pohuadenidsa huati tajari: –Aji ssono tetepidsa qqui tiquina-jarocca imapi tecomamanaccana. Ohuapi Madija Bedi ojajaroa nidsa odsoqqueni nattini onahatonidsana najaro ima tecomeramananjine bica tani –nahi nade.

<sup>10</sup>Nadsapa Jesodsa huati toquinajari: –¿Nejecotohui jodiidenicca marinaja maridedeni attipa: “Cristo-Mesia ccajona-jaraccadsama Dio Atti cacomera-bote Eriana tahide ccanipohuitohui” quiquinanajari? –quinahi nade pohua huatimade 3 quinajarideni.

<sup>11</sup>Nama quinadsapa Jesoa: –Pajissa, tahidepa Eria ccanipohuitohui, ima huapima icattemaridsaponijine. <sup>12</sup>Naraha ohuattipi: Eriapa ccanipode, onajaro. Aja Eria dsoqquejari ccanipo-jararaha madija ohuaha pina pohuassa najari ccajonadsa ima icattemaridsapode. Naraha pohuadsa noccodeni jidsa-qquiri nadsa nacasserehe pohuadsa inanamanade. Najarossa najaro nidsa ohua Madija Bedi ojajaroa ohuadsa naco nama quinadsapa ocasserani onahananitohui –nahi nade Jeso. <sup>13</sup>Pohua atti nama nadsapa pohua huatimadedeni bodideni huatomanajari: –Ja... Jehe, Eria tahimari-raha imapi Huano Baotistana paja. Pohuana madijacca ima cattemadede ccaridsapode –quinahi nade.

**Ejedeni bodidsa tocorime madsaraha Jeso dosse ininejari**

*Maraco 9.14-29; Roca 9.37-43*

<sup>14</sup>Nadsapa Jeso, pohua huatimade 3 quinajarideni tedseje jahidsippanidsapa madija toqueriqquihihuaji

bacco nanimanajari. Nahidsa madija ojaria Jesodsa huati tahijine ccajonajari. Jesohuaji bacco najonadsapa pohua bodi: –Jesopa deni tojahi, ohuapi ajimani ojani –nadsa Jeso baccohuaji pohua pitodsa huitta tocattedsa najari. Nadsapa Jesodsa huati tajari. <sup>15</sup>Pohua attipa: –Ohua Medsede, occa ejedenidsa teti huana taji. Huatiajojo comani cajijari. Ocasserani imeni inahana-jaro. Najaro comani quidsa nadsapa pitora pitora naridsajari. Dsippodsa naco ssonidsanaja naridsapohui nanaja najari. Passodsa naco je taja naridsapohui nanaja najari –nade. <sup>16</sup>–Nadsama ticca dodosse tabaqquidenidsa occa ejedeni ohuaccajonajari naraha inanomimanahijine ssamoqquri napa –nade imehi atti. <sup>17</sup>Nadsapa Jesoa: –Jaho, madija huapima Diodsa jehe tiquinanissa tejerani. Ajijaro namicca ima bica tejeranicca ticajimaneje najaro. Tiadeni mari mari ohocanabaqqi naraha ¿nejecoma nadsa ticahatterapadseje? Ticcadeni jeheniji pajiranissa tejeradsapi ohuadsa ocassera taraha ¿nema nehe onahana-dsanaponijinequi? ¡Jari, ticca ejedeni ohuadsa teccajonajo! –nade Jeso.

<sup>18</sup>Nama nadsapa Jesohuaji ejedeni coma tajari eccajonamanajari. Nadsapa Jeso ejedeni bodicca dosse ininehijine huati tajari: –¡Tocorime tabaccorabote! ¡Ejedeni tinebodsas tiqqenaji, onajaro! –nade. Nadsapa quenadsa amadsati ejedeni coma tajaripa tonomijari.

<sup>19</sup>Nadsapi dsotode ia pocca dodosse tabaqqi ia motta Jesodsa huati inade: –¿Nejecotohui iaha ajajari ejedeni bodicca dosse

innehijine ipajira-jerapa? – inajarode. <sup>20-21</sup>Naraha Jeso pohua attipa: – Tipajiramana-jerajaropi tibodideni Diodsa jehe tiquinanissa tejerajaro. Pajissara tiadenidsa huati onajaro: Ticcadeni jeheniji badsira tehe pina \*mostaza nocco badsira tajarissa nehe ticajimanadsapi ssamo tanicca tinanamananijine tipajiramananitohui. Pina ajaro ssonodsa huati tiquinadsa: “Ajicca-huaji ticcaji” tiquinadsapi tettidenidsa ssono poni ehuerani toccanitohui, onajaro. Nadsama ticcadeni jeheniji dacoradsapi tiadenidsa ima ssamo tanicca nohueranitohui, onajaro –nade Jeso.

**Jesopa pohua dsoqquehicca  
ima huati tapomajari**

*Maraco 9.30-32; Roca 9.43-45*

<sup>22</sup>Nani dsama arobeni Carireahuaji Jeso tedseje jaijaridsadsa iadsa Jeso huati tajaride: –Aji ohua Madija Bedi ojararopi nidsa dsotode madija ojaría ohua ccaccoradsapa madija dsepedenidsa ojanitohui. <sup>23</sup>Nadsapi ohua inanadsoqque-mananitohui. Ohua ppa idsamanaraha huada huatinimade tojari nadsapi Abi Dio ohua nahatonihitohui –nade Jeso. Najaro ima huati tadsapa ibodi qquedsa nade.

**Diodsa dada toqquimahuaji  
cacahuanijine  
madijacca dsiniro mota  
nanaccadedenicca ima**

<sup>24</sup>Nani odsa panani Capernaohuaji bacco inanidsapi iahuaji dsiniro nanaccadedeni bacco quinajari. Pohuadenipa madijacca \*dsiniro mota ihinaccamana najaro, Diodsa dada toqquimacca

odsa ecahuamananijine. Nadsapa Pedrodsa huati toquinajari: –¿Nija? Tiadeni maridepa pocca dsiniro mota Diodsa dada toqquimacca odsa cacahuanijine ¿da da nattaco? –quinahi nade. <sup>25</sup>Naraha Pedropa: –Jehe, da da nahi pohuapa –nahi nade.

Dsotode Pedro odsahuaji qqe-dsimanidsapa Jeso dsinirocca ima Pedrodsa huati tojidsapojari: –¿Nija Ssino, nejecoma tani tibodi? Ajijaro namicca taminedeni ¿poccadeni madijacca dsiniro mota ihinaccamana najaroqui? ¿Madija ohuahadeni poccadeni dsamadsa madimanagericca dsiniro motana ihinaccamana najarorane? –nade. <sup>26</sup>Nadsapa Pedro ecomerajaro: –Dsama onihicca, dsama onihicca jahijonajaridenicca dsiniro motana ihinaccamana najaro –nade. Nadsapa Jeso atti: –Nama nadsapa tamine pocca dsamacca madija paca paca quiquinana-jarahi. <sup>27</sup>Naraha iapi dsama onihicca madija iquejena-jeraraha Diodsa dada toqquimacca dsiniro nanaccadedenidsa ima ocassera tejeranijine pohuadenidsa dsiniro da inana. Jari, aba corode coridsahuaji tiqquedsippaji. Tahidecca huana tapojari ajaridsa qqui tana. Nanidsapi dsiniro qqui tinanitohui. Najaro dsiniro tididsa dsiniro nanaccadedenidsa da tinadsapi occa, ticca naqui pajiranissa tanitohui –nade Jeso. Nadsapa Pedro Jeso attissa inanajaro.

**–¿Nejecojarina deni tojajari?  
–quinajari**

*Maraco 9.33-37; Roca 9.46-48*

**18** <sup>1</sup>Nadsapi ia Jesocca dodosse tabaqqui Jeso pohuada huati inajarode. Ettipi: –Dio

memehuaaji madijaricca cacahuehedsapi ¿nejecojarina deni tojajari?

– inajarode. <sup>2</sup>Naraha Jesopa ejedenitohui huahua nade. Ejedeni ccajonadsapa idomo huahuajanini nocconidsa ejedeni inahua najari.

<sup>3</sup>Nadsapa Jeso huati tajari: – Pajissara tiadenidsa huati onana: Tibodi pina ejedeni bodissa nanijine tecajiquimera-jeradsapi Diocca cacahueheda tija-jeranitohui. <sup>4</sup>Diocca cacahueheda madija denima bica tajaripa: “Deni ojani” najarajari. Puhuapa pina ajajari ejedenissa najari. Puhua bodipa: “Ohuapi ajimani ojani, Diodsara ibora onani” nanaja najarina deni tojajari Diodsa. <sup>5</sup>Ajajari ejedenissa najari-dsa tetideni huanaquuri nadsapi ohuadsa naqui tetideni huanaquuri najaro –nade Jeso.

**Imasiri tinanadsapi oppina tanihuaji ticcanitohui**

*Maraco 9.42-48; Roca 17.1-2*

<sup>6</sup>Jesopa denima huati huati tajari: – Nadsama madijapa puhajine ohuadsa jehe quinajarideni imasiri inanamanadsapi puhuadsa najidsohue oppina tanicca ssonarinitohui. Ejedeni ohuadsa jehe quinajarideni naco madija imasiri mamaridejine imasiri tocahatteradsapa aja imasiri mamaride puhuadsa najidsohue oppina tanicca ssonarinitohui. Pina ajijaro imassa najaro: Siba ccanajabote puhua mattodsa ssoque dsanadsa passo imeni dsaja tanihuaji je tahijine cco todsippadsapa oppina taraha najidsohue denima oppina tanicca puhuadsa ssonarinitohui. <sup>7</sup>Jaho, ajijaro namicca imasiripi jiquejerani. Aji namidsa

timadimanajaropi ima tinanamananijine caji tani. Paji, nema najarodsa imasiri tinanamana tani. Naraha madijajine imasiri tinanamanadsapi puhuadsa ima denima oppina tanicca ssonarinitohui. Madija nama najaripa manaco Diona inajidsohuitohui.

<sup>8</sup>– Nadsama imasiri tinana-jeranijinepi tibodi daco tijiradsa poni taji. Pina tidsepedsa imasiri tinanabote naraha daco tijiradsa poni taji. Nema tadsapi pina tidsepe ca ticajidsajarossa najaro. Tidsepe cajarie amossi canaraha Diocca cacahueheda timadidsapi tetidsenitohui. Naraha imasiridsa dissera tinadsapi pina tidsepe capamehe ticajjarossa naraha jororoni jiquejeranihuaji tia coro todsimahitohui.

– Nadsama imasiri caji tanihuaji ticcanijine naqui tohuini taraha poni taji. Nema tadsapi pina temori ca ticajidsajarossa najaro. Temori cajariraha Diocca cacahueheda timadidsapi tetidsenitohui. Naraha imasiridsa dissera tinadsapi pina temori capamehe ticajjarossa naraha jororoni jiquejeranihuaji tia coro todsimahitohui.

<sup>9</sup>– Nadsama tinocodsa naqui tohuini tanicca qqui tinadsa imasiri tinananijine tohuini taraha daco tijiradsa poni taji. Nema tadsapi pina tinocco huari, joca, jeo, coro tinajarossa najaro. Tinocco ojariraha \*Diocca cacahueheda timadidsapi tetidsenitohui. Naraha imasiridsa dissera tinadsapi pina tinocco pamehe ticajjarossa naraha jororoni jiquejeranihuaji tia coro todsimahitohui –nade Jeso. <sup>10-11</sup>– Tibodideni tettidenima tiadeni tecahuamananissa taji.

Madija ohuadsa pajissa najaridsa tettidenipi: “¡Samo tinani!” tiquina tejeraji. Occa madija ajamani tinanabaquimana tajarajo, onajaro. Occa Abi Dio memehuaji madihidsapa pocca dodosse tabaqqi occa madija cacahuade madimanajari. Najaridenipa Abi Dio Pohua pano naco qqui qqui dsanapomanajari –nade Jeso.

**Edede amossi najari tahimari**

*Roca 15.1-7*

<sup>12</sup>Nadsapa Jeso ia mari tocana-baqquijari: –Ajijaro ima tibodidenidsa ¿nejecoma tiquinani? Jari, tiadenipi ticcadeni edede 100 naha ticajimanadsapa onideni hua tiquinadsa ojaría amossi nadsapa ¿pohuatohui qquide jai tija-jeraqui? Jehe, edede jinedepa pocca edede qquide toccahitohui. Pocca edede 100 naha cajiraha ojaría amossi nadsapa 99 tojajari. Pocca edede 99 naha huamonihuaji inebobaquidsapa ojaría amossi najari qquide



tocchitohui. <sup>13</sup>Pocca edede bacco inanidsapa huatidsehitohui. Pocca edede 99 naha amossihuaja-jaradsa naco huatidse tahi. Pajissara tiadenidsa huati onajaro: Edede jinedepa pocca edede amossi najari bacco inanidsapa denima huatidse tahi. <sup>14</sup>Najarossa najaroa ticcadeni Abi Dio memehuaji madijaria pocca madija ojaría pocca cacahuehdsa amossi nahijinepa jipera tajari. Madijapa Dio Pohuadsa tohuajiraha pohuadsa tojanipomahijine jipa tajari –nade Jeso.

**Imecote iadsa imasiri  
inanaraha pocca imadsa eti  
ajima dsanaponijinecca ima**

*Roca 17.3*

<sup>15</sup>Jesopa denima huati huati tajari: –Madija ohuadsa jehe najari timecote tojaraha tiadsa imasiri inanadsapi pohua ojarí nadsa mohuaradsa huati ticanana: “Ohuadsa tijine bica tejerani” tana. Nadsapa pohua cacomeradsapa: “Jehe, pajissa tiadsa nema onanade. Ojine bica tejerani. Jidapapi nema onapoma-jeranitohui” nadsapa manaco pohuadsa: “Jehe, epejena, bica tani” tana. Nadsapa timecote tedseje ticatidserapomanijine. <sup>16</sup>Naraha timecotedsa mohuara-dsa huati tinaraha mitta-jaradsapa timecote ohuaha pamaha tiacca-baqquina, pohuadeni tedseje pohuadsa huati tiquinanijine. Puhuadeni naco pocca ima mittamanahijine. Nadsapa madija pama itide, huatimade tojari nahitide nahatoto tadsapa bica tahi. Mohuaradsa imahaha ticanadsa pohua huati ticanamananaja mittadsapa: “Jehe, epejena” nadsapa timecote tedseje

ticatidserapomanijine. <sup>17</sup>Naraha najarideni atti mitta-jaradsapa otahimaridsa quequeriquimana najarideni tedseje pohuadsa huati tiquinaji. Pohuadeni atti mittadsapa pocca ima tobicanitohui. Naraha otahimaridsa quequeriquimana najarideni atti mitta-jaradsapa pina Diodsa jehe quina-jarajaridenissa nahijine. Imasiri cajijari. Pohuapa pina romanodenicca taminecca dosseniji dsiniro nanaccadenissa najari –nade Jeso.

<sup>18</sup>Iadsa denima huati huati tajari: –Pajissara tiadenidsa huati onajaro. Ajijaro namicca imadsa: “Jehe, bica tani” tiquinadsapi Dio memehuaji madijari naco: “Jehe, bica tani” nahitohui. Naraha ima onihi-dsa: “Najaropi poni, bica tejerani” tiquinadsapi Dio memehuaji madijari naco: “Poni, bica tejerani” nahitohui. <sup>19</sup>Pajissara tiadenidsa huati onapomajaro. Ajijaro namidsa tipamehe Diodsa huati tiquinanijine jehe ticaniredsapi occa Abi memehuaji madijaripa ticcadeni huatinaja mittahitohui. Pohuapa ticcadeni huatinaja tiadenidsa inananitohui. <sup>20</sup>Jehe, ohuadsa jehe tiquina-jarodenipi tipama nitide, denima tetimade ojaria itide otahimaridsa titiqueriqui nadsapi nani tiqueriquinidsa ohua naqui ohoquejema najaro –nade Jeso.

<sup>21</sup>Nadsapa Pedro Jesodsa tohuajiressidsa pohuadsa huati tajari: –Ohua Medsede, ohueme-cotepa ohuadsa tabaccorehe inanjaro. Dsotode naqui ohuadsa imasiri inanjaro. Dsotode naqui ohuadsa tabaccorehe inanapomajaro. Nama dsanapojari. Naraha ohuapi: Pohuadsa ohuadi-jevani, onajaro. Dsotode

naqui ohuadipoma-jevani. Dsotode naqui ohuadipoma-jevani. Nema onapomajaro. Nema onapomajaro. Naraha ¿nema odsanaponijinequi? onajaro. Aji pocca nacasserehe ohuadsa onihi, onihi, onihi 7 nehe bacco tadsapi ¿nadsana pohuadsa ohuadinijinequi? –nade Pedro.

<sup>22</sup>Naraha Jesopa: –Paji, nema tejeraji. Nacasserehe onihi onihi onihi tassaquini 70 denima 70 denima 70 dsanaporaha “Manaco” tejerana. Titessecca imadsa teti ajima dsanapona, onajaro –nade Jeso.

**Tamine biji accodepa  
pohuadsa debe najaridsa:  
–Epejena –najarajari**

<sup>23</sup>Jesopa ajijaro namidsa imadidnicca ima tadsajani mari icanabaquijari. Pohua attipa: –Jehe, Diocca cacahuehecca imapi pina tamine pohua biji accodedenicca cuenta icattemaridsanijinecca imassa najaro. <sup>24</sup>Taminepa pohua biji accodedenicca cuenta icattemanijine huahua inabaquijari. Jahijonajari, bacco najonamanadsapa tamine biji accode ojariana pocca cuenta deni tojadsapi najarina taminehuaji iaquedsimamanajari. Najaripa dsiniro imeni pina 10 mil nehe debe najari. <sup>25</sup>Naraha aja debe najari pocca cuenta paca nahijine cappiradsapa tamine pohua biji accodedeni icadossebaquijari: “Jari, pocca cuenta paca nahijine pohua dsopetaji nemanehe dsiniro-tohui da tiquinaji. Nadsama pohua, pocca amoneje, pocca ejedeni naco manaconedenitohui da tinabaquimanajo, \*madijacca dodosse

tabaqqi toquejenahijine. Nadsapa najari manaconedenidsana pocca cuenta jicanijine pajirani” najari tamine atti. <sup>26</sup>Naraha tamine biji accode dsiniro imeni debe najari pocca tamine atti mittadsapa nahi tamine baccohuaji pohua pitodsa huitta nadsa ojiema huati huati tajari: “Jaho, ohua medsede, nidsa ia da tinabaqqi-jeraccaji. Tia paca onanissa tanitohui, omaidsa-jerani” najari. <sup>27</sup>Nama nanaja taminepa pohuatohui huati tohuanahi nadsa: “Jehe epejeni. Bica tani” najari. “Jidapapi ticca cuenta oneboni. Epeje onani” najari.

<sup>28</sup> –Nadsapa tamine biji accodepa toccaniraha pohua tesse pohuadsa debe najari bacco ijidsajari. Najaripa pohuadsa badsira tehe debe najari, pina dsiniro ccarara 100 najaro. Naraha tamine biji accodepa pohua tesse pohuadsa debe najari bacco ijidsadsapa pohuadsa debe najari acconi ssiporidsa dama niqiu inadsa huadiema pohuadsa huati tajari: “¡Jari, ohuadsa ticca cuenta paca taji!” najari. <sup>29</sup>Naraha pohua tessepa pohua pitodsa huitta nadsa ojiema huati huati tajari: “Jaho, otesse, nidsa tia paca onanitohui, omaidsa-jerani” najari. <sup>30</sup>Naraha pohuadsa debe najari attidsa jehe najaradsapa: “¡Poni! Ohua paca tejerade. Nadsapi toponi cocorodsa tedsaji. Ticca cuenta paca tanissa tadsana tiqquenanijine” najari. Nadsapa coru idsimajari.

<sup>31</sup> –Naraha tamine biji accode ohuahadeni pohua tesse inajidsohui qqiu toquinadsapa nacasseraqqiuri nadsa najaro ima poccadeni tamine-dsa huati tanimanajari. <sup>32</sup>Nadsapa

tamine aja pohua biji accode dsiniro imeni debe najari tohui huahua napomajari. Ccanidsa najaridsa tamine attipa: “Tiapi obiji accode tabaccorabote tijani. Ajina, tiapi dsiniro imeni ohua debe taporaha ohuadsa huati huati tinadsa ticca debe epeje onanajaro. <sup>33</sup>Naraha tiapi titesse tiadsa debe najaricca debedsa epeje tejerajaro. Ohuapi tiadsa ohuati huana tade. Tia naqui pina ohuassa tadsapi titessecca debedsa epejena tanitohuiraha” najari pocca tamine. <sup>34</sup>Nadsapa tamine huadidsa pohua biji accode inajidsomanahijine dosse inabaqqi-jari: “Ajaripa ohuadsa pocca cuenta paca najaradsapa tinajidsomanadsanapojo” najari. “Pocca cuenta nemaneha paca nahissa tadsana toccanijine, onajaro” najari tamine atti –nade Jeso.

<sup>35</sup>Nadsapa Jeso denima mari icanabaqqijari: –Aja, occa Abi memehuaji madijari naco tiadenidsa nama nahitohui. Timecote tiadenidsa nacasserehe inanaraha tiadenipi: “Manaco, manaco” tiquinadsapi Abi Dio naco ticcadeni tabaccorehe epeje inana-jeranitohui, onajaro. Titesseccanica ima tiadenidsa ocassera taraha epeje tiquinaji. Pohuadenidsa pina tetideni huanacquiri naji, onajaro –nade Jeso.

**Jesopa amoneje nebo nebocca  
ima mari icanabaqqijari**  
*Maraco 10.1-12; Roca 16.18*

**19** <sup>1</sup>Nadsapa Jeso dsama arobeni Carireahuajicca madija mari icanabaqqiura jicadsapa dsama arobeni Jodeahuaji toccajari. Hueni Jordao jippehuaji toccadsapa

dsama arobeni Pereaahuaji bacco tajari. <sup>2</sup>Madija sibema pohuadsa jai tojadsapa comaquiqui najarideni Jeso inanomibaquiquiaride.

<sup>3</sup>Naraha nahidsapa Isaraeri potemahi jodiodeni mota \*marinaja pariseodsa jehe quinajarideni Jesodsa jiperaquiqui nadsa pocca marinaja inassamomananijine ima najoramanajari. Jesodsa tohuajiressimanadsapa pohuadsa huati toquinajari: –Aja ¿maquideje pocca amonejedsa jipera tadsa inebodsapi pohuadsa ima nohueraqui? –quinade.

<sup>4</sup>Naraha Jeso pohuadenidsa huati tade: –Dio Atti dsodo nani hua hua titiquina naraha ¿ajijaro ima tetideni ajimamanajarorane? Maittaccadsama Dio dsama inahatoponipi Pohuajinena madija toquejenapodsapa ajima najaro:

“Maquideje, amoneje tadsajani inahatobaquiquiari. <sup>5</sup>Nema najarojinea maquideje pohua bedimenidsa tojadsapa imehi imenidenidsa nebo, pohuadenira madimanajari. Nadsapa pamaraha pina ojarijarissa quinajari” nahi nade Dio Atti Moisesijine dsodo nanidsa.

<sup>6</sup>Nadsapa assiredeni pamaraha cacajiredsapa Diojine pina ojarijarissa dsanapohuijine. Nadsama Diojine pina ojarijarissa quinaraha caneboredsapa bica tejerani. Madija ohuaha atti noppine caneboredsa naco bica tejerani –nade Jeso.

<sup>7</sup>Naraha marinaja pariseodsa jehe quinajari attidenipa: –Naraha ¿nejecotohui Moisesicca marinajapi ajima naha? “Maquideje pocca amoneje inebonijinepi nebohuecca papeo dsodo inadsa ponidsa da

inadsa inebodsapi pohuadsa ima nohuerani” nani nade –quinajari.

<sup>8</sup>Naraha Jeso huati tajari: –Najaropi maittaccadsama ticcadeni idideni huaribodeni sibaquiqui nadsa nebohue tohui quinadsapa Moisesi najaro marinaja pohuadenidsa dsodo inajarode. Naraha Dio dsama inahatoponipi amoneje nebo neborca imapi nohuerraccade. <sup>9</sup>Tiadenidsa huati onana: Ticcadeni amoneje nebomana tejerari. Ticca amoneje tinebodsamoneje onihiticaquiqui imasiri tinanajaro. Diocca dosseniji naqui tecahua-jerajaro. Naraha ticca amoneje maquideje ohuaha inajadsana “Onebona” tadsa tinebodsapi tiadsa ima nohuerani –nade Jeso.

<sup>10</sup>Nadsapi ia Jeso huatimadeni pohuadsa huati inade: –Jaho, amoneje ineboni oppina tadsapi ia motta amoneje jirehe imadidsana bica tani –inade.

<sup>11</sup>Nadsapa Jeso iadsa huati tade: –Jehe, naraha madija huapimapa amoneje jiraha pajiramanajarahi. Diojine madija motana najaro imadsa pajiramanajari. <sup>12</sup>Ima onihionihicajimanajaripa amoneje cajimana-jarajaripaja. Mota ojari ojari quinahapa tossoamanapohuidsama amoneje cajimanahijinepa ssamoquiqui najari. Madija motapa pohua ime inajidsomanadsapa amoneje ajade ssamoquiqui najari. Maquideje motapa pina amoneje ajade pajiramanajarahi. Pohuadeni attipa: “Diodsara idsepe ijidsa icca ima ojari nanijine” quinajari. Ajijaro imapi madija huapimacca jerani. Madija mota ojari ojari quinajaridenicca ima. Pohuadenipa: “Jehe,

nema onana” quinadsapa nema  
ihinanamana najaro –nade Jeso.

**Jesopa: –Abi, ticca biquehe  
ejedenidsa tinanaji –najari**  
*Maraco 10.13-16; Roca 18.15-17*

<sup>13</sup>Nadsapa madija poccadeni  
ejedeni Jesodsa eccajonabaqqui-  
manajari, –Jeso tatideni bara  
inabaquidsa Diodsa huati tahijine  
–quinadsa. Naraha Jeso huatimade-  
deni attidenia: –¡Ejedenipa pohua!  
¡Jesohuaji teccajonabaqquimana  
tajarajo! –quinade. <sup>14</sup>Naraha Jeso  
pohua huatimadedeni attideni mitta-  
dsapa: –¡Poni, nema tiquinejeraji!  
Pohuadeni jahijonana, onajaro.  
Eccajonabaqqui-manahijine tecossa-  
mana tejeraji. Madijapa pina ajajari  
ejedenidenissa quinajarina Diocca  
cacahuehdsas toquejenahitohui  
–nade.

<sup>15</sup>Nadsapa ejedeni ojari ojari  
tatideni bara, inebo, bara, inebo  
naridsajari. Jicadsapa Jeso tocca-  
jaride.

**Madija dsepe sse tajari Jesodsa  
huati tajari**

*Maraco 10.17-31; Roca 18.18-30*

<sup>16</sup>Jesopa denima toccaraha  
madija pohuahuari ccajonajari  
attipa: –Nija Mamaride ¿nejeco ima  
bicani onanadsana camittehe jique-  
jeranicca bacco onanijine? –nade.

<sup>17</sup>Naraha Jesopa: –¿Nejecotohui  
ohuadsara ima bicanitohui huati  
tinajaro? Ima bicani jinedepa Diona  
paja. Pajissa. Naraha camittehe  
jiquejeranicca bacco tinanijinepi  
Dio pocca dossenijidsara ibora tinaji  
–nade.

<sup>18</sup>Naraha dsabisso attipa:  
–¿Nejecomanajaro Diocca

dossenijidsara ibora onanijine,  
tajaro? –nade. Naraha Jeso attipa:  
–\*Diocca dosseniji Moisesi dsodo  
inajarocca nahato tinani. Najaropi  
ajima najaro: “Madija tinana-  
dsoque-jarajo. Madija ohuahacca  
amoneje tija tejeraji. Tiboti tejeraji.  
Maidsehdsas naqui madijadsa  
ponima ima tinahana tejeraji” nani  
Diocca dosseniji. <sup>19</sup>Onihi naqui:  
“Ticca abi, ticca amidsa bica tina-  
dsas tinamadibaqquihissas tajo.  
Tinoricadsas naqui teti huana taji,  
pina tia tiadsas teti huana tajarossa  
taji” nani Diocca dosseniji Moisesi  
dsodo inajaro –nade Jeso.

<sup>20</sup>Naraha dsabisso attipa:  
–Najaro marinaja huapimapi  
ohuacahuajonajarode. ¿Naraha  
nejeco imara ohuadsas dsori tacca-  
jaro? –nade.

<sup>21</sup>Naraha Jeso pohuadsas huati  
tade: –Tipajiranissas tanijinepi  
ajima taji: Ticcanidsas tidsepetaji  
nemanehes manaconidsas da tina-  
ridsaji. Nani najaro dsiniropi madija  
tohuati nahanaqquri najaridenidsas  
da tinabaqquinijine. Nema tinana-  
dsapi nidsas memehuaji Diocca  
biquehes tiadsas tojanitohui. “Nema  
onana” tadsapi ohuadsas dissaras  
tinaji –nade Jeso.

<sup>22</sup>Naraha dsabisso najaro ima  
mittadsapas: –Jehe, nema onana  
–najarajari. Pohua dsepetajitohui,  
pocca dsinirotohui huati huana  
tajari. Pohuapa dsepe sse taja  
nadsapas bodi ocasseras taha tocca-  
nide.

<sup>23</sup>Nadsapa Jeso ia pohua  
huatimadedenidsas huati tade:  
–Pajissaras tiadenidsas huati onana:  
Madija dsepedeni ssequiri najari-  
denipa Diocca cacahuehdsas

toquejenahijine najo tani. <sup>24</sup>Tiadenidsa huati omanipomana: Pina bani imehibote camellopa etero ssessequi odinidsa toqqeéquimahijine pajira-jarajarissa najari madija dsepe sse tajaripa Diocca cacahueheda tojahijine ssamo tani –nade Jeso.

<sup>25</sup>Nadsapi ia pohua huatimadedeni najaro ima imittadsapi ijabojo nadsa huati icanirere canade: –Jaho, madija tocassiejerahijinepa ssamo tani. ¿Nejecojarina tossiajapadsaja? –nade. <sup>26</sup>Nadsapa Jeso ia tocattabaqqi nadsa huati tade: –Madijapa ssamomo taraha Diosapi ssamo tejerani. Pohuajinena madija tocassiejerahitohui –nade.

<sup>27</sup>Naraha Pedropa Jesodsa huati tade: –Ia Maride, iapi tiadsa jaijaridsanijinepi icca odsa, icca madija, huapima ineboridsabaqquide. Nadsapa Dio iadsa ¿nejecora da inapadsaja? –nade.

<sup>28</sup>Naraha Jeso iadsa huati tade: –Pajissara tiadenidsa huati onana: Ohuapi Madija Bedi ojararoa nidsa ajijaro dsama Diojine dsati tojadsapi occaronapomanitohui. Nadsapi deni ojanicca huihuittari bicanidsa ohuittaridsa dosse dosse onanitohui. Nadsana tiadeni 12 tiquinajaro naqui ima cacahuadecca huihuittari 12 nehe cacahitteri najarodsa jassi tinaridsanitohui. Nadsapi icca madija jodiideni aja icca idi \*Isaraeri pohua bedi 12 quinajarideni potemahicca ima ticattemamana nitohui –nade.

<sup>29</sup>–Nadsama tiadenipi occa madija tiquejenajarojinea ticcadeni odsa ticanebomana, timecotedeni tinebobaqquimana,

ticcadeni abi, ami tinebobaqquimana, ticcadeni ejedeni tinebobaqquimana, ticcadeni dsama tinebomana nadsapi nidsa dsotode aji huapima tineboridsa-manajarossa nehe Dio tiadenidsa da inaridsadsapi denima ticajimananitohui. Tetidsemaneri nanitohui, camittehe jiquejeranicca naqui ticajimananitohui –nade Jeso. <sup>30</sup>–Jehe, jidapana tiadenipi ajimani tiquejenaraha ajijaro imadsa tibodideni huatomanaji: Madija jidapana madimanajarideni motapa deni toquejenaraha nidsaranibotepa ajamani toquejenahitohui. Jidapana madimanajarideni mota ajamani toquejenajarideni naco nidsaranibotepa deni toquejenahitohui –nade Jeso.

### Huidsaja

#### tatarabadsadedenicca imadsa mari icanabaqqujari Jeso

**20** <sup>1</sup>Jesopa pocca marinaja ajijaro namidsa imadinicca ima tadsajani mari icanabaqqujari. Pohua attipa ajama nade: –Diocca cacahuehecca imapi pina huidsaja jinedecca imassa najaro. Pocca huidsajadsa ppa nahi uva pohuara ppa naridsajari. Huidsaja jinedepa dsidsidsamassa qquenda pocca huidsajahuaji tarabadsa quinahijine madijatohui toccajari. <sup>2</sup>Bacco inabaqquidsapa pohuadeni tedseje imahaha canajari. Poccadeni dsamacca tarabadsa huada ojarie manaconipi ccarara cajarie 1 \*denario. “Najaropi bica tani” quinadsapa jehe canirejari. Nadsapa pocca huidsajahuaji tarabadsa quinahijine dosse inabaqqujari.

<sup>3</sup> –Nahi dsotode maji huarijonadsa naco huidsaja jinedepa todsepetaji dada caji tanihuaji toccajari. Nahidsapa madija ohuaha dsepedeni jiraha domo huahi qqui inabaquijari. <sup>4</sup>Najaridenidsa naco huati tajari: “Tiadenni naqui occa huidsajahuaji tarabaidsa tiquinanijine jai tijaji. Tiadendsa manaconi pajiranissa tehe da onanijine” najari. Nadsapa jai tojajari. <sup>5</sup>Nahi dsotode maji itetepidsa naco huidsaja jinedepa nama napomajari. Maji tohuenajonadsa naco nama napomajari. <sup>6</sup>Nahi dsotode maji toccadsa naco huidsaja jinedepa madija ohuahadenitohui toccapomadsa madija dsepedeni jiraha bacco inabaquidsapa pohuadenidsa huati tajari: “¿Nejecotohui majidsama ajidsa tidsepedeni jirehe tiquejenajaroneje?” najari. <sup>7</sup>Naraha pohuadeni cacomeramanajari: “Itohui madija huahua quina-jaradsapa” quinajari. Nadsapa pohuadenidsa naco: “Jehe, occa huidsajahuaji tidsepedeni ijimananijine tiadenni naqui jai tijaji” najari. Nadsapa pohuadeni naco jai tojajari, maji toccaraha.

<sup>8</sup> –Nadsapa maji todsidsidsa huidsaja jinede pocca tatarabai dsadedeni cacahuadedsa huati tajari: “Jari, tatarabai dsadedeni huahua tanibaquijo, poccadenni tarabaidsa manaconi da tinaridsanijine. Tahidepa aja maji toccadsa tarabaidsa quinajarideni paca tinabaquipona. Najarideni nattipa maji tohuenajonahicca paca, maji itetepicca paca, maji huaripohuicca paca tinabaquina. Nadsana tahide dsidsidsamassa tarabaidsa quinarideni paca tinabaquina” najari.

<sup>9</sup>Nadsapa dsotode tarabaidsa quinaridenidsaha pohuadenidsa ccarara cajarie 1 denario da inaridsapojaropi pina tarabaidsa huada ojarie manaconissa nehe da inaridsajaro. Pohuadenidsa pohuadenidsa inaridsajaro. <sup>10</sup>Nadsapa maji tohuenajonahicca paca, maji itetepicca paca, maji huaripohuicca paca inabaquia jicadsapa dsidsidsamassa tarabaidsa quinajarideni paca inabaquihijine najorajari. Naraha pohuadeni bodi attidenipa: “Iapi dsidsidsamassa tarabaidsa inapa. Iapi denima icajinitohuia” quinaraha pohuadenidsa naqui huada ojariecca tarabaidsa manaconissa nehe ccarara cajarie 1 denariora da inaridsajaro.

<sup>11</sup> –Nadsapa huapima najarossa nehe cajiridsamanaraha tahide tarabaidsa quinajarideni najoramanapojari, huidsaja jinededsa ima idimamanahijine. <sup>12</sup>Nadsapa huidsaja jinededsa pohuadeni attipa: “Maji toccadsa jai tojari deni paca maji badsira taha tarabaidsa quinaraha pohuadenidsa pina iadsassa nehe da tinabaquia” quinajari. “Naraha iapi majidsama maji ppocone eraha icca tarabaidsa manaconi iadsa denima da tejerani. Aja maji toccadsa tarabaidsa quinajaridenicca manaconissa nehe icajia” quinajari. <sup>13</sup>Naraha huidsaja jinedepa aja attideni nama quinajarideni ojariadsa huati tajari: “Jehe otesse, ticca tarabaidsa manaconi ojine dsori tejerapa. Nadsa tahide huada ojariecca tarabaidsa manaconi tiadsa huati onapopa. Tetti: ‘Ccarara cajarie 1 denario ohuadsa bica tani’ ¿tapo-jerajaroqui? Nadsa tahide

‘Bica tani’ tapa” najari huidsaja jinede. <sup>14</sup>“Nadsapi ticca tarabaidsa manaconi ticajini. Epeje, ticcaniji. Dsotode tarabaidsa quinajaridenidsa naqui tarabaidsa manaconi pina tiadenidsassa nehe da onanijine jipa onadsapi epeje, nema onanajaro.

<sup>15</sup>Occa dsiniropi occa. Ohua tohuini onadsa da onanijine bica tani. Aja pohuadenidsa ohuati huana tadsapi pohuadeni acco ocamabaquijari. ¿Najaro acconi tijamimanajaro-rane?” najari huidsaja jinede –nade Jeso.

<sup>16</sup>Nadsapa Jeso denima huati tajari: –Jehe, Abi Diopa huati huana tajari pina huidsaja jinedessa najari. Pocca cacahuehe tojadsapi dsotode toquejenajaridenipa pocca biquehe cajimanahitohui. Pina tahide toquejenajarideni cajimajarissa quinahitohui –nade Jeso.

**Jesopa pohua dsoqquehicca  
ima huati nimanipomajari**

*Maraco 10.32-34; Roca 18.31-34*

<sup>17</sup>Jeso tedseje odsa panani Jerosarecca jahui jaijadsa pocca dodosse tabaqqi 12 inajaro ia motta pohuadsa iqueriquinijine ia huahua tabaqquide. Nadsapa jahui jaijadsa iadsa huati huati dsanapodsapa pohua atti ajama najaride:

<sup>18</sup>–Aji, Jerosarehuaji jajjemoraropi nahatoqqiri tiquinani. Ohuapi Madija Bedi ojajaroa nidsa Jerosare bacco inadsapi dada toqqimade taminedeni, jodioidenica marinaja maridedeni quinarideni dsepedenidsa ojanitohui. Ohuadsa: “Dsoqquena, dsoqquena” quinahitohui. <sup>19</sup>Dsotodepi madija ohuaha \*jodio quejena-jarajaridenidsa ohua da quinadsa najaridenina

ohua jaja icanaquimanajaro, ohua cossi inaquimanajaro nanitohui. Nadsapi ahua porimacossanidsa ohua inanadsoqqe-manadsa ohua ppa idsamananitohui. Naraha huada huatinimade tojari nadsa onahatoninitohui –nade Jeso iadsa.

**Satiaco, Huanodenicca ami  
Jesodsa huati tajaro**

*Maraco 10.35-45; Roca 22.24-27*

<sup>20</sup>Nadsapi Sebedeo bedimenipi poni bedi pamaha Satiaco, Huano quinadsa Jesohuaji tohuajiressimanajari. Poni bodinipi: –Jesopa deni tojahi, ohuapi ajimani ojani –nadsa Jeso baccohuaji poni pitonidsa huitta nadsa Jesodsa huati tade: –Ohua Maride, tiadsa huati onanijinea –nade. <sup>21</sup>Naraha Jesopa: –¿Nejeco imara ohuadsa huati tinanijine? –nade. Nadsapi poni attinia: –Ticca cacahuehe bicanihuaji madija cacahuade tittaridsapi occa ejedeni pahimarihijine tinori nahatonihuaji huittari, tinori ssamohuaji huittari quinahijine nama tinanabaqqiyo, onajaro –nade Sebedeo bedimeni.

<sup>22</sup>Naraha pohuadenidsa Jesoa: –A, najaro imapi ssamomo tinani. Ohuapi ocasserani ohuabote nani. Ohuadsa najidsohue ssonarinitohui. Aji tiadenipi najidsohue tinahanamananijine ¿tipajiramañani? –nade. Naraha pohuadenipa: –Jehe, ia naqui ipajirani –quinade. <sup>23</sup>Nadsapa pohuadenidsa Jesoa: –Jehe, pajissa ocasserani tinahanamananitohui. Aji ohua najidsohue onahanadsapi tiadeni naqui nidsa dsotode najidsohue tinahanamananitohui. Naraha memehuaji occa cacahueheda

madija cacahuade ohuadsama pahimarihijinepa ohua dosse dosse onejerani. Abi Dio icattejidsa-baqquijaridenina ohuinoridsa pahimarihijine –nade Jeso.

<sup>24</sup>Najaro ima imahaha canahi imittadsapi Jeso huatimade mota 10 inajaroa imecote pamahadsa edijarode. <sup>25</sup>Nadsapa Jeso ia huahua tabaqquidsapa pahuadsa iqueriqquide. Iadsa huati tade: –Tiadenipi madija ohuaha jodio quejena-jarajaridenicca madie nahatoqquri tiquinani. Poccadeni taminedenipa dosse dacoraqquri nadsa poccadeni madija dosse dosse quiquinajari. Deni toquejenajari ohuahadeni naco poccadeni madija dacorehedsa ehcahuabaqquimana najari. <sup>26</sup>Naraha aji ohuadsa tiquejenajaropi nema tiquinanijine bica tejerani. Naraha titessedeni ojariapa: “Ohuana deni ojana” nadsapa pohana huapima bijideni acco icamaridsabaqquihijinena bica tani. <sup>27</sup>Diocca cacahuehedsa deni tijanijinepi titesse bijideni acco ticamaridsajo. Pina poccadeni medse tijajarossa tanijine. <sup>28</sup>Aji ohua \*Madija Bedi ojajaropi madija dosse dosse onanijine occajona-jerajaro. Madija acco ocambaqquihijinena occajonajaro. Madija poccadeni imasiri manaconi pohanidenidsa ssonari-jeranijine poccadeni imasiri manaconipi ohuana ohua ohuaccoranitohui –nade Jeso.

**Jesopa nocco siri  
pamaha noccodeni ssire  
inanabaqqujari**

*Maraco 10.46-52; Roca 18.35-43*

<sup>29</sup>Nadsapi odsa panani Jericodsa jaijedsima... jaijenaraha Jeso

natti madija sibema jahimissajari. <sup>30</sup>Jahui jaijadsapi nocco siri pamaha jahui inididsa pahimajari. –Jeso toqqeqquimahi –quinahi ima mittamanadsapa huahua quinajari: –¡Ia Medsede, \*Dabi Potemahi! ¡Iadsa teti huana taji, inaha! –quinade.

<sup>31</sup>Naraha madija attidenipa: –¡Poni! ¡Joma tiquinaji! –quina-  
raha pohanadenipa denima paja huahua toquinarihi huahua toquinarihi najari: –¡Ia Medsede, tamine Dabi Potemahi! ¡Itohui teti huana taji! –quinapomade.

<sup>32</sup>Nadsapa Jeso toccaraha huahua tahi nadsa: –¿Nejecotohuira ohuadsa huahua tiquinajaroneje? –nade. <sup>33</sup>Nadsapa: –Ia Medsede, inocco ssire tinanabaqquiji, inajaro –quinade. <sup>34</sup>Nadsapa Jeso tohuideni huati huana tadsa noccodeni bara inabaqquidsapa amadsati noccodeni ssire-re nade. Nadsapa Jesodsa tohuedade.

**Jesopa Jerosaredsa bacco  
todsimagari**

*Maraco 11.1-11; Roca 19.28-40;*

*Huano 12.12-19*

**21** <sup>1</sup>Nadsapi Jesodsa madija huapima jaijade. Odsa panani Jerosarehuaji iajiradsapi odsa capamema najaro onini Betapaquedsa bacco inapojaro. Betapaquepi ssono onini Oribodsa anijaro. Nahidsana Jeso pocca dodosse tabaqqui pamahadsa huati tajaride: <sup>2</sup> –Jari, ajicca odsa capamema nanihuaji ticadapoji. Nanidsapi bojo namidsadsa bedima ssoque dsanehe huani. Najaro dicca tiquinadsa poni bedima teccanimanaji –nade. <sup>3</sup> –Naraha

tiadenidsa madija attipa: “¿Nejecotohui bojo dicca tiquinajaro?” nadsapa pohuadsa huati tiquinana: “Ta Medsede ajaro bojo tohuini nadsapaja” tiquinana. Nadsapa bojo tiadenidsa toccanijine dosse inanitohui –nade Jeso.

<sup>4</sup>Najaro imapi pina maittaccadsama Dio Pohua Atti cacomerabote Sacariadsa huati tapojarissa nehe tojajaro:

<sup>5</sup> –Odsa panani \*Siodsa madimanajaridenidsa ajima taji: “Qui tiquinanaja, ticcadeni tamine bicabote tiadenihuaji bacco nahi.

Pohuapa jone tahi, jadsire tohui najarahi. Ajana, bojo imehidsa huittarijona-jarahi. Bojo namidsadsa todsepetaji jojorede bedi idedsa huittarionahi” –napohui nade Sacaria.

<sup>6</sup>Nadsapa pocca dodosse tabaqqi pamahapa Jeso pohua attissa inanamananijine tohuedajari.

<sup>7</sup>Nadsapa bojo namidsadsa imeni bedima bacco toquinadsapa eccanimanade. Bacco nanimanadsapa poccadeni etero huapicca motarajaro ssiti quinadsa bojo idedenidsa bina quinadsa bojo bedidsana Jeso huittaritari. <sup>8</sup>Nadsapa madija huapi taha Jesodsa huatidsemanadsa pohua tedsejema jahui bina idsanapomanajaro, pohuadsa: –Deni tijani –quinahijine. Nadsapa jahuidsapa pohuadeni teteppe namidsa hua idsanapomanade. Madija ohuahadenipa birijari eppe ca ippimanadsa hua idsanapomanade. Nadsapa Jeso jahui bina tani motta toccadsanapojari. <sup>9</sup>Madija huapima pohua

tedsejema jai tojaja, pohua natti-huaji jahijonaja dsanapomanajari. Pohuadsa huatidsemanadsa huahua dsanapomanajari: –¡Tamine \*Dabi Potemahi deni tojahi, deni tojahi! –dsanapomanajari. –¡Ia Medsede onima ccajonajaridsa biquehera tojana, tojana! ¡Memehuaji Diosda madimanajarideni pohuadsa: “¡Deni tijani!” quinana, quinana! –dsanapomanade.

<sup>10</sup>Nadsapa Jeso Jerosarehuaji bacco todsimadsapa nahi odsapananica madimanajarideni huapima huatidsemanadsa ahuaji huahua ahuaji huahua naridsamanajari: –¿Nejecojaridsa huatidsejona-manajarinaja? –quinajaride.

<sup>11</sup>Naraha madija Jeso pohuadsa jahijonajaripa ecomeramanajari: –¡Jehe, ajararipa Jeso! Pohuapa Dio Atti cacomerabote. Dsama Carireahuajicca odsa onini Nasareticca madija. ¡Najaria! –quinade.

**Diodsa dada toqqimacca  
odsadsa manaconitohui  
dadadedeni mohua  
ininebaqquijari**

*Maraco 11.15-19; Roca 19.45-48;*

*Huano 2.13-22*

<sup>12</sup>Nadsapa Jeso \*Diodsa dada toqqimahuaji toqquedsimade. Najaro odsacca boronidsa madija \*bani bedi Diodsa da tahijinecca dade toquejenahi qqui tajari. Manaconitohui dadadedeni qqui inabaqquidsapa huapima mohua ininebaqquijari, mimitdadedeni naco mohua ininebaqquijari. Dsiniro cacacajiquimeradedenicca huahuanari naqui hua inaridsajaro, midsori dadadedenicca huittaritari naqui hua inaridsajaro naridsade.

<sup>13</sup>Nadsapa pohuadenidsa Jeso huati tade: –Dio Atti dsodo nanidsa ima ajima najaro: “Occa odsapi Ohuadsa huati huati toquinahijinecca odsa tocajanitohui” naponi nade Dio Atti dsodo nanidsa. Naraha tiadenipi madija titicamaisda-baqquimana nadsa tijinedenia pina bobotidedenicca quequeriqqui odsassa ticananamanajaro –nade.

<sup>14</sup>Nahi dsotodepa Diodsa dada toqqumahuaji Jesodsa nocco siri jahijona, isso siri jahijona nadsa inanimiridsa-baqquide. <sup>15</sup>Naraha dada toqquimade taminedeni, jodiodenicca marinaja maridenedi quinadsa Jeso canahatori canadsa madija tocanomirehi qqui toquina-dsapa jiperaqquri nade. Ejedenideni naco najaro odsacca boronidsa Jesodsa huatidsemanadsa johua johua quinajari. Ejedeni attidenipa: –¡Tiapi tamine Dabi Potemahi! ¡Deni tijani, deni tijani! –quinahi mittamanadsapa Jeso deni tojajari accone huadimanajari. <sup>16</sup>Ejedeni attideni pohuadenidsa ocassera tadsa Jesodsa huati toquinajari: –¿Ajajari ejedeni attideni timittajerajaroqui? –quinade. Naraha Jesopa: –Jehe, omittani. Attideni omittaraha tiadenina Dio Atti dsodo nanicca hua hua titiquina naraha ¿najaro ima tetideni ajimanajarorane? Imapi ajima najaro: “Ejedenideni, ejedeni tobaccocca naco tiadsa huatidsemanadsa jiri jiri quinahitohui: ‘¡Bica tinani! ¡Bica tinani!’ quinahitohui” naponi nade Dio Atti dsodo nanidsa –nade Jeso.

<sup>17</sup>Nadsapa Jeso tedseje Diodsa dada toqqumahuaji inebo Jerosare inebo nadsapi odsa capamema najaro onini Betaniahuaji jaijanide.

Nanidsa bacco inanidsapi nanidsana icahadijade.

**Jesojine ahua iquiera dseqqueri inanajari**

*Maraco 11.12-14, 20-26*

<sup>18</sup>Huada ssiaja dsidsidsamassa Jerosarehuaji jaijapomadsapi jahuidsa Jeso pemide. <sup>19</sup>Nadsapa jahui inorinidsa ahua iquiera qqui tadsapa nahihuaji toccajari... bacco tade. Dsaboradsa qqui tadsapa iquiera bono nohuerade. Eppera qqui tajari. Bono nohueradsapa iquieradsa Jeso huati tade: –¡A, apaja! Jidapapi tibonomani-jeranitohui. ¡Nohueranitohui! –najari. Nanaja amadsati eppe dseqqueri-ri nade.

<sup>20</sup>Naraha pocca dodosse tabaqqui iapi icattomama canadsa ettipi: –A ¿nejecotohui amadsati iquiera dseqqueri najari? –inade.

<sup>21</sup>Nadsapa Jeso iadsa: –Pajissara tiadenidsa huati onajaro: Tiadeni naqui Diodsa jehe tiquinanissa tadsa Pohuadsa huatide tiquejenadsapi tibodideni: “¿Pajissa tojapadseje? Nohueranitide” tiquinejeraji. Nadsana pina ojinessa najaro ahua iquiera dseqqueri tinamanahitohui. Naraha najaro imaha ojari-jerani. Ajijaro ssonods naqui huati tiquinadsa: “Ssono, titehema-dsa passo imenidsa jaro tidsanaji” tiquinadsapi nema nanitohui. <sup>22</sup>Jehe, Diodsa huati tiquinadsapi tibodidenidsa: “Jehe, Diopa nema inananijine pajirahi” tiquinadsapi aji ticcadeni huatinaja Diojine najarossa inananitohui –nade Jeso.

**–¿Nejecojaricca dacorehe ticajijaro? –quinajari Jesodsa**

*Maraco 11.27-33; Roca 20.1-8*

<sup>23</sup>Nani dsotode Jerosarehuaji bacco inanipomadsapi Diodsa dada

toqqimahuaji jaijedsimapomajaro. Nahidsa Jeso maride tojaraha pohuadsa jiperaququiri najarideni aja dada toqqimade taminedeni, \*jodiodeni ime jocohuideni quina-  
dsa Jesodsa tohuajiressimanadsa pohuadsa huati toquinajari: –Iadsa ticca ima tecomeraji. ¿Nejecojaricca dacorehe ticajijaro? ¿Nejecojari attidsa dadadedeni mohua tininebaququijari? –quinade, Jeso pohua cacomerahijine tohuini quinadsa.

<sup>24</sup>Naraha manaco Jeso pohuadenidsa huati tade: –Ohua naqui tiadenidsa huati onana, tecomeramanadsapi ohua Cadossede oni, occa dacorehe tahimarini tiadenidsa huati onanijine –nade. <sup>25</sup> –Jari, Huanopa ¿nejecojari icadossedsa topa idsanabaququijaritta? ¿Diojine ttarana, madijajine ttarana? –nade Jeso.

Naraha taminedenipa pohuadenira huati tocanirere canade: –Jaho “Huanocca topaniji Diocca dosseniji” inadsapi Jesopa: “¿Nejecotohui pohuadsa jehe tiquinejerajarotte?” nahitohui iadsa –quinade. <sup>26</sup> –Naraha “Huanocca topanijipi madijacca dosseniji” inadsapi madija iadsa huadimanarana. Aja madija huapima attidenipa: “Huanopa Dio icadossejari. Dio Atti cacomerabotedija” quiquinade –quinajari taminedeni, madijadeni noppine cappinamanadsa. <sup>27</sup>Nama quina-naja Jesodsa: –Ssamomo inani –quinade.

Nadsapa Jesoa: –Ohua naqui ohua Cadossede onipa tiadenidsa ohuacomera-jarahi –nade pohuadenidsa.

### **Madija bedi pamajaricca imadsa Jeso mari icanabaququijari**

<sup>28</sup>Jesopa pohuadenidsa denima huati huati tajari: –Ajijaro ima huati onadsapi ¿nejeco imara tibodideni huatoni? Madijapa bedi pamajari. Ojariadsa huati tajari: “Ato, occa huidsaja uva ppa nahihuaji tidsepe ijiji” najari. <sup>29</sup>Naraha bedipa ibo tadsa: “Oqqejerani” najari. Naraha dsotodepa pohua bodi cacajiquimeradsa uva ppa nahihuaji toccajari. <sup>30</sup>Dsotode pohua bedi dsotodeccadsa naco najarossa najaro huati tapomajari: “Ato, occa huidsaja uva ppa nahihuaji tidsepe ijiji” najari. Pohua bedi dsotodecca attipa: “Jehe abi, occana” naraha tocca-jarajari. <sup>31</sup>Pohua bedi pamaraha ¿nejecojarina imehi attidsa ibora tajari? –nade Jeso.

Nadsapa dada toqqimade taminedeni, jodiodenicca taminedeni quinadsa Jesocca marinaja ecomeramanade: –Tahidecca napaja –quinade. Nadsapa Jeso pohuadenidsa huati tajari: –Pajissara tiadenidsa huati onajaro: Romanodenicca taminecca dosseniji dsiniro nanaccadedeni, amoneje dsinirotohui ponideni dada quina-jarodeni naqui Diocca cacahuehdsas toquejenahijine najoramanapojari. Naraha tiadenipi tinajoramanajerajaro. <sup>32</sup>Ajana, Huanoo Baotistapa madija madimanahissa tahijine mari icanabaququiraha tiadenipi pohuadsa pajissa tiquinejerajaro. Manaco ajararideni romanodenicca taminecca dosseniji dsiniro nanaccadedeni “imasiri sseququiri

nahi” tiquinajaro. Amoneje dsiniro-tohui ponideni da da quinajaro naqui “imasiri ssequiri nani” tiquinaraha najaridenina Huanodsa pajissa quinajari. Bodideni cacajiqquimerajari. Naraha tiadenipi Huanocca ima timittamana, madija bodi cacajiqquimerahi qqui tiquinaraha tibodideni cacajiqquimera-jerajaro. Pajissa tiquinejerade –nade Jeso.

**Huidsaja cacahuade  
tabaccoraquuri najaridenicca  
ima**

*Maraco 12.1-12; Roca 20.9-19*

<sup>33</sup> Jeso attipa: –Ajjaro namidsa imadinnica ima onihi tadsajani tiadeni mari ocanabaququina. Titaharibobo canaji. Madijapa pocca huidsajadsa uva pohuara ppa inajari. Nadsapi huidsaja inidi siba hua inahuajanijaro. Uva bono ttai nadsa ppejene tojahijine naqui sibadsa odi inahatojaro. Huidsaja cacahuade huittarihijine siba hua tamaroni naqui hua inamarojaro. Najaro huapima jicadsapi huidsaja jinede pocca huidsaja ecahuamananijine madijatohui qqui naridsajari, nahi pocca huidsajadsa tarabadsa quina-hijine, ppa nahi uva ecahuamanahijine. Uva bono jadadsapa motapa huidsaja jinededsa tojahijine. Motapa huidsaja cacahuadedeni pohuadenidsa tojahijine. Nadsapa pocca huidsaja ecahuamananijine madija qqui inabaquidsapa pocca huidsaja pohuadenidsa inebojaro. Nadsapa jinede dsama huaji tanihuaji toccajari. <sup>34</sup> Uva bono jadahicca abadsico bacco tadsapa huidsaja jinede huaji tanidsa madiraha pocca uva bonotohui pocca dodosse

tabaqqui dosse inanibaquijari. <sup>35</sup> Naraha pocca dodosse tabaqqui huidsajahuaji bacco nanimanadsapa huidsaja cacahuadedeni itadamanajari. Motapa itabaromanajari. Motapa inanadsoqqe-ridsamanajari. Motapa sibadsa iquinabaquimanajari. <sup>36</sup> Nadsapa huidsaja jinede pocca dodosse ohuahadeni dosse inanibaquijari. Tahideccassa quinaraha denima huapi taha dosse inanibaquijari. Huidsaja cacahuadedenihuaji bacco nanimanaraha najarideni naco inajidso-baquimanajari. Motapa itabaromanajari. Motapa inanadsoqqe-ridsamanajari. Motapa sibadsa iquinabaqqui-manajari.

<sup>37</sup> –Nadsapa huidsaja jinede pohua bodipa: “Occa ejedenidsana cappinamanahitohui” nadsa pocca ejedeni huidsaja cacahuadedenidsa dosse inanijari. <sup>38</sup> Naraha huidsajahuaji bacco nanidsapa huidsaja cacahuadedeni pohua qqui toquina-dsa pohuadenira huati tocanirejari: “Najaripa huidsaja jinede bedi. Nidsaranibote imehi dsoqquedsa huidsajapi pohuadsa tojanitohui. Jari, inanadsoqquena, huidsajapi icca tojanijine” quinajari. <sup>39</sup> Nama quinadsapa huidsaja jinede bedi dama quinadsa huidsaja inidihuaji iaccamanadsapa inanadsoqqe-manajari –nade Jeso.

<sup>40</sup> Nadsapa pohuadsa queriquimanajaridenidsa huati tajari: –Jari, tibodideni huatoji. Huidsaja jinede bacco nanidsapa ¿nejecoma napadsaja huidsaja cacahuadedenidsa? –nade Jeso.

<sup>41</sup> Nadsapa ecomeramanajari: –Jehe, huidsaja jinede pohua bacco nanidsapa huidsaja cacahuadedeni

tabaccoraququiri naja najari inajicabaquihitohui. Pocca huidsajapi madija ohuahadenidsana da inanitohui. Pohuadenina pocca huidsaja ecahuamanadsa pina jinede attissa inanamanadsapi uva bono jadadsa motapa jinededsa da inanimanahitohui –quinade.

<sup>42</sup>Nadsapa Jeso pohua tahimari pohuadenidsa ahuato tanijine pohuadenidsa denima huati tajari: –Tiadenipi Dio Atti dsodo nanicca hua hua titiquina naraha siba huahuattajo tojajaro tahimarini ¿tetideni ajimamanajaroqui? Imapi ajima najaro:

“Odsa sibadsa icanahatomana-nijinepi nanahatodedenipa siba ojariepi ettajomanani nade.

Naraha dsotodepi najaro sibana odsa daco cajiranjine tojajaro.

Aji siba huahuattajo tojajaropia Medsede Diojine deni tojajaro. Najaro imajine Diodsa etidsejaro”

nani Dio Atti dsodo nanidsa –nade Jeso. <sup>43</sup> –Nadsapi tiadenidsa ajima onajaro: Diopa pocca cacahuehe tiadenidsa tojanijine najoraporaha Pohua Bedi tettajomanadsapa pocca cacahuehepi idininitohui, madija ohuahadenidsana da inanijine. Najaridenina Diodsa iboraququiri nadsa poccadeni madiedsa ima bicani ahuato tanitohui. <sup>44</sup>Nadsama siba dacorehe cajijarocca ima onihinaquijima nani: Najaro sibadsa madija tohuedimamanadsapa poccadeni ima tossamodsapi assiredeni tajoridsamanajarissa quinahitohui. Najaro siba madijadsa ssonaridsapi

mere tocaniredsapa jamiromana-hissa tahitohui –nade Jeso, pohua tahimari huati tadsa. (Aja madija pohuadsa pajissa quina-jaradsapa paja jicarihi nahitohui, najari.)

<sup>45</sup>Nadsapa dada toqqimade tamedenedi, marinaja pariseodsa jehe quinajarideni quinadsa Jesocca marinaja mittamanadsapa bodideni nahatoququiri najari: –Jesopa icca ima huati huati tajari, iapi pohua ettajojarijine –quinade.

<sup>46</sup>Nadsapa Jesodsa huadimanadsa: –Jeso todsepe inanana –quina-raha madija noppinedeni cappinamanajari, aja madija huapima: –Jesopa Dio Atti cacacomerabote –quiquinanadsa.

**Jesopa cajicajicca jipaquiecca  
ima tadsajani mari  
icanabaquijari**

*Roca 14.15-24*

**22** <sup>1</sup>Nadsapa Jeso pocca marinaja ajijaro namidsa imadinicca ima tadsajani madija huapimadsa huati tapomajari.

<sup>2</sup>Pohua attipa: –Diocca cacahuehecca ima onhipi pina ajijaro imassa najaro. Tamine deni tojajaripa pocca ejedeni amoneje cajihijinecca jipaquie inahatojaro. <sup>3</sup>Nadsapa cacajirehicca jipaquie najoradsa pohua tessedeni jahijonahijine pocca dodosse tabaqqi dosse inabaquididsajari. Huati naridsamanadsapa attidenia: “Ohua medsedecca jipaquie najorani. ‘Jai tijajonaji napaja” quinaraha pohua tessedenipa jai tojahijine jiperaququiri najari. <sup>4</sup>Dsotode naco pocca dodosse tabaqqi ohuahadeni dosse inabaquipojari. Pohua attipa: “Aja huahua onabaquipojaridenidsa

ajima tiquinaji: ‘Tamine attipa ajama napaja: Jipaquie onajorani. Occa bohui dsoqqe, occa bohui bedi oquibote dsoqqe nahi. Huapima najorahi, najari. Occa ejedeni cacajirehicca jipaquietohui jai tijajonaji, napaja tamine’ tiquinana” najari. <sup>5</sup>Nadsapa jai toja, huati toquinaraha pohua tessedenidsa pina ponimassa najaro. Ohuahapa pocca huidsajahuaji tocca, ohuahapa pohua dsepetaji dadahuaji tocca najari. <sup>6</sup>Motapa taminecca dodosse tabaqqui itadamamanadsa inajidso-baqquimana, inanadsoqqe-ridsamana najari.

<sup>7</sup> – Nadsapa tamine huadidsapa pocca soldado icadossebaqqujari, pocca dodosse tabaqqui jicajari-deni acconedeni jicahijine. Inajicabaqqui-manadsapa poccadeni odsa naqui botta inaridsamanajaro. <sup>8</sup>Nadsapa pocca dodosse tabaqqui ohuahadenidsa tamine attipa: “Jehe, occa ejedeni cacajirehicca jipaquie najoranissa taraha otesse huahua onabaqquijari-denipa occa huatidsehedsa pajiramana-jaraha. <sup>9</sup>Jari, madijatohui jahui imeni huapimadsa jai tijaridsaji. Nahihuajicca madija huapima bacco tinabaqquimanadsa ajima tiquinaji: ‘Tamine attipa: Occa ejedeni cacajirehicca jipaquietohui jai tijajonaji, napaja’ tiquinana” najari tamine atti. <sup>10</sup>Nadsapa taminecca dodosse tabaqqui jahui imeni jai tojaridsadsa madija bacco inabaqqui-manajaridenipa tabaccoraqquri najarideni, bicaqquri najarideni naco inequeri-quimanajari. Nadsapa madija jai tojaja canadsa taminecca odsa bodihuaji madija ijaminajari.

<sup>11</sup> – Nadsapa huapima jipamandsa taminepa pocca ejedenicca jipaquiedsa queri-quimanajari qquide qquedsimajari. Pocca daniji etero huedsaridsamanaha bica bica quinajari. Naraha madija ojariapa taminecca daniji cacajirehicca etero huedsa-jaraha qquedsimahi tamine qqui tajari. <sup>12</sup>Nadsa taminepa pohuadsa huati tajari: “¿Nija otesse? Occa ejedeni cacajirehicca etero occa daniji huedsaridsamanaraha tiah tedsani qqui onejeraha. ‘Ohuapi cajicajicca etero jirani oqquedsimana’ ¿tajarorane?” najari. Naraha pohuapa tamine atti mittaraha joma najari. <sup>13</sup>Nadsapa tamine pocca dodosse tabaqquids: “Jari, ajajari madija isso jore, biji jore tiquinajo. Ajicca amossini dsidsinihuaji coro tininemanajo. Nahihuajipa ocasserani ahua-dsanapodsapa pano todsahi nadsa oji oji nahitohui” najari.

<sup>14</sup> – Jehe, Diocca cacahuehecce imapi najarossa najaro. Diopa pocca cacahuehedsa toquejenahijine madija huapima huahua inajonabaqquiraha pamema naha icattejidsabaqqujari, pohuadsa jehe quinahijine –nade Jeso.

–¿Romanodenicca taminedsa  
icca dsiniro mota da inanijine  
bica taqui? –quinajari

*Maraco 12.13-17; Roca 20.20-26*

<sup>15</sup> Dsotodepa Isaraeri potemahi jodiodeni mota marinaja pariseodsa jehe quinajarideni tohuajimanahi nadsa pohuadenira imahaha canajari. –¿Nejecoma inanadsa Jeso atti inassamodsa pohuadsa ima inassonarinjine? –quinahi nade. <sup>16</sup>Nadsapa pariseodenicca mamari

tabaqqi pama, tamine Herodecca madija pama quinadsa Jesodsa huati toquinahijine dosse inabaqqijari. Nadsapa maidseheda ajama quinade: –Mamaride, ticca ima iadsa ahuato tani. Pajissara huati huati tinajaro. Pajissa Diocca marinajadsa madija madimannahissa tahijine mari mari titicana-baqqi najari. Madija attideni noppine ticappina-jeradsapi ticca ima onihi toja-jerajaro. Madija deni tojajari, madija dsepe sse tajari, madija ajamani tojajari tedsejepa tiadsa najarissa caniquimera-jari –quinade. <sup>17</sup> –Nadsama ibodi acco ticamabaqqi. ¿Nejeco imana bica tani tajaro? \*Romanodenicca tamine deni tojahicca pocca dosse-nijidsa icca \*dsiniro mota pohuadsa da inaniijine ¿bica taqui? ¿Bica tejerarane? Moisesicca marinajadsa ¿oppina taqui? ¿Oppinera tarane? ¿Tetti nejecoma tani? –quinade.

<sup>18</sup> Jesodsa attideni bica tadsa huati huati toquinaraha poccadeni tabacorehe pohuadsa ahuato tadsa pohuadenidsa huati tajari: –¡Timaidssamanajaro! ¿Nejecotohui occa ima tossamonijine ohuadsa huati tiquinajaro? <sup>19</sup> Jari, ohuadsa dsiniro ccarara romanodenidsa da tanijinecca nohue ticanamanaji, qqui ocanana –nade Jeso. Nadsapi \*denario dsojo icanajonamanadsa Jesodsa da icanamanade. <sup>20</sup> Nadsapa pohuadenidsa huati tapomajari: –Jari, ajijaro ccararadsapi ¿nejecojari corimena anijaro? ¿Nejecojari oni dsodo najaro? –nade Jeso. <sup>21</sup> Nadsapa pohuadsa ecomeramana-jari: –Romanodenicca tamedinaja –quinade. Nadsapa pohuadenidsa Jeso attipa: –Romanodenicca

tamine pocca dsiniropi pohuadsa da tinanimanaji. Naraha Diocca tiquejenadsapi Pohua jipa tahiccara Pohuadsa da tiquinaji –nade Jeso.

<sup>22</sup> Jeso atti mittamanadsa jabojo-manadsapa: –A, icca ima ecomeraniijine nahato tajaria –quinade. Nadsapa Jesodsa apaja quinadsa jai tojanijaride.

**Nidsa jicamanajarideni  
nahatonimanadsapa cajicaji  
nohueranitoahui**

*Maraco 12.18-27; Roca 20.27-40*

<sup>23</sup> Najaro huadadsa Isaraeri potemahi jodiideni mota \*marinaja onini sadoseodsa jehe quinajarideni Jesohuaji bacco quinajari. Poccadeni marinajapi: –Idsoqquedsapi inahatoninijine nohuerani –quiquinanajari. –Najaro imadsa Jeso atti ijine tossamodsa cobara tana –quinadsa Jesodsa najaro ima huati toquinade:

<sup>24</sup> –Mamaride, Moisesicca marinajadsapi ajima nani: “Maqqidejepa amoneje cajiraha ejedeni jiraha dsoqquedsapa pocca amonejepi pohua imecotena icajina, nahi ejedeni cajidsapa pocca ato dsoqquejaricca ejedenissa nahijine” nade Dio Atti Moisesijine dsodo nanidsa. <sup>25</sup> Nadsama tiadsa ima ajima najaro huati inana. Aja iadsapa pohuadeni imecote pohuadenira 7 quinaha madimanajari. Tahideccaha amoneje cajipojari, naraha bedi jiraha dsoqquejari. Nadsapa pocca amonejepi pohua imecotedsa tojajaro. <sup>26</sup> Najari naco pohua ohuaha bedimeni icajiraha ejedeni jiraha dsoqquejari. Dsotodecca naco najaro amoneje icajiraha najari naco ejedeni jiraha

dsoqquejari. Najarossa dsanapojaro cajide 7 quinaraha ejedeni jiraha jicajari. <sup>27</sup>Najarideni jicadsapa poni naqui dsoqquejaro. <sup>28</sup>Nadsapi dsama jicadsa madija inahatonidsapi pohua imecote 7 quinaripana jaro amoneje icajiquimanapora ha ¿nejecojarina ponicca maqqi tojapadsaja? –quinade.

<sup>29</sup>Naraha Jeso attipa: –Ticca deni marinajapi dsori tajaro. Dio Atti nahatoqqiri tiquinaraha pajissa tiquinanissa tejerajaro. Diopa pocca dacorehema madija inahatonibaqquihijine pajirahi naco ssamoqqiri tiquinajaro. <sup>30</sup>Jicamanajarideni nahatonimana dsapa caji caji cana-jarahitohui. Diohuaji madimanadsapa pina Diocca dodosse tabaqqi memehujiccassa quinahitohui. Aja pohuadenipa caji caji cana-jaradsa madimanajari.

<sup>31</sup> –Nadsama Diojine madija nahatonimanahicca imapi Dio Pohua Atti dsodo nanidsa dsodona pojaro. Pohua Atti dsodo nani hua hua titiquina naraha ¿najarona imapi tetideni ajimamanajaroqui? <sup>32</sup>Aji maittaccadsama \*Abarahao, Isahaca, \*Jacobo quinajari dsoqquemanahi nattipa Diopa Moisesidsa huati tajari: “Ohuapi Dio, ticca idideni Abarahao, pohua bedi Isahaca, pohua bedi Jacobo quinajaridenicca Dio ojani” nahi nade. Aja Dio Atti nama nadsapa Abarahao deni nahatonimanadsa madimanasanapohuicca ima ahuatona jaro. Diopa paja dsoqquemanarihi najaridenicca Dio jarahi. Diopa camittaqqui najaridenicca Dio. Pohuapa jidapana naco poccadeni Dio –nade Jeso.

<sup>33</sup>Najaro ima mittamanadsa madija huapima jabojo quinadsapa: –A, Jesopa nahato tajari –quinajaride.

### **Diocca dosseniji deni tojanicca**

*Maraco 12.28-34; Roca 10.25-29*

<sup>34</sup>Marinaja pariseodsa jehe quinajaridenipa ima mittamanajari: –Jesopa marinaja sadoseodsa jehe quinajarideni attideni ajimani inajanajo –quinahi ima mittamanadsapa pohuadenira queriqquidsa imahaha canajari: –Jari, ia naqui Jesodsa huati inana –quinadsa Jesodsa huatide jai tojajari. <sup>35</sup>Najarideni ojaria jodiodenicca marinaja maride toजारipana pohua bodidsa: –Jeso nattome onana –najari. Jesodsa bacco toquina dsapa najaria pohuadsa huati tajari: <sup>36</sup> –Mamaride, Diocca dosseniji huapi tehe Moisesidsa da inaraha ¿nejecojaro dossenijina pocca dosseniji huapimadsa deni tojajaro? –nade.

<sup>37</sup>Naraha Jesopa pohuadsa huati tajari: –Aji \*Diocca dosseniji deni tojaniccapi ajima najarona paji: “Tiadeni Medsede Diodsa tetideni huanacquiri naji. Tibodideni huatonissa tadsa, dacoco tijiradsa Pohuadsara disseraqqiri tidsanapomanadsapi Pohuadsa tetideni huanacquiri nanijine.”

<sup>38</sup>Najarona Diocca dosseniji deni tojanicca. <sup>39</sup>Diocca dosseniji deni tojanicca onihi pina tahideccassa najaro ajima najaro:

“Tinoridenicadsa tetideni huanacquiri naji, pina tiadenidsa tetideni huanacquiri najarossa naji.”

<sup>40</sup>Najaro Diocca dosseniji pamehedsa pocca dosseniji Moisesijine

dsodo najaro huapima tassaquijaro. Dio Atti cacomerabote attideni naqui najaro pamehedsa tassaquijaro –nade Jeso.

–¿Cristo-Mesiapa nejecojari  
potemahi tiquinajaro? –najari  
Jeso

*Maraco 12.35-37; Roca 20.41-44*

<sup>41</sup>Marinaja pariseodsa jehe quinaridenipa Jesodsa queriquimanahi paja naccadsapa Jeso pohuadenidsa huati tajari: <sup>42</sup>–Cristo-Mesiacca imapi tibodidenidsa ¿nejecomanani? ¿Pohuapa nejecojari potemahi tiquinajaro? –nade Jeso. Nadsapa ecomeramanajaro: –Pohuapa \*Dabi Potemahi –quinade. <sup>43</sup>Nadsapa pohuadenidsa Jeso atti: –Naraha tamine Dabipa maittaccadsama madidsa Dio Corimejine pohua tedsejemacca ima huati tadsapa Cristo-Mesiadsa: “Ohua Medsede” napojari. Dabi pohua attipa:

<sup>44</sup>“Ia Medsede Diopa ohua Medsede Mesiadsa huati tajari: ‘Ohuinori nahatonihuaji tittariji. Ohua tedsejepi tohuatti dacorajaro ticajiji’ najari. ‘Nidsarabote tia huadidenipa ajamani onanabaquihitohui. Poccadeni dacorehepi onajicanitohui’ napohui nade Dio.”

<sup>45</sup>Naraha Cristo-Mesia tamine Dabi Potemahi tojadsapa ¿nejecotohui Dabi pohua potemahidsaraha: “Ohua Medsede” napojaritta? –nade Jeso.

<sup>46</sup>Pohuadenipa najaro ima ecomeramananijine pajiramanajarajari. Najaro huadadsa Jesojine poccadeni ima tossamoridsadsapi ima onihi Jesodsa huati toquinahijine huapima cappinamanajari.

**Pina pariseodenicca  
madiessa, pina jodiodenicca  
marinaja maridedenicca  
madiessa tiquinejeraji**

*Maraco 12.38-39;*

*Roca 11.43, 46; 20.46*

**23** <sup>1</sup>Nahi dsotodepa madija queriquihidsa, ia pocca dodosse tabaqquideni naqui pohuadenidsama iquejemadsa Jeso iadsa huati tajaride: <sup>2</sup>–Jodiodenicca marinaja maridedeni, marinaja pariseodsa jehe quinarideni tedsejepa Moisesicca marinaja nahatoquiri nadsapa timittamananissa tanijine tiadeni mari mari tocanabaquimana najari. <sup>3</sup>Moisesicca marinaja tiadeni mari tocanabaqqui-manadsapa poccadeni marinajadsa iboraquiri tiquinaji. Naraha pina poccadeni madiessa tiquinejeraji. Pohuadenipa ima bica tanicadsa mari mari quinaraha poccadeni madiepi pina poccadeni marinajassa nejerani. <sup>4</sup>Pohuadeni attipa: “Diocca dossenijidsa ajima tiquinaji” quinaraha poccadeni marinaja najo tanicca inaharimanajaro. Nadsapi pohuadenijine ima toccanajani najaro. Najaro imapi madija ecahuamananijine pajiramanajarahi. Pohuadeni naco najaro ima madija ecahuamananijine acco icamabaquimana-jarahi. <sup>5</sup>Pohuadenipa madija pohuadenihuaji noccodeni jo najonahi nahitohuira madimanajari, madija pohuadeni qqui toquinadsa: “A, Diodsa disseraqquri nahi” quinahijine. Aja jodiodeni motapa pohuadeni assaridsa, pohuadeni bijidsa Dio Atti dsodoni dsaminidsa oro idsamanadsa ssoque ssoque teri najaro. Naraha

pariseodeni, jodiodenicca marinaja maridedeni tedsejepa dsamini denima imenicca ssoque ssoque teri najaro, “Dio Atti dsamini denima ahuatoto tanijine” quinadsa. Poccadeni etero iponidsa naqui cohuanidequereca cahuiheheri najaro. “Iana denima Diodsa bicaququiri inani” quinaraha. <sup>6</sup> Jipaquque imenidsa naqui deni toquejenajaridenicca huihuittaridsa jassi tarihijine tohuini quiquinanajari. Aja Dio Atti mamarihuaji naco jassi tarihijine deni toquejenajaridenicca huihuittari tohuini quiquinanajari. <sup>7</sup> Jahuihuaji jahiridsadsa naco madija pohuadenidsa: “¿Nija, bica tinani? Tiapi deni tijani” quinahijine naco tohuini quiquinanajari. Madija naco pohuadenidsa: “Ohua maride” quinahijine tohuini quiquinanajari.

<sup>8</sup> –Naraha tiadenipi madija tiadenidsa: “Ohua maride” quinahijine tohuini tiquinejerana –nade Jeso iadsa. –Tiadeni Maridepa ojarihi. Nadsapi tiadeni huapimapi timecotedeni tiquejenajaro. Tiadenidsa ojarida deni tojahicca nohuerahi. <sup>9</sup> Aja namidsa madimanajaridenidsa naqui: “Abi” tiquinejerana. Ticcadeni Abi memehuaji madijarina ojarihi. Najaridsara: “Abi” tiquinaji, onajaro. <sup>10</sup> Madija tiadenidsa: “Ia dossede” quinadsa naqui poni tiquinaji. Tiadeni dossedepa Cristo-Mesia ojarihi. <sup>11</sup> Naraha tiadenidsa madija denima bica tajaripa huapima bijideni accode dissera tajari. Pina ticcadeni medessa najarina deni tojarari Diodsa. <sup>12</sup> Ajana, madijapa pohua ehuerahi pohua deni tonanadsa: “Ohuana deni ojani” nadsapa nidsa dsotode

najaripa Dio ajamani inanahitohui. Naraha madijapa: “Ohuapi ajimani ojani” nadsa pohua imecotedeni accode tohuini naha madijaripana nidsa dsotode najarina Dio deni inanahitohui –nade Jeso.

**Pariseodeni, jodiodenicca  
marinaja maridedeni  
tedseje huahuattajo  
toquejenahijinecca ima**

*Maraco 12.40; Roca 11.37-54; 20.47*

<sup>13</sup> Nadsapa Jeso jodiodenicca marinaja maridedenidsa, \*marinaja pariseodsa jehe quinajaridenidsa huati tajari: –Jaho, tiadenipi huahuattajo tiquejenanitohui. \*Maidasajidede tijirani. Dio Atti madija mari ticanabaququimannahissa tadsapa madija Dio Atti tocatherahijineraha. Dio Atti mari ticanabaququimanannahissa tajaradsa, ticcadeni marinaja najo tianicca tinaharimanadsapi tijinedeni madija Dio Atti tocathera-jarajari. Nema tiquinadsapi pina Diocca cacahuehecca noccobiji ticahacossamanajarossa najaro. Nadsapa madija Diocca cacahuehedsa jai tojedsima-jarajari. Tiadeni naqui pocca cacahuehedsa jai tijedsimanajaro.

[ <sup>14</sup> –Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidasajidede tijirani. Tabira tocajanajarodeni ponideni madimanahijineccaraha ticamadsabaququimanadsa tiadenidsa totojana nadsapi ponidenicca odsa naqui tiadenidsa totocajaridsa najaro. Naraha ticcadeni tabaccorehe ahuatora tanijinepi Diodsa huati

huati tiquinadsa ticcadeni huatinaja dequerajaro. Aja madija tiadenidsa: “A, Diodsa disseraquiri nahi” quinahijine. Tiadenina Dio Attima mamajadsa tadsapi nidsa Diocca najidsohue denima oppina tanicca tiadenidsa ssonarinitohui –nade Jeso. ]

<sup>15</sup> –Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidasajidede tijirani. Madija ohuaha jodiodenicca marinajadsa toquejenahijine maride disseraquiri tiquinadsapi dsama onihihuaji, dsama onihihuaji maride jajahi tijaridsa najaro. Passo imeni jippehuaji naqui maride jajahi tijaridsa najaro. Madija ohuahadenipa: “Jodiodenissa inana, Diodsa iquejenanijine” quinaraha tijinenina ticcadeni marinajadsara toquejenajari. Najarojinena poccadeni ima denima totabaccorajaro. Ticcadeni ima tabaccora tadsapi jororoni jiquejeranihuaji tiquejenanitohui. Tijinedeni poccadeni ima denima totabaccoradsapi pohuadeni naco jororoni jiquejeranihuaji toquejenahitohui.

<sup>16</sup> –Jaho, tettidenipi: “Iapi Dio Attidsa madija mari icanabaqujaripa pina madija jahinedeni dsopide iquejenajarossa najaro” tiquinaraha tiadeni huapimapi noccodeni sirissa tiquinajaro. Huahuattajo tiquejenanitohui. Dio Atti mari mari titicanabaquimana naraha tibodideni huatonissa tejera-jaro. Ticcadeni marinajapi ajima najaro: Madijapa madija ohuahadsa huati tajari: “Ohuatti ojine pajiranissa tanitohui, pina Diodsa

dada toquima pajiranissa tajarossa najaro” najari. Naraha pohua attissa inana-jeradsapi: “Epeje, oppinera tani” titiquina najaro. Naraha pohua attipa: “Ohuatti ojine pajiranissa tanitohui, pina Diodsa dada toquimahuajicca oro pajiranissa tajarossa najaro” najari. Naraha pohua attissa inana-jeradsapi: “Oppina tani” titiquina najaro. <sup>17</sup>Tiadenipi ssamoquiri tiquinani. Tibodideni huatonissa tejera-jaro. ¿Nejecojaro imana deni tojajaro? ¿Diodsa dada toquimahuajicca orona deni tojajaroqui? ¿Dada toquimacca odsana deni tojajarorane? Jehe, dada toquimacca odsana Dio pocca. Najarodsa oro da idsimamanadsana Dio pocca tojajaro. Najaroa aji dada toquimana deni tojajaropaji.

<sup>18</sup> –Ticcadeni marinaja onihi naqui ajima najaro: Madijapa madija ohuahadsa huati tajari: “Ohuatti ojine pajiranissa tanitohui, pina Diodsa da tahijinecca huahuanari pajiranissa tajarossa najaro” najari. Naraha pohua attissa inana-jeradsapi: “Epeje, oppinera tani” titiquina najaro. Naraha pohua attipa: “Ohuatti ojine pajiranissa tanitohui, pina Diodsa da tahijinecca huahuanaridsa da naqqinaja huapima pajiranissa tajarossa najaro” najari. Naraha pohua attissa inana-jeradsapi: “Oppina tani” titiquina najaro. <sup>19</sup>Tiadenipi ssamoquiri tiquinani. Tibodideni huatonissa tejera-jaro. ¿Nejecojaro imana deni tojajaro? ¿Madijacca da naqqinaja huahuanaridsa huanarijropi deni tojajaroqui? ¿Diodsa da tahijinecca huahuanarina deni tojajarorane?

Huahuanarina Dio pocca. Najaro-dsa madijacca da naqquinaja hua inarimanadsana Dio pocca tojajaro. Najaroa aji Diodsa da tahijinecca huahuanarina deni tojajarpaji.

<sup>20</sup> –Madijapa madija ohuahadsa huati tadsapa: “Ohuatti ojine pajiranissa tanitohui, pina Diodsa da tahijinecca huahuanari pajiranissa tajarossa najaro” nadsa najaro huahuanaricca ima huati tadsapa najaro huahuanaridsa huanarijaro huapima naqui huati tajari.

<sup>21</sup> Madijapa madija ohuahadsa huati tadsa naco: “Ohuatti ojine pajiranissa tanitohui, pina Diodsa dada toqquima pajiranissa tajarossa najaro” nadsa najaropi dada toqquimacca imaha ojari-gerani. Najaropi Diocca ima. Nahidsapa Dio madijari. <sup>22</sup> Madijapa: “Ohuatti ojine pajiranissa tanitohui, pina meme pajiranissa tajarossa najaro” nadsa najaropi memecca imaha ojari-gerani. Nanihuajipi Dio Pohua dosse dosse nahicca huihuittari cahittajaro. Najarodsapa Dio Pohua huittarijari. Memehuajicca ima huati tadsapa Diocca ima naco huati tajari –nade Jeso.

<sup>23</sup> –Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Ticcadeni odsa inorinicca ppa nahi dsamata quequejema majo bica tajari pore tiquinadsa naco badsira taraha \*mota Diodsa da da titiquina najari. Najaropi ticcadeni marinaja ajimanicaraha tecahuamananissa tajaro. Naraha Diocca dosseniji deni tojaniccapi tecahuamana-gerajaro. Diocca dosseniji deni tojaniccapi

madija ticamaidsabaquimana-jaradsa tettideni pajiranissa tanijine. Madijadsa naqui tetideni huanaqquri nanijine. Maidseraqquri tiquinadsa tettidenissa tinanamandsanaponijine. Jehe, najaro dosseniji tecahuamana-geradsapi ticcadeni ima dsori tajaro. Aji ticcadeni odsa inorinicca ppa nahi mota Diodsa da da titiquina najari bica tahi naraha najaro dosseniji ajimanicca aji Diocca dosseniji deni tojanicca tadsajani tecahuamanaji, onajaro. <sup>24</sup> Jaho, tiadenipi pina noccodeni sirissa tiquinajaro. \*Oppina tahicca dappi tiquina-jarahijine ticcadeni dsedse eterodsa tinaqqequequimanadsana dse dse titiquina najaro, “sisipe ssonippahitide” tiquinadsa. Naraha Diocca dosseniji deni tojanicca tecahuamana-geradsapi pina bani jipahi oppina tahicca camello motararaha nama naha dappi tiquinajarissa najari.

<sup>25</sup> –Jaho, jodiodenicca marinaja maridedeni, marinaja pariseodsa jehe tiquinajaro, tiadenipi huahuattajo tiquejenanitohui. Maidsajidede tijirani. Ticcadeni madiepi pina dsedse, parato huapihuajira ssahua ssahua tiquinajarissa najaro. Naraha tibodidenina pina dsedse parato bodihuaji ssahuarahi oba tajarissa tiquinajaro. Tibodidenidsa tibotimanajarocca ima ijijaro. Tohuini tiquinajarocca naqui ijijaro. <sup>26</sup> Tiadenipi tibodideni huatonissa tejerajaro. Ticcadeni dsedse, ticcadeni parato bodihuaji naco ssahua ssahua tiquinajo. Najaropi aji ticcadeni tabaccorehe tinebomanaji, tibodideni tohuirenijine. Nadsana ticcadeni madie naqui tobicanitohui, onajaro –nade Jeso.

<sup>27</sup> – Jaho, jodiodenicca marinaja maridedeni, marinaja pariseo-dsa jehe tiquinajaro, tiadenipi huahuattajo tiquejenanitohui. Maidsajidede tijirani. Tiadenipi pina tonoccobiricca siba bica tanijine nopohuidsa sse tiquinadsa bica tajarossa tiquinajaro. Huapihuaji bica taraha bodihuajipi \*oppina tani. Madija dsoqqehei tonedeni caji, imedeni jadsini obani naqui caji tani. <sup>28</sup> Tiadenipi najarossa tiquinajaro. Madija tiadeni qqui toquinadsapa pina bicaqquri tiquinajarossa naraha tibodidenidisa maidsehe iji, imasiri iji najaro.

<sup>29</sup> – Jaho, jodiodenicca marinaja maridedeni, marinaja pariseo-dsa jehe tiquinajaro, tiadenipi huahuattajo tiquejenanitohui. Maidsajidede tijirani. Tiadenipi Dio Atti cacomeraqquri napojarideni noccobirideni tetepidsa siba hua tinamaromanajaro. Madija bicaqquri najarideni noccobirideni tetepidsa naqui bica tanijine tijinedeni hua naridsajaro. <sup>30</sup> Naraha tettidenipi: “Maittaccadsama icca idideni madimanapohuidsama imadidsapi nassa pohuadenissa inejeraneje. Icca ididenipa Dio Atti cacomeraqquri najarideni inana-dsoqqe-baqquimanadsapa nassa iapi pohuadeni acco icamabaqqujaranaja” titiquina najaro. <sup>31</sup> Naraha tettideni nema tiquinadsapi tijinedeni ima ahuato tajaro. Tiadenipi Dio Atti cacomeraqquri najari nanadsoquededeni potemahi tiquejenajaro. Pohuadenissa tiquinajaro. <sup>32</sup> Nadsapi ticcadeni ididenicca jarehe idimamanapojarocca najarossa tinanamanadsa jicana –nade Jeso.

<sup>33</sup> –Tiadenipi pina maccassa tiquinani. Ticcadeni ima tabaccora tajaro. “Diocca najidsohue dsori icanirenitohui” ¿tiquinajaroqui? ¿Dsori ticanire-jeranitohui! Jororoni jique-jeranihuaji tiquejenanitohui. <sup>34</sup> Nema nadsapi tiadenidsa Dio Atti cacomeraqquri najarideni, Diojine nahatoqquri najarideni, Dio Atti pajissacca mamaridedeni dosse onaridsabaqquihitohui. Naraha motapa tinana-dsoqqe-baqquimanahitohui. Motapa ahua porimacossanidsa tinana-dsoqqe-baqquimanahitohui. Motapa jodiodenicca Dio Atti mamarihuaji titacossimanadsa biqueramanahitohui. Motapa odsa onihihuaji odsa onihihuaji mohua tinabaqquimana-ridsa-hitohui. <sup>35</sup> Nema tiquinajarojinepi tiadenidsa najidsohue imeni ssonarinitohui. Ajijaro dsamacca madija bicaqquri najari tojicadsa emenedeni toccajaro manaconedeni tiadenidsa ssonarinitohui. Aja tahidepa Abeo bicabotena pohua ohuahajine dsoqqepojari. Najari dsoqqepodsama aja Dio Atti cacomeraqquri najarideni naco inajicamanaja najonapohui najaria aja Berequia bedi Sacaria inana-dsoqqe-manahi bacco najonajaro-paji. Sacariapa Diodsa dada toqquima bacconihuaji aji Diodsa da tahijinecca huahuanari inorinidsa inanadsoqqemanajaripaja. <sup>36</sup> Pajissara tiadenidsa huati onajaro: Aja huapima jicajonajarideni manaconedeni jidapana madimanajaridenidsa Diojine najidsohue ssonarinitohui –nade Jeso.

**Jesopa Jerosarecca madijatohui  
oji oji najari  
Roca 13.34-35**

<sup>37</sup> Jesopa odsa panani Jerosarehuaji madimanajaridenicca ima

huati tajari: –Ohuapi titohuideni oji oji onadsapi: “Jerosare, Jerosare” ohonanajaro. Maittaccadsama ticcadeni idideni madimanapodsaco Dio Atti cacomeraququiri najarideni inanadsoqqe-ridsamanaja najonapohui najari. Diopa pocca dodosse tabaqqi tiadenidsa dosse dosse inajonabaququiri-raha sibadsa tiquinabaququimanaja najonapohui najari. Naraha ohuapi tiadeni ohuacahuabaququina, onajaro. Pina tacara poni bedi poni appani dopanidsa ecahuabaququijarissa onanijineraha tiadenipi ohuadsa jiperaququiri tiquinajaro. <sup>38</sup>Tetideni huatoji. Diopa tidsamarideni Jerosare inebonitohui. Tiadeni tohuacahuabaququi-jarahitohui. <sup>39</sup>Ohua naqui, ohua qqui timanimanapomajeraccanitohui. Nidsaranibote ima najoranissa tadsa occanipomadsana ohua qqui tiquinapomanitohui. Nadsana tettidenipi: “Jehe, ajaripa Dio onima ccaronajari. Puhuapa bica tahi, bica tahi” tiquinanitohui –nade Jeso.

–**Diodsa dada toquimacca odsa taboridsanitohui –najari Jeso**

*Maraco 13.1-2; Roca 21.5-6*

**24** <sup>1</sup>Nadsapa \*Diodsa dada toquimadsa Jeso qquenasdapa toccadsa ia pohua huatimadeni pohuadsa iajressidsa huati inajarode: –Ia Maride, aji dada toquimahuajicca odsa huapimapi bicaququiri naha –nade. <sup>2</sup>Nadsapa Jesoa: –Aji odsa imeni sibadsa nahatoridsani jidapana qqui tiquinaraha pajissara tiadenidsa huati onana: Nidsa dsotode ajiaro odsa huapimapi taboridsehe jicani-ssa tanitohui –nade Jeso.

**Dsama jicani tohuajiradsa nahatoququiri inanijinecca ima**

*Maraco 13.3-23;*

*Roca 21.7-24; 17.22-24*

<sup>3</sup>Nadsapi ssono Oribohuaji jajjemorajaro. Nahidsa Jeso huittaridsapa ia pohua huatimadedeni iara pohuadsa huajijira icanadsa pohuadsa huati inajaro: –Ia Maride, jidacca ima huati tinajaropi ¿nejecoma nadsa tojapadseje? Aji namihuaji ticcaronapomanijinecca ima, aji dsama jicanicca ima tohuajiradsa nahatoququiri inanijinepi ¿nejecora qqui inapopadseje? –nade.

<sup>4</sup>Nadsapa Jesoa: –Paji, madija tiadeni tocamaidasabaququirana. <sup>5</sup>Nidsa madija huapi taha pohuama ohua onidsa maidsamanadsapa: “Ohuapi Cristo-Mesia ojani” quiquinanahitohui. Najaridenipa madija huapi taha icamaidasabaququimanahitohui. <sup>6</sup>Ima onihi naqui: “Jadsire tojaridsani” timittamananitohui. Naraha ticappinamana tejerana. Jadsirepi epeje tojaponitohui. Naraha dsamapi jiquejeraccanitohui. <sup>7</sup>Nadsama madija dsama onihicca, dsama onihicca tedseje jadsire inanamana-ridsanitohui. Tamine ohuahacca madija, tamine ohuahacca madija tedseje cahadire-ridserahitohui. Pemi naqui cajiridsanitohui. Namidsadsa naqui tojaridsanitohui. <sup>8</sup>Najaro ocasserehe tahide tojaporaha denima ocasserehe tojadsanaponitohui.

<sup>9</sup>–Nadsapa tiadeni tadamamandsapa todsepedsa tiquejenaridsanitohui. Puhuadenijine nanajidso tiquejenadsapi tijicaridsanitohui.

Occa madija tiquejenajarojinepi madija huapima tiadenidsa jipera-qquiri nahitohui. <sup>10</sup>Nadsama ohuadsa toquejenajarideni motapa ohuatti nebomanadsa ima ponimacca maidsanijidsara toquejenaridsa-hitohui. Nama quinadsapa pohuadeni tesse dsoqquehijine ahuaji eccora, ahuaji eccora naridsamanahitohui. Pohuadenira pohuadeni tessedsa ahuaji jipera, ahuaji jipera naridsamanahitohui. <sup>11</sup>Dsama jicanijinepi mamaidsade ahuatomaridsa-manahitohui: “Ohuapi Diocca dosseniji, Dio Atti ohuacomerajaro” quiquinanaraha Diocca dosseniji jarahi. Naraha pohuadenipa madija mota huapi taha icamaidsabaquimanadsapa huapima attidenipa: “Jari, najaridenicca imadsara iquejenana” quinahitohui. <sup>12</sup>Dsama huapimadsa madijapa imasiri denima denima inanaridsamanahitohui. Dsama huapimadsa imasiri ijiridsajarojine tohuati huanehepi huatideni ajamamanahitohui.

<sup>13</sup> – ¡Naraha tiadenipi dacoco tijiraji! Najaro huadie tinahana-mana-dsanapodsapi tijicaraha ticassiejeranhitohui. Timadimanaccdsa dsama jicani bacco tiquinadsa naqui ticassiejeranhitohui. <sup>14</sup>Naraha dsama jiquejeraccadsama Dio pocca cacahuehecca ima bicani dsama huapimadsa ecomeraridsa-manacchanhitohui. Najaro imapi otahimari madija tocassiejerahijinecca dsama nemaneheda madiridsamanahitohui. Nadsana dsama jicanicca huada bacco tanitohui –nade Jeso.

<sup>15</sup>Jesopa dsama jicanicca ima denima ia mari tocanabaquijari. Pocca marinaja hua tiquinadsapi

timittamananissa taji. Pohua attipa: –Nidsa jodio quejena-jarajaridenijine Diodsa dada toqqumahuaji oppinabote corime huedsadsapa toppinanitohui. Nadsapi pohuadenijine icca madija jodiodenipa icappinaquimanadsa Diodsa dada toqquma paji inebomanarinitohui. Najaro imapi maittaccadsama Dio Atti cacomerabote Daniel dsodo inapojaro. Najaro ima tojani qqui tiquinadsapi tidomo toccaji, onajaro. <sup>16</sup>Aji dsama Jodeahuaji timadiridsa-manajaropi ssonohuaji tidomo toqqemorana. <sup>17</sup>Madija pocca odsa amossinihuaji ccaridsadsapa pohua dsepetajitothui pocca odsahuaji toqquedsimani-jarana. <sup>18</sup>Madija pocca huidsajahuaji dsepe ijijari naco paja joppa tarina. Pocca eterotothui odsahuaji ccani-jarana. ¡Poni! <sup>19</sup>Jaho, amoneje jiamanajaro-den, bacconideni ijimanajarodeni naqui joppa toquinanijine tohuati nahanaququiri nanitohui. <sup>20</sup>Diodsa huati huati tidsanapomanaji, aji najaro ima oppinabote tojadsa tidomo toccadsapi ssirini nohueranijine, jassinajacca huadadsa naqui nohueranijine, onajaro. <sup>21</sup>Najaro ima oppina tanicca bacco nadsapi madija huapima ocasserani imeni inahanamanahitohui. Maittaccadsama Dio dsama inahatoponipi nema nanicca ocasserehe qqui quinapo-jerani. Nohuerani. Ia naqui qqui inejerani paji nani. Nidsa dsotode naqui nema napoma-jeranhitohui. Nohueranhitohui. <sup>22</sup>Najaro ocasserehe nema dsanapodsapi madija tossiajaja cama-jarahitohuiraha najaro ocasserehecca huada Dio ajimani inahanahitohui. Dio pocca madija pohua

icattejidsa-baqquijaridenidsa huati huana tadsapa: “Nanidsa epejena, jicana” nahitohui Dio –nade Jeso.

<sup>23</sup> –Nadsapa madija tiadenidsa pohuama: “Qqui, ajararipaja ia Idinide Cristo-Mesia” quina-dsa, madija ohuaha attideni naco: “Qqui, ajaccajarina Cristopaja” quinadsapa pajissa tiquinejerana, onajaro. <sup>24</sup> Madija mamaidsadedeni naco tiadenidsa jahijonahitohui. Pohuadenipa: “Ohuapi Cristo-Mesia ojani” quinahitohui. Ohuahadeni naco: “Ohuapi Diocca dosseniji ojani, Pohua Atti ohuacomerani-jine” quinaraha maidsamanajari. Pohuadeni bodipa: “Dio icattejidsa-baqquijarideni icamaidsa-baqquina” quinadsa poccadeni maidsehe canahatorimana canaridsahitohui. Madija pohuadenidsa: “Pajissa Diocca dosseniji” quina-hijine tohuini quinaraha Dio Pohua icattejidsa-baqquijarideni motapa pohuadenidsa pajissa quina-jarahitohui. <sup>25</sup> Aji huati huati onajarocca imapi nidsaranibote tojanijineraha jidapana tiadenidsa huati onajaro-pajipa. <sup>26</sup> Nadsama madija attideni: “Ajacca madija madide nohuerahihuaji ia Idinide ccanihi” quina-dsapa nani qquide jai tija tejerana. Madija ohuahadeni naco: “Ajaccajaro odsa bodidsa ia Idinide pohua najimahi” quinadsa naco pajissa tiquinejerana, onajaro. <sup>27</sup> Aji ohuapi Madija Bedi ojararoa nidsa occaronapomadsapi ahuato tanitohui, pina ssissiede dacorehema ssie nadsa meme nemaneha tossiaja-baqquijarossa nanitohui. <sup>28</sup> Abaridsa toqueriqquinidsa bani huatiahi ponahi nahatoqqui tiquinajaro. Pina najaro imassa

najaro occaronapomadsapi madija huapima nahatoqqui nahitohui –nade Jeso.

**Jeso ccaronapomahicca ima**

*Maraco 13.24-37; Roca 21.25-33;*

*17.26-30, 34-36*

<sup>29</sup> Jesopa ima denima huati huati tajari: –Naraha ocasserehe inahanamanani nattinipi maji ohuihitohui. Abadsico naco cahuihitohui. Memecca abadsico bedi naco catojahitohui. Jidapapa memecca huapima dacoraqqui naccahi. Naraha dsotodepa meme dsadsa nadsapi huenene huenene canahitohui. <sup>30</sup> Nadsana ohuapi Madija Bedi ojararoa occaronapomadsapi memehuaji ahuato tanitohui. Nadsapa dsama huapimacca madija cappinamanadsa oji oji quinahitohui. Nadsapi meme essenima oquejemehe occaronapomani qqui toquinahitohui. Occa dacorehe, occa deni tojehe ahuato tanitohui. <sup>31</sup> Nadsapa occa dodosse tabaqqui memehuajicca dosse onaridsa-baqquidsas jadsirema jei jei quina-dsa Dio icattejidsa-baqquijarideni inequeriqquinibaqqui-manahitohui. Dsama nemanehedsa madiridsamanajarideni huapima ahuajicca, ahuajicca inequeriqquinibaqqui-manahitohui –nade Jeso.

<sup>32</sup> –Jari, ahua iquiera tahimaridsa ticahatteraji. Eppe moro nimanishi qqui tiquinadsapi: “Jehe, dsadsajade tojemanini” titiquina najaro. <sup>33</sup> Pina najaro imassa najaro aji dsama jicani tahimarini huati huati onajaro qqui tiquinadsapi: “Jehe, Jeso ccanihi, pina icca noccobijidsa huajarissa najari” tiquinana, onajaro. <sup>34</sup> Pajissara tiadenidsa

huati onajaro: Aji dsama jicani tahimarini huati huati onajarocca madija dsoqquemana-jaraccadsama najaro ima huapima tojanissa tani qqui toquinacahitohui. <sup>35</sup> Meme, nami naqui jicaridsanissa tanitohui. Naraha ohuattipi jiquejeranitohui. Aji huati huati onajaropi najarossa nanitohui –nade Jeso.

<sup>36</sup> –Occaronapomanicca huada, maji naco madija huapima ssamoqqui nahi. Diocca dodosse tabaqqi memehuaicca naco ssamoqqui nahi. Dio Bedi ohua naqui najaro ima ssamo onani. Naraha Abi Dio Pohuana nahato tahi ojarihi –nade.

<sup>37</sup> –Jehe, ohuapi Madija Bedi ojajaroa nidsa occaronapomadsapi pina maittaccadsama \*Nohue madipodsa ppani ccajonajarocca imassa nanitohui. <sup>38</sup> Ppani ccajona-jeraccadsama madijadenipa jijipamana najari, dse dse quinajari, caji caji canajari. Nama quiquinanapojaria aja Nohue pocca canoa imenidsa toqquedsimahicca huada bacco tajaropaji. <sup>39</sup> Madija motapa ppani tojanicca huada ssamoqqui nadsa najoramanapo-jarajari. Nadsapa ppani huassinaja bacco najonadsapi huapima je tocaniredsa jicajari. Najarossa nanitohui nidsa ohua Madija Bedi ojajaroa occaronapomadsa naqui madija mota otohui najoramana-jaradsapa ajijaro namidsa jicahitohui. <sup>40</sup> Jehe, nidsa occaronapomadsapi ima ajima nanitohui: Madija pamaha huidsajadsa dsepedeni ijimanajari. Ojaria otohui najorapojarina iaccamaccossanhitohui. Naraha ohuahapa otohui najora-jaradsapa inebohuitohui. <sup>41</sup> Amoneje pamehe naqui dododsa dode toquejenajaro. Ojarie otohui najorapojarona iaccamaccossaninitohui. Naraha onihipi

otohui najora-jeradsapi inebonitohui –nade Jeso.

<sup>42</sup> –Nadsama tetideni huatodsa ticattomama canaji. Ohua tiadeni Medsede occaronapomanicca huada ssamoqqui tiquinani. <sup>43</sup> Ajijaro imadsa tibodideni huatoji: Odsa jinedepa bobotide qquedsimahijinecca huada nahato tapodsapa pocca odsadsa botide qquedsima-jarahijine pocca odsa cacahuade nocco bissahitohuiraha ssamo taja najari. <sup>44</sup> Nema nadsapi tinajoramanehe timadimanaji. Madijapa ohua Madija Bedi ojajaroa occaronapomanicca huada ssamoqqui nahi. Nidsa huatideni ajamama canadsa bacco onanipomanitohui –nade Jeso.

**Madijacca dodosse ibora tadsapa ima bicani cajihitohui, tabaccora tadsapa nanajidso tojahitohui**

*Roca 12.41-48*

<sup>45-46</sup> Jesopa ima onihitohui tajari: –Madija dsepe ssebotepa huaji tani toccahijine najoradsapa pocca dodosse ojariadsa huati tajari: “Occa madija tecahuabaqqina. Jipamanahijine maji bacco tadsapa taparideni da da titinabaqqi nana” najari. Nadsapa dsepe ssebote toccajari.

–Nadsapa pocca dodosse nahato tadsa, ibora tadsapa madija ecahuabaqquihissa tahitohui, pina pohua dossede attissa inananitohui. Nama nadsapa dsepe ssebote ccanidsa qqui tadsapa pocca dodossedsa ima bicani inananitohui. <sup>47</sup> Nadsapi pajissara tiadenidsa huati onajaro: Madija dsepe ssebotepa pocca dodosse ibora tajaridsa ajama nahitohui: “Tiapi occa odsa, occa huidsaja, odsepetaji huapima tecahuaji” nahitohui –nade Jeso.

<sup>48</sup> –Naraha dsepe ssebotecca dodosse tabaccora tadsapa pohua dossede attissa inana-jeranitohui. Pohua bodipa: “Ohua dossede najo-ccahi, qqui tajarahi” nahitohui. <sup>49</sup>Nadsapa pohua dossedecca dodosse tabaqqi ohuahadeni ihinajidsobaqqi nahitohui. Nadsapa pohua naco noccodeni janoqqiri najaridenidsa quejemadsapa jipadera ccaridsadsapa comatanicca naco dse dse nanaridsa nahitohui. <sup>50</sup>Pocca dodosse tabaccorabotepa pohua dossede ccanihicca maji, huada ssamo tadsa pohuatohui najora-jarahitohui. Nama nanaridsa nanaja dsepe ssebotepa bacco nanihitohui. <sup>51</sup>Nadsapa pocca dodosse inajidsohuitohui. Dsoqqe-dsapa maidsajidede rabotedenihuaji inanahitohui. Nahihuajipa ocasserani ahua-dsanapodsapa pano todsahi nadsa oji oji nahitohui –nade Jeso.

**Jesopa dsouato 10  
quinajaro tahimarinidenidsa  
mari icanabaqquijari**

**25** <sup>1</sup>Nadsapa Jeso madija denima mari icanabaqquijari: –Diocca cacahuehe tojadsapi pina ajiaro imassa nanitohui: Dsouato 10 quinajaropi dsabisso dsouato cacajirehicca jipaqqie-tohui najoramanadsapi ponidenicca jojororo equidiridsamanadsa dsabisso cajibote najari bacco ijidsamanahijine dsome jai tojajaro. <sup>2</sup>Naraha dsouatodeni mota 5 quinehepi bodinideni huatonissa tejerajaro. Naraha dsouatodeni mota 5 quinehepi bodinideni huatonissa tajaro. <sup>3</sup>Nadsapi dsouato bodinideni huatonissa tejerajaropi ponidenicca jojororo iaccamanaraha ppejene jicadsa denima sso idsamanahijine dsojo quina-jarajari. <sup>4</sup>Naraha dsouato



bodinideni huatonissa tajarodenipi ponidenicca jojororo iaccamandapa ppejene jicadsa denima sso idsamanahijine dsojo quinajari. <sup>5</sup>Nadsapi jai tojajaro, boronidsa bacco toquinaraha dsabisso cajibote najari najodsapa dsohuatodeni cahadijabote nadsapi nanidsa cahadijajaro.

<sup>6</sup> –Naraha dsome nocconi tojadsana madija jadsirema huahua najari: “¡Dsabisso ccajonahi, ccajonahi! ¡Jai tijajonaji, bacco tijidsamanahijine!” najari. <sup>7</sup>Nadsapi dsohuatodeni huapimaocco toquejenadsa totehemamanadsapi ponidenicca jojororo denima ssiaja tahijine najoramanajaro. <sup>8</sup>Naraha dsohuato bodinideni huatonissa tejerajaropi motadenidsa attinidenia: “Ticcadeni jojororo ppejene badsira taha iadsa da tiquinajo, icca jojororo ohuiridsabote nahi” quinajaro. <sup>9</sup>Naraha dsohuato bodinideni huatonissa tajarodeni attinidenia: “Poni. Tiadenidsa badsira taha sso idsajarahi. Tiadenidsa, iadsa nadsapa pajira-jarahi. Dadahuaji jai tijaccaji, jojororo ppejene ohuaha mitta tiquinahijine” quinajaro. <sup>10</sup>Nadsapi mittade jai tojajaro. Naraha nanihuaji najomanadsapi aja dsabisso amoneje cajihijine bacco najonajari, cacajirehicca jipaquiedsa toqqe-dsimajari. Nadsapi dsohuato bodinideni huatonissa tapojarodeni pohuadsa jai tojedsimajaro. Nadsapi noccobiji icahacossajaro. <sup>11</sup>Naraha dsohuatodeni mota 5 quinehepi dadahuaji mittade najomanadsa dsotode bacco nanimanajaro. Amossinidsa domoni huadsa

dsabisso cajibote najaridsa huahua quinajaro: “¡Ia, ia! ¡Jaijedsimanijine noccobiji ticanahabaji!” quinajaro. <sup>12</sup>Naraha dsabissopa noccobiji icatabojidsa-jerani. Pohua attipa: “Tiadenidsa pajissa onocco jidsa tani. Occa madija tiquejena-jerani” najari –nade Jeso.

<sup>13</sup>Nadsapa madija huapimadsa Jeso attipa: –Tibodideni huatonissa taji. Ohua occaninicca huada ssamoquiquiri tiquinani. Maji naco ssamoquiquiri tiquinani. Tinajoramehe timadimanaji –nade Jeso.

**Jesopa dsiniro  
inahapimananijinecca imadsa  
mari icanabaquijari**

*Roca 19.11-27*

<sup>14</sup>Jesopa ima onihi huati tajari: –Diocca cacahuehe tojadsapi pina ajijaro imassa nanitohui. Madija pocca benehi toccahijinepa pocca dodosse tabaqqi queriquihijine huahua inabaquijari. Queriquidsapa pocca dsinirodsa dsepedeni ijimanahijine pohuadenidsa da inaridsajaro. “Aja occa dsiniro tinahapimanadsa nidsa occanidsapi ohuadsa nemanehe da tanimananijine” najari. <sup>15</sup>Pocca dodosse ojariapa dsiniro inahapinijine nahato tahissa tadsapa pohuadsa ccarara 5 mil nehe da inajaro. Ohuaha naco dsiniro inahapinijine nahato tadsapa pohuadsa ccarara 2 mil nehe da inajaro. Ohuhapa dsiniro inahapinijine ajamani nahato tadsapa pohuadsa ccarara 1 mil nehera da inajaro. Nadsapa dsiniro jinede pocca benehi toccajari.

<sup>16</sup> –Nadsapa ccarara 5 mil nehe cajjaripa amadsati toccajari. Mitta, da, mita, da naridsajari. Dsepe ijiridsahissa tadsapa 5 mil cajporaha denima 5 mil cajjari. <sup>17</sup>Nadsapa ccarara 2 mil nehe cajjari najari naco mita, da, mita, da naridsajari. Dsepe ijihissa tadsapa denima 2 mil cajjari. <sup>18</sup>Naraha ccarara 1 mil nehe cajjaripa nema inana-jerajaro. Najaripa pohua dossedecca dsiniro inajimanijine nami hui idsadsa ppa idsajaro.

<sup>19</sup> –Dsiniro jinedepa huada huapi tadsa ccanjari. Bacco nanidsapa pocca dodosse tabaquicca ima mittahijine pohuadenidsa huahua najari, poccadeni cuenta icattemanijine. <sup>20</sup>Nadsapa ccarara 5 mil nehe cajjari ccjonajari. Ccarara 10 mil nehe jinededsa da inanijaro. Pohuadsa da inanidsa pohua attipa: “Ohua dossede, ohuadsapi ccarara 5 mil nehe da tade. Naraha qqui taneje, odsepe ijiridsanissa tadsapi denima 5 mil nehe tojajaro” najari. <sup>21</sup>Nadsapa dsiniro jinede attipa: “Jehe, tiapi occa dodosse ohuattidsa ibora tinajaro. Bica tinani. Tiadsa badsira tehe da onaporaha denima tojanijine dissera tinadsapi denima tiadsa da onanitohui. Tiqqedsimaji, etidsena” najari pocca dodossedsa.

<sup>22</sup> –Nadsa pocca dodosse ohuaha ccarara 2 mil nehe cajjari ccjonajari. Pohua attipa: “Jehe, ohua dossede, ohuadsapi ccarara 2 mil nehe da tade. Naraha qqui taneje, odsepe ijiridsanissa tadsapi denima 2 mil nehe tojajaro” najari. <sup>23</sup>Nadsapa dsiniro jinede attipa: “Jehe, tia naqui occa dodosse ohuattidsa ibora tinajaro.

Bica tinani. Tiadsa badsira tehe da onaporaha denima tojanijine dissera tinadsapi denima tiadsa da onanitohui. Tiqqedsimaji, etidsena” najari pocca dodossedsa.

<sup>24</sup> –Nadsa pocca dodosse ohuaha ccarara 1 mil nehe cajjari ccjonajari. Pohua attipa: “Ohua dossede, tiapi madijadsa daco tijirajaro. Tiapi tarabajadsa tejeraraha ticca dodosse tabaquijine titicaji najaro. <sup>25</sup>Nadsapi tinoppine ocappinadsa nami hui odsadsa ticca dsiniro ppa odsajarode. Aja ticca dsiniro tiadsa da onanina” najari. <sup>26-27</sup>Naraha dsiniro jinede attia: “¡Occa dodosse ibobote! ¡Tabaccora tinani! Tettipi ohuadsa: ‘Madijadsa daco tijirajaro. Tarabajadsa tejeraraha ticca dodosse tabaquijine titicaji najaro’ taha. Naraha ohuadsa nahato tinadsapi occa dsiniro aji dsiniro ehcahuamana nanihuajina tinebodsas tohuapidsapi occanidsa denima ohuadsa da taninitohuiraha” najari dsiniro jinede atti.

<sup>28</sup> –Nadsa pocca dodosse tabaqqi ohuahadenidsa huati tajari: “Jari, occa dsiniro ccarara ibobotedsa da onapojaropi tidinimanaji. Tidinimanadsapi madija dsiniro ccarara 10 mil nehe cajjaridsana da tiquinaji. <sup>29</sup>Aja, cajjaripa pohuadsa denima, denima, denima tojadsapi huemani cajjhitohui. Naraha ibobotepa badsira taha cajiraha pohua cajjaricca todininitohui. <sup>30</sup>Nadsama aja occa dodosse ibobotepa dsidsinihuaji coro tininemanajo. Nahihuajipa ocasserani ahua-dsanapodsapa pano todsahi nadsa oji oji nahitohui” najari dsiniro jinede atti –nade Jeso.

–Madija ocattejidsa-  
baqquihitohui –najari Jeso

<sup>31</sup> Jesopa denima mari icana-baqquijari: –Ohuapi Madija Bedi ojajaroa nidsa occaronapomadsapi occa deni tojehe ossiejenema occaronapomanitohui. Diocca dodosse tabaqqui memehuaajicca ohuadsa jahironahitohui. Nadsapi deni ojanicca huihuittari bicanidsa ohuittaridsa dosse dosse onanitohui. <sup>32</sup> Nadsana dsama huapimacca madija obacchohuaji queriqquihitohui. Nadsapa ohuana madija ocattejidsa-baqquihitohui. Pina edede cacahuadepa pocca edede icattejidsa-baqquijarissa onanabaqquihitohui. Edede cacahuadepa edede bicahi pohuadenira icattejidsabaqqui, edede jidsadsa cabra pohuadenira icattejidsabaqqui najari. <sup>33</sup> Pohua biji nahatonihuajipa edede bicahi pohuara. Pohua biji ssamohuajipa edede jidsadsa cabra pohuara inanabaqquijari. Ohua naqui madija ocattejidsa-baqquidsapa madija bicaqquri najari Dio Pohua jipa tahicca inanamanajardenipa obiji nahatonihuaji onanabaqquihitohui. Madija tabaccoraqquri najari Dio Pohua jipa tahicca inanamana-jerajarodenina obiji ssamohuaji onanabaqquihitohui.

<sup>34</sup> –Nadsapi ohua tamine ojadsa aja madija obiji nahatonihuaji domo huajaridenidsa huati onanitohui: “Nija, occa Abi tiadenidsa ima bicani inanaridsajaro. Pocca cacahuehe tiadenidsa tojani. Najaropi dsama nahato-jeraccadsama tiadenidsa najorapojaro. <sup>35</sup> Ohuadsa bicaqquri tiquinadsapi opemidsa ohua titapamanade.

Obacco dsaridsa ohuadsa passo da ticanamanade. Tiadenihuaji bacco onajonadsa ohuadsa tinoccodeni jidsaqquri naraha: ‘Iadsa timadiccaji’ tiquinade. <sup>36</sup> Etero ocappiradsa naqui ohuadsa da tiquinade. Coma onadsa naqui ohua qquide jajahi tijajona nade. Toponi cocorodsa ohuedsadsa naqui ohua qquide jajahi tijedsima nade” onanitohui pohuadenidsa.

<sup>37</sup> –Nadsapa aja madija bicaqquri najarideni ohuadsa huati toquinahitohui: “Ia Medsede ¿nejecoma nadsa tipemidsa tiadsa dsamatapa da inajaritta? ¿Nejecoma nadsa tibacco dsaridsa tiadsa passo da icanajarotte? <sup>38</sup> ¿Nejecoma nadsa tiadsa inocco jidsa taraha, ‘Iadsa timadiccaji’ inajarotte? ¿Nejecoma nadsa etero ticappiradsa tiadsa da inajarotte? <sup>39</sup> ¿Nejecoma nadsa coma tinadsa tia qquide jajedsimajarotte? ¿Nejecoma nadsa toponi cocorodsa tedsadsa tia qquide jajedsimajarotte? Ssamomo inani” quinahitohui. <sup>40</sup> Nadsapi ohua tamine ojadssapi pohuadenidsa ohuatti ajima onanitohui: “Pajissara tiadenidsa huati onajaro. Aja madija occa tojajari ojaría tohuati nahana tajari acco ticamamanadsapa pina ohua acco ticamamanajarossa najaro” onanitohui, obiji nahatonihuaji domo huajaridenidsa –nade Jeso.

<sup>41</sup> –Naraha obiji ssamohuaji domo huajaridenidsapi ohuatti ajima onanitohui: “¡Aji ohuadsapi huajiji tinaji! Diopa tiadenidsa najidsohue inanajaro. ¡\*Jororoni jiquejeranihuaji jai tijaji! Najaropi pocca huadi Satanadsa, Satanacca dodosse tabaqquidenidsa najorapojaro. <sup>42</sup> Tiadenipi opemidsa

ohua titapamana-jerade. Obacco dsaridsa ohuadsa passo da ticana-mana-jerade. <sup>43</sup>Tiadenihuaji bacco onajonadsa ohuadsa tinoccodeni jidsaqquri nadsa: ‘Iadsa timadiccaji’ tiquinejerade. Etero ocappiradsa naqui ohuadsa da tiquinejerade. Coma onadsa naqui ohua qquide jajahi tijajona nejerade. Toponi cocorodsasda ohuedsadsa naqui ohua qquide jajahi tijedsima nejerade” onanitohui pohuadenidsa.

<sup>44</sup> –Nadsapa aja madija tabaccoraqquri najaridenipa ohuadsa huati toquinahitohui: “Ia Medsede ¿nejecoma nadsa tipemidsa tiadsa dsamatapa da inajarajaritta? ¿Nejecoma nadsa tibacco dsaridsa passo tiadsa da icana-jerajarotte? ¿Nejecoma nadsa tiadsa inocco jidsa tadsa ‘Iadsa timadiccaji’ inejerajarotte? ¿Nejecoma nadsa etero ticappiradsa tiadsa da inejerajarotte? ¿Nejecoma nadsa coma tinadsa tia qquide jajedsima-jerajarotte? ¿Nejecoma nadsa toponi cocorodsasda tedsadsa tia qquide jajedsima-jerajarotte? Ssamomo inani” quinahitohui.

<sup>45</sup> Nadsapi ohua tamine ojadsapi pohuadenidsa ohuatti ajima onanitohui: “Pajissara tiadenidsa huati onajaro. Aja madija occa tojajari ojaria tohuati nahana tajari acco ticamamana-jaradsapa pina ohua acco ticamamana-jerajarossa najaro” onanitohui pohuadenidsa –nade Jeso.

<sup>46</sup> –Jehe, tabaccoraqquri najaridenipa najidsohue jiquejeraniccadsa madimana-dsanapohuitohui. Naraha madija bicaqquri najari Dio Pohua jipa tahicca

inanamanajarodenina camittehe jiquejeranihuaji madimana-dsanapohuitohui –nade Jeso.

**Jeso todsepe tojahijine imahaha canajari**

*Maraco 14.1-2; Roca 22.1-2;*

*Huano 11.45-53*

**26** <sup>1</sup>Jesopa madija mari icanabaqquia jicadsapa ia pohua huatimadedenidsa huati tajari: <sup>2</sup> –Nahatoqquri tiquinani huada pama nadsapi ejete \*Pascoa tojanitohui. Ohuapi Madija Bedi ojajaroa nidsa najaro ejete tojadsapi todsepe ojanitohui. Ahua porimacossanidsa ohua inanadsoqque-mananijine –nade.

<sup>3</sup>Nadsapa Jesodsasda jiperaqquri najarideni aja dada toqqumade tamedenedi, jodiodeni ime jocohuideni tedseje poccadeni tamine deni tojajari onipa Caipa pocca odsa imenidsa queriquimanajari. <sup>4</sup>Nahidsa imahaha canajari: –¿Nejecomaidsehedsa Jeso todsepe tojadsasdoqquehijine? –quinahi nade.

<sup>5</sup>Naraha pohuadeni atti onihipi: –Ejete tojadsapi ima nohueraccanijine. Jesodsasda madija jipaqquri najarideni pohua dama inahi qqui toquinadsapa mohua mohua canarana –quinahi nade.

**Jeso tatidsa majojo sso inarijarocca ima**

*Maraco 14.3-9; Huano 12.1-8*

<sup>6</sup>Jesopa odsasda capamema najaro onini Betaniahuaji madidsa Ssino pohuadsa huapi jadsidsi quiquinanajaricca odsadsa toqquedsimajari. <sup>7</sup>Nahi Ssinocca odsadsa jipade jassi inaridsa amoneje Jesodsasda tohuajiressijaro, poni dsapanidsa siba onini

alabastro nahatoni jojo bicahi dsojo inajonajari. Najari jojodsa majoyo bicani huatini ccara tanicca dsojo icadsimajaro. Jesodsa bacco tadsapi tatidsa nemanehes sso inarijaro. <sup>8</sup>Naraha Jesocca dodosse tabaqqui ia qqui inadsapi edijaro. Ettipi: –¿Nejecotohui majoyo ponima inajicajaro? –inade. <sup>9</sup>–Najaro majoyo nemanehes manaconidsa da icanadsa iadsa da inadsapi madija cappiramanajaridenidsa da iquimanitohuiraha –inade. <sup>10</sup>Etti nema inadsa Jeso mittadsapa pohua attipa: –Epeje tiquinaji. ¿Nejecotohui ponidsa tedimanagero? Ponijine ohuadsa nema nadsapi bica tani. <sup>11</sup>Cappiramanajaridenina tiadenidsa madimanasanapohuitohui. Naraha ohuapi tiadenidsa omadidsanapo-jeranitohui. <sup>12</sup>Aji majoyo ohuassiredsa sso inarijaropi pina odsoqquedsa ohua ppa idsamananijinessa najaro najorapojaro –nade. (Jodiodenipa poccadeni madija dsoqquedsapa nama quiquinanajari.) <sup>13</sup>–Pajissara tiadenidsa huati onajaro: Dsama onihi, dsama onihidsa otahimari madija tocassiejerahijinecca ecomeramanadsapi aji otatidsa majoyo sso inarijarocca ima naqui madija mittaridsamanahitohui. Nema nadsapi ponicca ima huatideni ajamamana-jarahitohui –nade Jeso.

**Jodapa Jeso eccorahijine najorajari**

*Maraco 14.10-11; Roca 22.3-6*

<sup>14</sup>Jesocca dodosse tabaqqui 12 quinajari ojaría oni \*Joda Iscariotepa dada toqqumade taminedenidsa huatide toccajari.

<sup>15</sup>Pohua attipa: –Jari, Jeso tidsepedenidsa onanahijinepa ¿nejecoma nehe ohuadsa da tiquinanijine? –najari. Nadsapa taminedeni dsiniro ccarara plata 30 nehe huatini ccara tanicca Jodadsa da quinajaro. <sup>16</sup>Nadsapa toccanidsa pohua bodi najorajari. Jeso pohuadenidsa eccorahijine innocodsaridsajari.

**Ía Medsedecca jipaqquie**

*Maraco 14.12-25; Roca 22.7-23;*

*Huano 13.21-30; 1 Corintodenidsa 11.23-26*

<sup>17</sup>Isaraeri potemahi jodiodenicca ejete imeni bacco tajaro, oninipi \*Pan ssaja tajarahicca. Najaro ejetepi huada 7 nehe jicanijine. Tahidecca huadadsa jipaqquie onini Pascoa ihinanamana najaro. (Pascoa ettidsapi: Dio tossoqqumajari, inajaro.) Nadsapi najaro huadadsa Jesodsa ia pohua huatimadedeni huati inajaro: –¿Nejecohuaji Pascoacca jipaqquie tiadsa inajoranijine? –inade. <sup>18</sup>Iadsa huati tajari: –Odsa pananihuaji otessecca odsadsa huatide jai tijapoji. Pohuadsa ajima tiquinana: “Ía Maride attipa: ‘Ohuadsa ima tojabote nani’ najari. ‘Nadsapa occa dodosse tabaqqui tedseje ticca odsadsa Pascoacca jipaqquedsa edede bedi ijipaqquinijine’ napaja” tiquinana –nade Jeso. <sup>19</sup>Nadsapi Jesocca dodosse tabaqqui iapi Jeso pohua attissa inajaro. Pascoacca jipaqquie dsome ijipaqquinijine inajorarode.

<sup>20</sup>Nadsapi najaro dsomedsa ia Jesocca dodosse tabaqqui 12 inajaro pohua tedseje huahuanaridsa ijipaqquinijine jassi inahuajanijarode.

<sup>21</sup>Jipade iquejenanaja Jeso iadsa



huati tajari: –Pajissara tiadenidsa huati onana: Aji tiadeni ojariaha ohua ccaccoradsapa todsepe ojanitohui –nade Jeso. <sup>22</sup>Pohua atti nama nadsapa ibodi qquedsa-dsa: –¿Ohua Medse, aji ohuadsaqui? –inaridsajaro. <sup>23</sup>Nadsapa Jeso attia: –Madija ojariapa icca paratodsa pohua naco pocca pandsa depo apa, depo apa nahi. Najarina ohua ccaccorahitohui. <sup>24</sup>Jehe, ohuapi Madija Bedi ojajaroa nidsa odsoqqenitohui. Pina maittaccadsama otedsejemacca ima Dio Atti cacomeraquiri najarideni dsodo quinapojarossa onanitohui. Naraha ohua ccaccoradedsa oppina tehe tojanitohui. Jaho, najari maquideje tossona-jaradsapa bica taraha, oppina tanicca dsori tahitohuiraha –nade Jeso. <sup>25</sup>Nadsapa Joda Iscariote, Jeso ccaccoradepa

Jesodsa huati tajari: –Ohua Maride ¿ohuadsa tajarorane? –naraha Jesoa: –Jehe, tia tetti nema tajaropajia –nade.

<sup>26</sup>Nadsapa jipade iquejenadsa Jeso pan idi nadsa Diodsa huati tajari: –Jehe, Abi Dio ticca daniji iadsa bica tahi –nade. Nadsapa pan icanarobedsa dside jai da, dside jai da inaridsade. Ia pocca dodosse tabaqqidsa huati tajari: –Aja, apa tiquinajo. Ajijaropi ohuemacca ima –nade Jeso.

<sup>27</sup>Dsotodepa dse inahijine dsedse equidi nadsa Diodsa huati tajari: –Jehe, Abi Dio ticca daniji iadsa bica tahi –nade. Nadsapa iadsa da icanadsa iadsa huati tajari: –Aja, dse taridsamanajo, tiadeni huapima. <sup>28</sup>Ajajari dsedsepa ohuemenecca ima. \*Dio madija tedseje jehe canirehijinecca ima

tojanijine. Nidsa ohua odsoqqe-  
 dsa ohuemene toccadsapi najaro  
 jehe canireniji pajissa tojanitohui.  
 Aji ohuemene toccajaropi madija  
 huapimadsa ima bicani tojanijine.  
 Najaropi madija huapimacca imasiri  
 manaconi ohuadsa tojadsapi Diopa  
 poccadeni imasiri epeje inananijine.  
<sup>29</sup>Ajijaropi tiadenidsa huati onajaro:  
 Uva ppejene dse inajaripa dse  
 onapoma-jaraccatohui. Nidsa occa  
 Abicca cacahuehe tojanissa tadsa  
 tiadeni tedseje uva ppejene ohuaha  
 dsatira dse inahitohui –nade Jeso.

**Pedro pohua namaidisahijine  
 Jeso huati tapojari**

*Maraco 14.26-31; Roca 22.31-34;  
 Huano 13.36-38*

<sup>30</sup>Pascoacca jipaqueie jicadsapi  
 Diodsa jiri inade. Jiri ineha jica-  
 dsapi ssono Oribohuaji jajjemora-  
 nide. <sup>31</sup>Nahidsa bacco imoradsana  
 Jeso iadsa huati tajari: –Ajijaro  
 dsomepi tiadeni huapima ohua  
 tinebomananitohui. Pina Dio Atti  
 dsodo napojarossa nanitohui:  
 “Nidsa edede cacahuade dsoqqe-  
 dsapa pocca edede tojaribaqqui-  
 hitohui.” <sup>32</sup>Naraha ohuapi Diojine  
 onahatoninitohui. Onahatonidsapi  
 titedsejemadeni dsama arobeni  
 Carireahuajina occaninitohui  
 –nade Jeso.  
<sup>33</sup>Naraha Pedro attia:  
 –Huapima tia inebomanaraha  
 ohuapi tia onebo-jeranitohui  
 –nade. <sup>34</sup>Nadsapa Jeso Pedrodsa:  
 –Pajissara tiadsa huati onana: Tiapi  
 ajijaro dsome tacara huahua najara-  
 ccadsa ohuadsa: “Onocco jidsa tani”  
 tanitohui. Dsotode naqui: “Onocco  
 jidsa tani” tapomanitohui. Dsotode  
 naqui nema tapomanitohui –nade

Jeso. <sup>35</sup>Naraha Pedroa: –A, ohuapi  
 nema onejeranitohui –nade. –Ima  
 oppina tadsa naqui tiadsa: “Onocco  
 jidsa tani” onejeranitohui. Tiadsama  
 odsoqqenijine bica tani –nade  
 Pedro. Ia pohua huatimade huapima  
 naqui etti nema inade.

**Jesopa Jesemanihuaji Diodsa  
 huati huati tajari**

*Maraco 14.32-42; Roca 22.39-46*

<sup>36</sup>Nadsapa Jeso pohua inadsa  
 ahua ppa naridsahi oni Jesemani-  
 huaji jajijaro. Nanihuaji bacco  
 inadsapi ia pocca dodosse tabaqqui  
 iquejenajaro, iadsa Jeso attipa:  
 –Tiadenipi ajidsa jassi tinaccaji.  
 Ohuapi ajiccadsa Abi Diodsa huati  
 onaccana –nade. <sup>37</sup>Nadsapa pohua  
 huatimade 3 quinaha jina ina-  
 baqqujari. Pohuadenipa Pedro,  
 Sebedeo bedideni Huano, Satiaco  
 quinajarideni pohuadsa denima jai  
 tojajari. Nahidsana Jeso bodi qqe-  
 dsadsapa ojibote najari. <sup>38</sup>Nadsapa  
 pohuadenidsa: –Obodi ocassera  
 tajarojine ohuatiabote-te canani.  
 Tiadenipi ajidsa tibomanaccaji.  
 Ohuadsama tinoccodeni bissaccana  
 –nahi nade Jeso.

<sup>39</sup>Nadsapa Jeso tocca-cca nadsa  
 pohua baccohuaji namidsa pona  
 nadsa Imehidsa huati tajari: –Abi,  
 aji ¿madija tocassiejerahijinecca  
 ima onihi nohueraqui? Nohuera-  
 dsapi epeje. Madija huapima-  
 cca imasiri manaconi najidsosue  
 ohuadsa tojadsapi ocasserani  
 ohuanitohui. Pina dsedse bidabote  
 dse onanijinessa najaro. Najaro  
 onahananijine jipera onaraha ohua  
 jipa onanicca tohui onejerajaro. Tia  
 jipa tinaniccana paji. Najarodsana  
 ibora onajaro –nahi nade.

<sup>40</sup>Nadsapa pohua huatimadedeni-huaji ccanijari. Bacco nanidsapa cahadijahira qqui tajari. Nadsapa Pedrosda Jeso huahua najari:

–¿Ticahadijajaroqui? ¿Dsome nocconi ocaja-jeraraha tinoccodeni bissade tipajiramana-jerajaroqui?

<sup>41</sup>Ticahadija-jeradsa Diodsa huati tiquinaji, ima oppina tehe tojadsapi tijaparimanadsa ima tinanamana-jeranijine. Tibodidenipi ibora taraha tessiredenina mijira tajaro –nahi nade Jeso.

<sup>42</sup>Nadsapa toccanipomadsa Imehidsa huati tapomadsa naco: –Abi, nahato tinani. Madija huapimacca imasiri manaconi ocasserani ohuanijine jipera onaraha tia jipa tinaniccadsana ibora onajaro –nahi nade Jeso.

<sup>43</sup>Nadsapa pohua huatimadedeni-huaji ccanipomaraha cahadijahira qqui inabaquijari, huada comani ahuamanaja nadsa. <sup>44</sup>Nadsapa inebo-baquipomadsa Diodsa huati tapomajari. Pina pohua huati tapohuissa najari huati tapomajari. <sup>45</sup>Nadsapa pohua huatimadedenihuaji ccanipomadsa Jeso attipa: –¿Tiadenipi ticahadija dsanaponijinequi? Ohuapi Madija Bedi ojajaroa jidapapi ohua ccaccoradejine imasiri cajimanajarideni dsepedenidsa ojanitohui –nahi nade. <sup>46</sup>Nadsapa: –Jina, titehemamanaji. Ajana, jidapapa ohua ccaccorade ccajonahi –nahi nade Jeso.

### **Jeso dama quinajari**

*Maraco 14.43-50; Roca 22.47-53;*

*Huano 18.1-11*

<sup>47</sup>Jeso huati huati naccaraha Joda bacco najonajari. Jodapa Jesocca dodosse tabaqqui 12 quinajari-denijaria. Pohuana madija huapi

taha eccajonabaquijari. Jadsirecca massito eccajonamana, huahuacca eccajonamana najaro. Pohuadenipa dada toqqumade taminedenicca dosseniji, ime jocohuidenicca dosseniji jahijonajari. <sup>48</sup>Jodapa Jeso todsepe inanahijine eccajonabaqqui-jaraccadsama taminedenidsa huati tapojari: –Nidsa pano mose onahitohui. Najarina dama tiquinahijine –napojari nade. <sup>49</sup>Nadsapa huapima jahijonadsa bacco najonamanajari. Nanaja Joda Jesodsa tohuajiressi, pina pajissa pohuadsa bica tajarissa nadsa: –¿Nija ohua Maride? –nanaja pano mose inajaride. <sup>50</sup>Naraha Jesopa Jodadsa: –Otesse, ohuadsa ima tinananijine ticcajonajaro. Nadsapi nema taji –nade. Nadsapa Jesodsa tohuajiressimanadsa dama quinajari. <sup>51</sup>Naraha Jesocca madija ojariana massito dsoppa jeo, dada toqqumadedenicca tamine deni tojajaricca medse huaribo ca taneje tajo canajaro.

<sup>52</sup>Naraha Jeso najaridsa: –¡Paji! Ticca massito dso ticadsaniji. Jadsirecca massitodsa madija ijine ahujaripa nidsa dsotode pohua naco jadsirecca massitodsa inandsoqqe-manahitohui –nade. <sup>53</sup>–Jaho ¿tibodi ssamo tajaroqui? Ohua jipa onadsa Abi Diodsa huati onadsapi pocca dodosse tabaqqui memehujicca ohua acco icamananijine pina soldadodenissa najari 72 mil quinaha dosse inaronabaquihitohui. <sup>54</sup>Naraha nema onadsapi pina Dio Atti dsodo napojarossa onana-jeranitohui. Aji, ohuadsa ima oppina tanicca tojanijinepi maittaccadsama Djine dsodo quinapojaro. ¡Epeje!

Dio Atti nemaneha onapajiranissa tanijine. Ohua accodetohui huahua onejerana, onajaro –nade Jeso atti.

<sup>55</sup>Nadsapa Jeso pohuatohui jahijonaridenidsa huati tajari: –¿Nejecotohui tiadenipi ohua dama tiquinanijine jadsirecca massitoma, huahuaccama jai tijajonarajo? Nema tiquinadsapi pina bobotidetohui jai tijajonararossa najaro. Nadsa tiadenidsama huajijiradsa Diodsa dada toqqimahuaji mari mari ohonaraha ohua dama tiquinehe nejerade. <sup>56</sup>Naraha epeje, ohuadsa ima tinanamananijinepi pina aji Dio Atti cacomeraquiri najarideni dsodo quinapjarossa najaro tojanijine –nade Jeso.

Naraha ia pocca dodosse tabaqqi huapimapi Jeso inebodsa idomo toccade. Nadsapa Jeso pohua motta ojari naha iaccanimanahi nade.

**Dada toqqimadedenicca  
tamine deni tojajaridsa Jeso  
iaccamanajari**

*Maraco 14.53-65; Roca 22.54-55,  
63-71; Huano 18.12-14, 19-24*

<sup>57</sup>Jeso dama quinadsapa tamine Caipacca odsahuaji iaccamanajari. Pohuapa dada toqqimadedenicca tamine deni tojajari. Nahidsa jodiodenicca marinaja maridedeni, jodiodeni ime jocohuideni huapima queriquimanahi nade. <sup>58</sup>Naraha Pedropa huajima tohuanamissadsa dada toqqimadedenicca tamine deni tojajaricca boronidsa bacco todsimajari. Caipacca dodosse tabaqquidenidsama huittajari. Pohua bodipa: –¿Jeso nejecoma inanamanahijine? –najari.

<sup>59</sup>Nadsapa dada toqqimade taminedeni, jodiodenicca \*ima

cacattemadedeni deni toquejenajari-deni tedseje Jesodsa ima inassonari-mananijine tohuini quinadsa madija maidsehe huati toquinahijine tohui qqi naridsamanajari. Aja madija attidenipa: –Jesopa icca mari-najadsa oppina tanicca inanapaja –quinadsa taminedeni: –Jehe, najaro imadsa Jeso dsoqqehijine pajirahi –quinahijine. <sup>60</sup>Madijapa maidsehe onihi onihi huati toquina-raha najaro imadsa Jeso dsoqqehijine pajira-jerani. Poccadeni maidsehe najarossa naridsa-jerani. Oppina tanicca jerani. Dsotodecca madija pamahana poccadeni maidsehe najarossa najaro huati toquinajari. <sup>61</sup>Ojaria attipa: –Titaharibobo canaji. Jeso atti ajama nahi omittade: “Aji Diodsa dada toqqimacca odsa madija icanahatomanaraha ocatabodsapi huada 3 nadsa ocanahatoninitohui” nade pohua atti –nahi nade. Pohua tesse naco najarossa najaro huati tajari. Attideni nama quinaraha maidsamanajari.

<sup>62</sup>Nadsapa dada toqqimadedenicca tamine deni tojajari totehema, hua nadsa Jesodsa huati tajari: –¿Tiapi tia tecomajaroqui? Tiadsa ima inassonarimanajaropi ¿nejecoma naneje? –nahi nade tamine atti. <sup>63</sup>Naraha Jesopa pohua cacoma najari. Nadsapa tamine huati tapomajari: –Dio camitta tajari onima huati tinaji onadsama iadsa tia tecomeraji: ¿Tiapi Dio Bedi Cristo-Mesia tijaqui? –nahi nade tamine. <sup>64</sup>Nadsapa Jeso: –Jehe, tiadeni ohuadsa nema tiquinajaropaji. Naraha tiadenidsa huati onajaro: Ohuapi \*Madija Bedi ojararoa nidsa dsotode Dio

Dacorabote ohua deni tonana-dsapa Pohua inori nahatonihuaji ohuittarini qqui tiquinanitohui. Nidsa meme essenima occarona-pomani qqui tiquinanitohui –nahi nade Jeso.

<sup>65</sup>Nanaja dada toqqumade-denicca tamine deni tojajaripa Jeso atti mittadsa huati jami nadsa pocca etero joca taneje sseo najaro. Nadsapa huapimadsa huati tajari: –¡Dio itamassojar! ¡Epeje! Jidapapi pocca ima nahatoto inani. Madija ohuahacca imatohui huati inejerana. Pohua attipa pina: “Ohuapi Dio ojani” najarissa naha. Pohua atti tabaccora tani timittamanani. <sup>66</sup>Jari, tettideni ¿nejecoma tiquinani? –nahi nade Caipa. Naraha huapima: –¡Jehe, pohua atti nama nadsapa dsoquena inajaro! –quinahi nade.

<sup>67</sup>Nadsapa Jeso panodsapa ppito-to ppito-to canajari, idaquimanajari, pohuadeni dsepedsa naco pano ppa inanimanajari nade. <sup>68</sup>–Jari, Cristo-Mesia tijadsapi ¿nejecojari tia idajari? ¡Tecomerajo! –quinahi nade.

**Pedropa Jesodsa: – Onocco jidsa tani – najari**

*Maraco 14.66-72; Roca 22.56-62; Huano 18.15-18, 25-27*

<sup>69</sup>Jesopa odsa bodihuaji nanajidso tojaraha Pedropa amossinihuaji boronidsa huittajari. Nadsapi najaro odsacca medse dsouhato ccajonadsapi pohuadsa huati tajaro: –Tiapi Jeso Carireahuajicca huatimade tijadija –nani nade. <sup>70</sup>Naraha huapima mittamanadsa Pedro pohua namaidsajari: –A, ohuapi onocco jidsa tani. Qqui

onajarade. Najaro ima ssamo onani ohuapi –nahi nade. <sup>71</sup>Nadsapa Pedro najaro boronicca qqueque-dsimahuaji toccadsa najaro odsacca medse onihi pohua qqui tadsa huapimadsa huati tajaro: –Ajajaripa Jeso Nasaretihuajicadsa ccaridsadija –nani nade. <sup>72</sup>Naraha Pedro pohua namaidsapomajari: –Dio nahato tahi pohuadsa onocco jidsa tani –napomahi nade.

<sup>73</sup>Naraha dsotodepa nahidsa toqueriqquijari attidenipa: –¡Pajissade! Tiapi Jesocca tijade. Carireahuajicca tohuattitacajini –quinahi nade Pedrodsa. <sup>74</sup>Nadsapa Pedro huadijari. –Pajissa huati huati onejeradsapi Dio ohua tinajidsoji, onana. Pajissa tiadenidsa huati onajaroa: Najari madijadsa onocco jidsa tani –nahi nade. Nanaja tacara huahua naja najari. <sup>75</sup>Nadsapa Jeso atti Pedro bodi huatomanijari: –Tacara huahua najaraccadsapa tetti tinamaidsani 3 nanitohui –napojari. Aja Jeso atti Pedro bodi huatomanidsapa toqquendasa ojijari nade.

**Tamine Piratodsa Jeso iaccamanajari**

*Maraco 15.1; Roca 23.1-2; Huano 18.28-32*

**27** <sup>1</sup>Ssijadsapi dada toqqumade taminedeni, ime jochuideni tedseje queriquimanadsa pohuadeni imahaha canajari. Jehe caniredsapa Jeso dsoquehijine ima najoramanajari. <sup>2</sup>Nadsapa Jeso biji jore quinadsa tamine Piratohuaji iaccamanajari, –Jeso dsoquena –quinahijine. Tamine Piratopa romanodeni.

Pohuapa jodiodenicca dsama cacahuade tojajari.

### **Joda pohua nanadsoqqejari**

<sup>3</sup>Jeso ccaccorade \*Jodapa  
–Jeso dsoqquehijine iaccamanajari –quinahi ima mittadsapa pohua bodi jabojo najari: –Jaho ¿nejecotohui Jeso ohuaccorajaritta? –najari. Nadsapa dada toqqumade taminedeni, ime jocohuideni, najarideni huapima dsiniro ccarara 30 nehe Joda pohuadsa da quinapojaro pohuadenidsa da inaninijine pohuadenihuaji toqquedsimanijari.  
<sup>4</sup>Pohuadenidsa huati tajari: –Jaho, tabaccorehe onanajaro. Jesopa imasiri cappiraraha ojine tidsepedenidsa tojadsapa dsoqquehitohui –nahi nade Joda. Naraha pohuadenipa: –Epejea, ijine jerani. Ticca imasiripi ticca –quinahi nade.  
<sup>5</sup>Nadsapa poccadeni daniji ccarara 30 nehe Diodsa dada toqquima bodihuaji quissa inanijaro. Quissa inanie jicadsapi toccanijari. Dsotodepa pohuajine pohua matto-dsa ssoque dsanadsa joppa taronadsa pohua nanadsoqqejari.

<sup>6</sup>Nadsapa dada toqqumade taminedenipa najaro dsiniro ccarara inaccanimanadsa attidenipa: –Ajijaro dsiniro madija dsoqquehijine paca quinajariccapi Diodsa dada toqqumahujicca dsinirodsa quejemanijine oppina tani. Najaro dsiniropi madija emene toccahijine manaconi –quinahi nade. <sup>7</sup>Nadsapa imahaha canaha jicadsapa najaro dsinirodsa dsama onini: Dsipa nanahatodecca quiquinanahihuaji mitta quinajaro, –Najaro dsamapi manahideni noccobirideni tojanijine –quinadsa.

<sup>8</sup>Naraha najaro dsamapi Jodadsa da quinapojarocca dsinirodsa mitta quinadsa najaro dsama onini cacanidsatipi: –Tohuemene manaconidsa mitta nanicca dsama –quiquinanajari. Aji ohua omadidsa ajijaro dsodode ojadsa naco madijapa nama quiquinanahipaja naccahi. <sup>9</sup>Najaro dsama jodiodenicca taminedeni mitta quinajaropi pina maittaccadsama Dio Atti cacomerabote Jeremia dsodo inapojarossa najaro. Najaro imapi ajima najaro:

–Isaraeri potemahideni mota attidenipa: “Jehe, dsoqquehijine eccorahi manaco dsiniro ccarara plata 30 nani pajirani” quinahitohui.

<sup>10</sup>Najaro dsiniro inaccanimanadsapi dsama onini: Dsipa nanahatodecca quiquinanahihuaji mitta quinahitohui, pina Dio ohuadsa huati tajarissa najaro

–napohui nade Dio Atti Jeremiajine dsodo nanidsa.

### **Tamine Piratocca ima huahuatihuaji Jeso huajari**

<sup>11</sup>Tamine Piratohuaji Jeso iaccamanadsa nahi Pirato baccohuaji inahuamanajari. Nadsapa Pirato Jesocca ima mittahijine pohuadsa huati tajari: –¿Tiapi jodiodenicca tamine tijaqui? –najari. –Jehe, tetti nema tajaropaji –najari Jeso. <sup>12</sup>Naraha dada toqqumade taminedeni, ime jocohuideni tedseje Piratodsa poccadeni maidsehe huati toquinajari. Naraha Jesopa joma najari. <sup>13</sup>Nadsapa Pirato Jesodsa huati tajari: –Ticca ima bica tejerani quinajari ima huapi tani

huati huati toquinaraha ¿timitta-  
jerajaroqui? –najari. <sup>14</sup>Naraha  
Jesopa huati tarajari. –Occa ima  
ohuacomerana –najarajari. Pohua-  
dsa ima inassonarimanajarodsa  
naqui: –Pajissa jerani –najarajari.  
Nohuerahi. Nama nadsapa tamine  
Piratopa jabojo najari. Pohua  
bodipa: –¿Nejecotohui pohua  
cacomajari? –najari.

–**Baraba qqenana, Jesopa  
dsoqqena –quinajaricca ima**  
*Maraco 15.6-20; Roca 23.13-25;*  
*Huano 18.38–19.16*

<sup>15</sup>Huajano huajjiradsa jodiodeni-  
cca ejete Pascoa tojadsa tamine  
Piratopa toponi cocorodsa madija  
huedsamanajari ojaría pohua-  
jine qqueqqenamana najari.  
Madija huapima tohui quinajarina  
pohuajine qqenahijine najora-  
jari. <sup>16</sup>Nadsapa toponi cocorodsa  
huedsajari ojaría onipa Baraba.  
Pocca ima tabaccora tadsa madija  
huapima pohuadsa nahatoqqiri  
najari. <sup>17</sup>Nadsapa Pirato pohuahua  
madija queriquijonadsa pohua-  
denidsa huati tajari: –¿Nejecojarina  
qqenahijine tohui tiquinajaro?  
¿Baraba qqenahijineco? ¿Jesodsa  
“Cristo-Mesia” quiquinanajari tappa  
onahijinerana? –nade.

<sup>18</sup>Piratopa pohua bodidsa Jesopa  
ima cappirahi nahato tapojari.  
Pohua bodipa: –Dada toqqimade  
tamedenipa Jesocca deni tojehe  
acconi huadimanadsa ohuadsa ecca-  
jonamanajari –najari. <sup>19</sup>Piratopa  
ima cacattemahuajicca huihuittari-  
dsa huittaricadsa pocca amoneje  
pohuadsa ima dosse inajonajaro.  
Poni attinipi: –Najari maqqi-  
dejepa bica tajari. Pohuadsa ima

tinana-jerana. Dsomedsa Jesocca  
imajine occa huada oppina tapa  
–najaro.

<sup>20</sup>Naraha dada toqqimade  
tamedeni, ime jocohuideni  
tedsejepa Jesodsa ima inanamana-  
nijine najoramanajari. Madija  
huapimadsa huati naridsamanajari:  
–“Barabana qqenana” tiquinaji.  
“Jesopa dsoqqena” tiquinaji  
–naridsamanahi quinade.

<sup>21</sup>Nadsapa tamine Pirato aja  
huapima domo huajaridenidsa  
huati tapomajari: –¿Aja pamaha  
todsepe toquejenajaripa nejeco-  
jarina ojine qqenahijine tohui  
tiquinajaro? –napomade. Nadsapa  
huapima johuahua johuahua cana-  
jari: –¿Barabana tijine qqenajo,  
qqenajo! –quinade.

<sup>22</sup>Naraha Piratopa domo huajari-  
denidsa huati tapomajari: –Jehe,  
naraha Jesodsa “Cristo-Mesia”  
quiquinanajaripa ¿nejecoma onana-  
hijine jipacquiri tiquinani? –nade  
Pirato atti. Naraha huapima  
johuahua johuahua canapoma-  
jari: –¿Najari Jesona ahua  
porimacossanidsa dsoqqena,  
dsoqqena! –quinade. <sup>23</sup>–¿Naraha  
nejecotohui dsoqqehijine? ¿Nejeco  
imara inanajaro? –nade Pirato  
atti. Naraha domo huajarideni  
huapima paja johua toquinarihi  
nadsa: –¿Ahua porimacossanidsa  
dsoqqena, dsoqqena! –quinade.

<sup>24</sup>Naraha Pirato pohua bodi  
huatojari: –Ohuatti pajira-  
jerani. Pohuadenijine mohuaniji  
oppina tehe tojobote nani –nade.  
Nadsapa Pirato pohua dsepe ssahua  
nahijine passotohui huahua najari.  
(Pohua dsepe ssahua najaricca  
imapi: –Ohuapi ima ocappirani

–najarissa najaro.) Nadsapa passo dsojo icanajonamanadsa huapima qqui toquinadsa Pirato pohua dsepe ssahuade tojadsapa huati tajari: –Ajajari madija dsoqqe-hijinepi occa ima jerani. Pohua emene toccahijine jehe onejearo. Najaropi ticcadeni ima –nade Pirato. <sup>25</sup>Nadsapa madija huapima attidenipa: –¡Jehe, epeje! Ettijine dsoqqedsa pohua emene toccajaro manaconipi iadsa, icca ejedenidsa tojani bica tani –quinade.

<sup>26</sup>Nadsa tamine Piratopa Baraba qqenahijine huati tajari. Nadsapa pocca soldadodeni Jeso cossi inaqquimanahijine icadossebaquijari. Cossi inaqquimanaha jicadsapa icadossebaquipomajari: –Ahua porimacossanidsa coba tidsanamanahijine tiaccamanajo –nade Pirato.

<sup>27</sup>Nadsapa tamine Piratocca soldadodenipa odsa imeni bodihuajicca boronidsa Jeso iaqquedsimamanajari. Nahidsa romanodenicca soldado huapima toqueriquijari. <sup>28</sup>Pohuadenipa: –Jeso pina taminessa inanana –quinaraha maidsamanajari. Nadsapa Jesocca etero ssiti quinadsa etero macconi motaranicca pina tamedeniccassa najarodsas Jeso inehedsamanajari. <sup>29</sup>–Jeso taticca pina tamine tati-deniccassa nana –quinaraha cotihi atinema jore nahuajanihira ettari-manajari. Pohua dsepe nahatoni-huajiccadsa naco pina tamineca dsodopissa naraha ahua ppahua tajarora da quinajaro. Nadsapa jaja icanaqquimanahijine pohua baccouhaji pohuadeni pitodsas jassi tadsapa: –¡Deni tijani jodio-denicca tamine! –quinaraha

maidsamanajari. <sup>30</sup>Nadsapa ppito inaqquimanajari. Pohua dsepecca ahua idinimanadsa najarodsas pohua tatidsa huacca huacca quinajari.

<sup>31</sup>Nadsapa maidsehedsa pohuadsa jidsa jidsa quinaha jicadsapa etero macconi motaraniccapi ssiti quinadsa pohua pocca eterora inehedsanimanajari. Nadsapa ahua porimacossanidsa Jeso coba idsanamanahijine iaccamanajari.


**Jeso ahua porimacossanidsa  
coba idsanamanajari**

*Maraco 15.21-32; Roca 23.26-43;*

*Huano 19.17-27*

<sup>32</sup>Soldadodenipa Jeso iaccamananaja dsama Sirenecca madija Ssino bacco ijidsamanajari. Jesopa ahua porimacossani dsojo inaraha ja tojadsa soldadodenipa Ssino icadossemanajari: –Manaco tia ajararicca ahua porimacossani dsojo tinaji –quinadsapa manaco Ssinona dsojo inajaro. <sup>33</sup>Nadsapa ssono Cocottahuaji jai tojemora, bacco tomoramanajari. (Ssono onini Cocotta ettidsapi: Totati Tonanissa nani, quiquinanajari.) <sup>34</sup>Nahidsa uva ppejene bidabotedsa quejemahi Jesodsas da icanamanajari, –Pohua comene ojidsama nanijine –quinadsa. Naraha badsira taha ecatama, pohua nade.

<sup>35</sup>Nadsapa \*ahua porimacossanidsa coba idsanamanajaride. Coba idsanamanaha jicadsapa acca icanamacossa-manajari. Nadsapa Jesocca eterotohui soldadodeni siba bedenidsa coro coro quinajaride, –¿Pocca etero nejecojaridsana tojanijine? –quinadsa. Najaro sibadsa ittome-manadsapa pocca etero pohuadenidsa ojari ojari naridsajarode.



<sup>36</sup>Ittomemanaha jicadsapa nahidsa cacahuade jassi tajaride. <sup>37</sup>Jeso tati tetepihuaji naqui dsodo nani coba idsanamanajaro. Najaro dsodo nanipi: –Ajajaripa Jeso, Jodiodenicca Tamine –najaro. <sup>38</sup>Bobotide pamaha naco Jesodsama topamajonahijine ahua porimacossanidsa cobaba idsanamanade. Ohuahapa Jeso inori nahatonihuaji que, ohuahapa Jeso inori ssamohuaji que tade.

<sup>39</sup>Madija nahi jai tojequimajarideni Jesodsa jiperaquiri nadsa tatamasso quinajari. Tatideni huide huide quinadsa attidenipa: <sup>40</sup>–Ajina, tetti: “Diodsa dada toquima ocatabodsapi huada 3 nadsa ocanahatoninitohui” teteje nade –quinade. –Jari, pajissa Dio Bedi tijadsapi tia tinassijaji. Ahua porimacossanidsa tia tidinidsa

ticcaronaji –quinade. <sup>41</sup>Nadsapa dada toquimade tamedeni, jodiodenicca marinaja marideni, ime jochuideni tedseje Jeso itamassomanajari. <sup>42</sup>Attidenipa: –Ajana, madija ohuaha inassijabaquira pohua tonassijadepa ssamo tahi. Puhuapa Isaraeri potemahidenicca tamine tojadsapa ahua porimacossanidsa ccaronana. Nadsana pohuadsa pajissa inanijine –quinade. <sup>43</sup>–Ajana pohuapa Diodsa jehe nahissa tajari. Diopa pajissa pohuadsa huati huana tadsapa jidapanana pohua inassijana, inajaro. Ajana, pohua attipa: “Ohuapi Dio Bedi ojani” nanaja nade –quinade, jidsa jidsa quinadsa. <sup>44</sup>Bobotidedeni naco pohua inoridsa ahua porimacossanidsa cobaba dsanaraha najaro tohuattissa najaro dsa Jesodsa atti atti quinade.

**Jeso huatiajari**

*Maraco 15.33-41; Roca 23.44-49;  
Huano 19.28-38*

<sup>45</sup>Maji itetepi tojadsa dsama nemanehe todsidsini najaro. Dsidsi dsanapojaropi maji 3 bacco tajaro. <sup>46</sup>Najari maji 3'dsa Jesopa pohua attidsa jadsirema huahua najari: –Eri, Eri ζrema sabatani? –nahi nade. (Najaropi: –Abi Dio, Abi Dio ζnejecotohui ohua tinebojaro? –najari nade.) <sup>47</sup>Naraha nahidsa domodeni huajari mittamanadsapa: –A, maittaccadsamacca Dio Atti cacomerabote Eriadsa huahua nahi –quinahi nade. <sup>48</sup>Nadsapa nahidsa domo huajari ojaria huassinaja joppa tajari, huassa tajari idi, uva ppejene ssicata bidada najaridsa edsippa, ppaja tojadsa bobadsa oro, da icanamacossajari. <sup>49</sup>Naraha madija attidenia: –¡Maqui, nidsa padseje! Pohua inassiajahijine Eria ccajonahitidija. Qqui inaccana –quinahi nade. <sup>50</sup>Naraha Jeso jadsirema johua napomadsapa huatiajari. <sup>51</sup>Naneje Diodsa dada toququma bodihuajicca \*huahuacossa etero sibabote naqui Diojine sseo naronajaro. Carobe najaro. Nami naqui dsadsa najaro. Siba imeni huihwitteri naridsajaro naqui caroberidsajaro. <sup>52</sup>Tonocobiri mota naqui tohuabaridsajaro. Diodsa pajissa quinapojari jicapojarideni huapi taha Diojine nahatonimanahi nade. <sup>53</sup>Nahatonimanadsapa pohuadeni noccobiridsa jahinineridsajari. Naraha dsotode Jeso nahatonidsana najaridenipa odsa panani Jerosarehuaji jai tojedsimanijari. Nahidsa madija huapima pohuadeni qqui inabaquimanajari.

<sup>54</sup>Nadsapa ssonohuaji soldado tamine, pocca soldadodeni tedseje Jeso cacahuade domo huajaridenipa nami dsadsa nani qqui, oppina tanicca huapima qqui toquinadsapa jabojo quinadsa attideni: –¡Jaho! Pajissa ajaripa Dio Bediraha –quinahi nade.

<sup>55</sup>Amonejedeni naqui huaji tanidsa cattade domoni huajaro. Ponidenipi Jeso dsama arobeni Carireadsa ccaridsapodsapa pohua accode pohuadsa jahiridsajaro. <sup>56</sup>Ponidenipi huapi taraha mota oninidenina Maria Madarenahuajicca, Jose Satiacodenicca ami Maria, Sebedeo bedidenicca ami quinajaro.

**Jeso ppa idsamanajari**

*Maraco 15.42-47; Roca 23.50-56;  
Huano 19.38-42*

<sup>57</sup>Dsomebote nadsa dsepe ssebote oni Dsodsepa tamine Piratodsapa huatide toccajari. Pohuapa odsa panani Arimateahuajicca madija. Pohuapa tahide Jesocca tojapojari. <sup>58</sup>Nadsapa tamine Piratodsapa bacco tadsa Jeso assire ppa idsahijine huati tajari nade. Nadsapa Pirato pocca soldadodeni dsapa huati tajari: –Ajajari madijadsa Jeso assire da tiquinana, ppa idsahijine –nahi nade. <sup>59</sup>Nadsapa nahi Jeso coba dsanaha que tahi-huaji bacco toquinadsa Dsodsedsa Jeso assire da quinadsapa etero dsojorani onini lino bica tajarodsapa jore inaquidsapa dsojo inajari. <sup>60</sup>Nadsapa tonocobirihuaji dsojo inajari. Najaro tonocobiripi Dsodse dsama mita inapodsapa pohua noccobiri tojanijine tahide sibadsa hui quinapojaro. Najarodsapa Jeso assire ibedsajari. Dsodse qquenadsapa siba

imeni pata inanijaro, Jeso nocco-biridsa huacossanijine. Nadsapa Dsodse toccanijari. <sup>61</sup>Naraha Maria Madarenahuajicca, Maria onihi tadsajanipi ibomanadsa Jeso noccobiricca siba huacossanihuaji tocattanimanadsa pahimaccajaro.

**Jeso noccobiri  
dsepedeni panajari**

<sup>62</sup>Nadsapi huada ssiaja, jassinajacca huadadsa dada toqqumade taminedeni, marinaja pariseodsa jehe quinajarideni tedseje tamine Piratodsa huatide jai tojapomajari.

<sup>63</sup>Bacco toquinadsapa attidenia: –Ia dossede, ibodi huatomajaro, aja maitta maidsajide rabotepa dsoqqe-jaraccadsama pohua attipa: “Nidsa odsoqqedsapi huada 3 nadsa onahatoninitohui” nanaja nade. <sup>64</sup>Nama nadsapa pohua noccobiri ecahуamananijine ticca soldadodeni dosse tinabaquijo, dsepedeni panahissa tadsa huada 3 nehe ecahуamananijine. Nama quinadsapa pocca dodosse tabaqqui dsome Jeso assire idinemana-jarahijine. Idinemanadsapa madija huapimadsa maidsamanadsa: “Jeso nahatonih” quinarana. Jeso pohua madidsa naco maidsa maidsa napojari. Pocca dodosse tabaqqui madija huapimadsa: “Jeso nahatonih” quinadsapa maidsanijirideni denima tabaccora tarana –quinahi nade. <sup>65</sup>Nadsapa Pirato pohuadenidsa: –Jehe, Jeso noccobiri cacahuade soldado jai tojahijine dossede jipa onani. Tiacca-baqquimanajo, pohua noccobiri mohua quina-jarahijine soldadodeni dsepedeni panahijine –nahi nade. <sup>66</sup>Nadsapa taminedeni soldadodeni

tedseje jai tojadsapa siba imenibote huittacossanicca jore nani dsepedeni panahissa tadsapa: –Epejena. Dicca nanijine ssamo tani –quinahi nade. Nadsama jore nani idenidsa modsa nepi quinadsa najaro nepi nadsa tojano niqui todsanajaro. (Najaropi dicca nadsa bararini ahуato tanijine.) Nadsapa taminedeni soldadodeni inebobaqqumana-dsapa jai tojanijari.

**Jeso nahatonijari**

*Maraco 16.1-8; Roca 24.1-12;  
Huano 20.1-10*

**28** <sup>1</sup>Nadsapi jassinajacca huada jicani nattini semana tojapomanicca huada tahidecca domingo ssiajajonadsa Maria Madarenahuajicca, Maria onihi tadsajani Jeso noccobirihuaji qquide tohuedajaro. <sup>2</sup>Tohuedaneje... nami jadsirema dsadsa najaro. Aji nami jadsirema dsadsa najaropi ia Medsede Diocca dodosse memehujicca ccaronajari. Ccaronadsapa Jeso noccobiricca siba pata inajaro. Nadsapa najaro sibadsa huittari canahi quinade. <sup>3</sup>Pohuapa ssiaja tajari pina ssissiede ssiajanissa najari. Pocca etero nopo tajaro pina huepessa naraha denima nopo tajaro. <sup>4</sup>Soldadodeni najari qqui toquinadsapa pohua noppine cappinamanadsa tacca-cca-cca quinajari. Nadsapa pina cacotajarissa quinajari. <sup>5</sup>Naraha Diocca dodossepa amoneje huedajonajaredenidsa huati tajari: –¡Tiadenipi ticappinamana tejeraji! Jeso qquide ticadajonajaro nahato onani. Pohuapa ahua porimacossanidsa inanadsoqqe-manajari. <sup>6</sup>Naraha ajadsa podsa-jarahi.

Pohuapa nahatonipa. Pina pohua dsoqqe-jaraccadsama “onahatoninithui” nanaja napojarissa najari. Jari, pohua podsahihuaji qquide ticadedsimaji. <sup>7</sup>Nadsapi huassinaja ticadanidsa pocca dodosse tabaqquids huati tinanimanaji: “Jesopa nahatonih” tiquinana. Pohuapa titedsejemadeni dsama arobeni Carireahuaji toccanipo-huitohui. Nanihuaji jai tijanidsana pohua qqui tiquinahijine. Epejeni najaro ima tiadenidsa huati onaponi –nahi quinade. <sup>8</sup>Nadsapi Jeso noccobirihuaji nebomanadsa huassinaja Jesocca dodosse tabaqquids huatide dsaja tanijaro. Cappinamanaraha huatidsemaneri tanijaro.

<sup>9</sup>Dsaja taniraha nahi jahuids Jeso ponidenidsa ahuatomadsa: –Nija –najari. Nadsapi pohuadsa tohuedessidsa huatidsemanadsa ponideni pitonidsa pahimadsa pohua issodsca cahuajocossamana nadsa: –¡Ia Medsede, deni tijani! –quinani nade. <sup>10</sup>Nanaja Jesopa: –¡Ticappinamana tejeraji! Ticadanidsapi ohuemecotedenidsa huati tinanimanana: “Dsama arobeni Carireahuaji jai tojanina. Nanidsana ohua qqui toquinahijine, napaja” tiquinana –nahi nade Jeso ponidenidsa.

#### **Soldadodenicca maidsehe**

<sup>11</sup>Mariadeni tohuedanije naraha Jeso noccobiri cacahuade soldadodeni mota naco dada toqqimade taminedenidsa huati tanimanahijine odsa pananihuaji domo toccanijari. Aji nami dsadsa najarocca ima, Diocca dodosse memehuajicca siba pata inajarocca ima naqui, najaro ima huapima

soldadodeni qqui toquinajaricca huati tanimanajari. <sup>12</sup>Naraha dada toqqimade taminedeni najaro ima mittamanadsapa ime jocohuideni tedseje queriquimanadsa imahaha canajari. Jehe caniredsapa dsiniro huemani soldadodenidsa da inabaqquiridsajaro, pajissa pohuadeni qqui toquinajaripa ecomamananijine. <sup>13</sup>–Aji tiadenidsa dsiniro da inabaqquijaropi maidsehera huati tiquinanijine. Ajima tiquinaji: “Dsome icahadijadsa Jesocca dodosse tabaqquipa Jeso assire idinimanajari” tiquinaji. <sup>14</sup>Nadsapi najaro ima ticadeni tamine Pirato mittadsapa tiadenidsa huadithitohuiraha ia pohuadsa huati inanissatadsapi tiadenidsa tojonehitohui –quinahi nade. <sup>15</sup>Nadsapa soldadodeni dsiniro cajimanajaridenipa taminedeni attidenissa inanamanajaro. Najaro poccadeni maidsehepica madija jodiodeni motadenidsa tojaridsanissa tajaro. Aji ohua omadidsa ajijaro dsodode ojadsa naco najaro maidsehe motadenipa huati huati quinahi paja naccahi.

#### **Jesopa pocca dodosse tabaqquidosse inabaqquiridsajari**

*Maraco 16.14-18; Roca 24.36-49;*

*Huano 20.19-23*

<sup>16</sup>Nadsapi ia Jesocca dodosse tabaqqui 11 inajaro Carireahuaji jaijanijaro. Pina tahide amonejedenidsa Jeso huati tapojarissa inanajaro. Jeso attipa: –Najaro ssonohuaji jai tijemorana –nadsa najaro ssonohuaji jaijemorajaro. <sup>17</sup>Bacco imoradsapi Jeso qqui inajari. Qqui inadsapa pohuadsa etidsedsa: –¡Tiapi deni tijani, tiapi nahatonie jinede tijani! Aja tiassa

najari ohuaha nohuerahi –inade.  
 Naraha mota bodidenipa: –¿Pajissa  
 Jeso nahatonijarico? –quinajaride.  
<sup>18</sup>Nadsapa Jeso dsaboradsa iadsa  
 huati tade: –Abi Diopa pocca  
 nahatohue huapima memehujicca,  
 namihujicca naco ohuacahua-  
 ridsahijine pocca dacorehe ohuadsa  
 inanajaro. <sup>19</sup>Nema nadsapi dsama  
 huapimadsa otahimari maride  
 jai tijaridsaji. Madija ohuadsa  
 toquejenahijine maride dissera-  
 qquiri tiquinaji. “Jehe, Jesodsa

iquejenana” quinadsapa Abi Dio  
 onima, ohua Dio Bedi ohua onima,  
 Dio Corime onima passodsa \*topa  
 topa titidsanabaquimana nana,  
 onajaro. <sup>20</sup>Aji occa marinaja tiadeni  
 onahattabaquijaro nemanehedsa  
 iboraqquiri nahijine naco mari mari  
 titicanabaqqi-ridsamana nana,  
 onajaro. Ohuapi huada huajjiradsa  
 tiadenidsa ohomadiridsa nanitohui.  
 Nema odsanapojaroa dsama jicani  
 bacco tanitohui –nade Jeso.  
 Epejeni.